



(Tous les documents peuvent être consultés à l'Administration parlementaire.)

3. Ordre du jour

Den Ordre du jour, esou wéi d'Presidentekonferenz e virschléit, ass lech zougestallt ginn. Ass d'Chamber mat dësem Ordre du jour averstanen?

(**Assentiment**)

Et ass also esou decidéiert.

4. Hommage à la mémoire de M. Carlo Wagner, Député honoraire

Dir Dammen an Dir Hären, léif Kolleeгинnen a Kolleegen, wéi Dir et all héieren hutt, krute mer déi traureg Nouvelle vum Doud vum fréiere Kolleeg, dem Éierendeputéierte Carlo Wagner. Hien ass den 12. Februar am Alter vu 67 Joer gestuerwen.

De Carlo Wagner war während dräi Legislaturen, iwwer 14 Joer laang, Member vun der Chamber. De gebiertege Wormer Jong koum aus engem „politeschen Nascht“, wéi hie selwer säi fréit politesch Engagement erkläert huet. Säi Papp, den Dokter Charel Wagner, war en iwwerzeegte Liberalen a joerzängtelaang Deputéierten.

Viru senger politescher Karriär hat de Carlo Wagner an der Schwäiz Ekonomie a Sozialwëssenschafte studéiert an eng Zäit an enger Bank als Soudirekter am Private Banking geschafft. 1970 ass de Carlo Wagner Member vun der Demokratescher Partei ginn. Mat 16 Joer hat hie sech an der Jeunesse Démocratique engagéiert an ass spéider President vun der JDL, President vum DP-Bezierk Osten an 1991 Generalsekretär vun der Demokratescher Partei ginn.

1994 gouf den DP-Politiker eng éischte Kéier an d'Chamber gewielt. Fënnef Joer drop gouf hie Minister fir Gesondheet a Soziales. 2004 ass hien erëm an d'Chamber komm, bis hie sech 2013 ganz aus der Politik zrëckgezunn huet.

Säi ganzt Liewen ass enk mam Oste vum Land a virun allem mat senger „Heemechtsgemeen Wormer“ verbonnen. Als hire „Borgermeeschter“ huet de Carlo Wagner vun 1994 bis 1999 d'„Rieslingsgemeen“ gepräagt a vill Weiche fir d'Zukunft gestallt.

Als Ostdeputéierte louchen dem Carlo Wagner besonnesch d'Landwirtschaft, an do virun allem de Wäibau, mee och de Mëttelestand an déi ländlech an touristesch Entwécklung um Häerz.

De Wormer Jong war e villfältegen a villsäitege Mënsch an ëmmer no a gär bei de Leit. Hien huet sech mat den Theeme beschäftegt, déi d'Leit beweegt hunn, an hat ëmmer een oppent Ouer fir d'Suerge vu senge Matmënschen.

De Verstuerwenen huet sech duerch seng Hëllefsbereitschaft, seng Jovialitéit, säin Humor, säin Temperament, seng Gesellegheet a säin Optimismus ausgezechent. A senger Fräizäit huet hie gär Zäit mat senger Famill verbruecht, huet gär gelies a sech fir Sport interesséiert a beegesichert. Sou war hien zum Beispill President vum Cercle athlétique de l'Est Gréiwemaacher a Spiller an duerno treie Supporter vum FC Koeppchen Wormer. Aner Leidenschaft waren den Tour de France a Frankräich. De Carlo war och e groussen Déierefrënd. Et huet een hien oft mat sengen Hënn dobause gesinn.

Um mënschleche Plang ëmmer sympathesch, um politesche Plang ëmmer korrekt, um gesellschaftleche Plang en interessante Géintiwwer, am Veräinsliewen ëmmer interesséiert an engagéiert, als Parteimënsch, Lokalpolitiker, Deputéierten a Minister fläisseg an effikass: Mam Carlo Wagner verléiere Wormer an de ganzen Osten eng Perséinlechkeet, déi sech hirer „Gemeen“, der Muselregioun an der Landespolitik mat Läif a Séil verschriwwen hat.

Och d'Demokratesch Partei muss engem vu hire Groussen Äddi soen, engem Kolleeg, dee sech vu jeehier agesat huet fir seng Iddien a seng Iwwerzeegungen. De Carlo war e patente Kärel, e Frënd, dee mir vill vermëssen. Deen „Nae schweeetzt elo kee Wormer méi“, mee mir wäerten de Carlo a beschter Erënnerung behalen.

Senger Famill, virun allem senger Fra a sengen dräi Kanner, op déi en esou stolz war, wëll ech am Numm vun der Chamber eist déift Matgefill ausdrécken.

Ech géif lech elo bieten, ee Moment opzestoen, fir dem Verstuerwenen eng lescht Eier ze erweisen.

(**Respect d'une minute de silence**)

Ech soen lech Merci.

Ech géif dann d'Wuert un den Här Premier- a Staatsminister Xavier Bettel ginn.

■ **M. Xavier Bettel**, *Premier Ministre, Ministre d'État*.- Merci, Här President. Ech wëll am Numm der Regierung der Famill, dem Marie-Paule, dem Charel, dem Eric an dem Valérie an hire respektive Partnerinnen a Kanner, och eist déifst Matgefill zum Ausdrock bréngen.

De Carlo war „iser een“: iser een als DP-Member, iser een an der Chamber, wou ech 1999 d'Chance hat ze sinn als jonken Deputéierten an hien an der Regierung, a wou eis Weeër sech 2004 op de Bänke vun der Opposition zesummeefonnt hunn.

De Carlo wor en Éierlechen, ee riichteraus. En huet et gesot, e wor net ëmmer dee gréissten Diplomat, mee et woussst een, wou een dru war mam Carlo, an dat ass an der Politik ganz wichteg. Et wor en engagéierte Mënsch. Et wor e Mënsch, deen, an ech hunn et scho gesot, seng Famill immens gären hat. En huet mer ëmmer gesot: „O, dat muss ech awer mam Marie-Paule schweetzen.“ Oder mat de Kanner wollt e vill Pläng hunn.

Ech hat en nach viru Kuerzem um Telefon, wou e mer gesot huet: „Xavier, ech sinn däi Büro elo nach ëmmer net kucke gaangen, säitdeem s de geplënnert bass.“ En hat nach esou vill vir. Mir wäerten e vermëssen! D'Demokratesch Partei verléiert e Member. D'Lëtzebuerger Regierung verléiert en engagéierten Exregierungsmember. D'Chamber verléiert en Engagéierte fir den Osten, en Ambassadeur vun de Spécificité-localen.

Mee mir verléieren alleguerten en éierleche Bierger, an Äre Mann an e Papp, a Wierder ersetzen dat ni. Dowéinst, Dir sollt just wëssen, dass Der op eis ziele kënt an dass kee vun eis wäert de Carlo vergiessen!

■ **M. Fernand Etgen**, *Président*.- Merci villmools dem Här Premier- a Staatsminister.

5. 7768 - Projet de loi portant modification de la loi modifiée du 17 juillet 2020 sur les mesures de lutte contre la pandémie Covid-19

Mir kommen elo zum Projet de loi 7768, enger Ofännerung vum Gesetz iwwer eng Rei Mesuren am Kader vun der Covid-19-Pandemie. D'Riedezäit ass nom Modell 1 festgeluecht.

An ech géif direkt d'Wuert un de Rapporteur vum Projet de loi, den honorabelen Här Mars Di Bartolomeo, ginn. Här Di Bartolomeo, Dir hutt d'Wuert.

Rapport de la Commission de la Santé et des Sports

■ **M. Mars Di Bartolomeo** (*LSAP*), *rapporteur*.- Merci, Här President. Et ass ganz schwéier, no deem Hommage zur Dagesuerdning iwwerzegoen, insbesondere fir en och fréiere Gesondheitsminister, dee mat deem deemools „naue“ Minister déi eng oder aner méi haart Diskussioun hat. Fir de Carlo Respekt, fir d'Famill Bäileed, éierlecht Bäileed!

Merci, Här President, dass ech däréif mengem, wéi soll ech soen, mengem Kolleeg, wou mer ëmmer probéiert hunn, fair ze sinn, an op der Saach gestriden hunn, Äddi soen. Äddi Carlo!

Här President, Dir Dammen an Dir Hären, Kolleeгинnen a Kolleegen, wann een d'Verlängerung vum État de crise viru bal engem Joer an dat éischt Covidgesetz, dat sech aus zwee Deeler zesumme-gesat huet, matzielt, dann ass et haut déi 13. Kéier, dass ech lech am Numm vun der Gesondheits- a Sportskommissioun de Rapport zu engem Covidgesetz virstellen.

A wann ech e Wonsch fräi hätt, da géif ech mer wënschen, dass et déi leschte Kéier wär, dass ech an där Eegeschaft virun lech stinn. Mee leider, leider hu mer keen Harry Potter, deen de Virus, deen eis weiderhi fest am Grëff huet, kéint ewechzaberen. Am Contraire erweist sech dee Krankmécher als e ganz geféierleche Verwandlungskënschler, dee mer, soulaang mer net esou vill wéi noutwendeg geimpft hunn, nëmme mat engem strikten An-hale vun de bekannte Schutzmoosssname kënnen wierksam bekämpfen.

Dat heescht also, d'Moosssname kënnen net labbergelooss ginn. Et heescht net, manner oppassen, mee, opgrond vun där Verwandlung vum Virus, éischerter méi oppassen. An duerfir komme mer net derlaanscht, fir déi Restriktiounen, déi ouni dat neit Gesetz de Méindeg géifen auslafen, ze verlängeren. Dat ass also d'Haaptzil vum Gesetzesprojet 7768. Bis mer zu där Normalitéit zrëckfannen, déi mer eis alleguer wënschen, hu mer also nach e gutt Stéck Wee virun eis. Dat weisen eis d'Zuelen, déi zwar an der Lescht méi oder manner stabill op engem héijen Niveau waren, mee awer weiderhin interpelléieren, virun allem och, wa mer ronderëm eis kucken.

D'Zuele bleiwen also héich. Och wann den Drock an de Spideeler nogelooss huet, ass en nach ëmmer do. Et stierwen nach ëmmer Leit un deem Virus an et gëtt wierklech kee Grond, fir, wéi de Fransous seet, « baisser la garde ».

De Risiko, dass d'Situatioun, déi méi oder manner stabill ass, kéint kippen, ass a bleift reell, dat opgrond vun zwee Elementer: Déi méi héich Infektionszuele bei de Kanner a Jonken am Verglach zu där éischerter Well - d'Verbreedungs- an Ustiechungs-geschéie geet méi séier, duerfir och virun zwou

Wochen d'Schleissung vun de Schoulen an de Strukture ronderëm d'Schoul ;- déi zweet Gefor läit ganz kloer an deenen neie Mutanten, Varianten, déi jo méi ustiechend solle sinn an duerfir riskéieren, mat enger gewësser Verzögerung zu Ustiechungen, méi schwéiere Krankheetsverleef - jee nodeem, wat fir engem Expert een nolauschtert - an erëm méi Hospitalisatiounen ze féieren.

Also d'Zuelen um Terrain sinn net allze vill berouegend, wann och weesentlech besser wéi Enn des Joers. Och wann d'Gesetzer Wierkung gewisen hunn, och wann d'Leit an hirer iwwergrousser Majoritéit mat ugepaakt hunn, mussen mer weiderhin „auf der Hut“ sinn, wéi een dat op Däitsch géif soen, mussen mer weiderhin upaken, mussen mer weiderhi Gedold hunn an däréi mer net opginn an där Ausenansetzung mam Virus.

Fläicht ass et awer och wichteg, drop hinweisen, wat bei der Verlängerung vum Gesetz bleift: All déi Moosssnamen am private Beräich - maximal zwou Persounen aus deem selwichte Stot, déi op Besuch kënnen kommen, de Couvre-feu vun 23.00 Auer bis 6.00 Auer mat deene bekannten Exceptiounen ; Kultur, Sport a Commercë bleiwen op mat deenen noutwendegen Limitatiounen; den Horeca-Secteur zou - jo, dat deet eis alleguer wéi, net esou wéi wéi deenen, déi direkt betraff sinn, mee et deet eis wéi, an duerfir probéiere mer jo, zesummen dat Beschte ze maachen, fir hinnen ënnert d'Äerm ze gräifen; mee dat ersetzt awer net déi Aarbecht an deene Strukturen, déi se gär géife maachen, mee am Moment gëtt et keng Alternativ dozou, wéi dass mer bei där Solutioun bleiwen, déi mer am Moment hunn ;- Interdiktioun, fir Alkohol op der Voie publique ze consomméieren; déi bekannte Limitatiounen bei Rassemblementen.

Déi Ännerungen, déi dat neit Gesetz bréngt, limitéiere sech op dräi Beräicher: Datenerhiewung an Dateschutz bei den Impfungen, de Sport an déi do-mat verbbonne Virsiichtsmoosssnamen an de Beräich vun der Éducation nationale de l'Enfance et de la Jeunesse.

Bei der Datenerhiewung am Kader vun der Impfcampagne war eng ganz staark Demande vun der Kommissioun do, dass mer net méi Date géifen halen, wéi et noutwendeg ass, an net méi laang wéi noutwendeg. Dorop ass vun der Regierung reagéiert ginn, an der Kommissioun ass dat begutacht ginn a mer konnte feststellen, dass déi nei Reegelung deene Krittären entsprécht, dass mer déi Daten do halen, wou se noutwendeg sinn, esou laang, wéi mer se brauchen, fir kënnen ze retracéieren, wann et, a seelene Fäll, zu Komplikatiounen bei den Impfungen kënn, an dat am Interêt vun deene Geimpften - deene Geimpften!, dat ënnersträichen ech, eng Datenopnam vun deenen, déi geimpft ginn, effektiv geimpft ginn an net vun deenen, déi net geimpft sinn oder sech net wëllen impfe loossen. Dat nennt ee Moosssnamen am Kader vun der Pharmacovigilance. An d'Datespäicherung, déi geet vun e puer Deeg bis zu 20 Joer, do wou et e Sënn ergëtt, fir kënnen ze retracéieren, wat d'Ursaache vun eventuelle Komplikatiounen kéinte sinn.

Et gëtt och eng ganz Rei vu Bestëmmungen iwwert den Traitement vun deene verschiddene Kategorie vun Donnéeën, an ech géif lech bieten, den Detail am schrëftleche Rapport, deen do ganz ausféierlech ass, nozeliesen.

Mir hunn an dësem Gesetz och d'Personnes à vacciner méi kloer definéiert. Och wann et an den Ae vum Staatsrot bei där bisheereger Formulatioun kloer war, dass et ëm déi Leit geet, déi sech vaccinéiere loossen, ware mir der Meinung: « Ça va mieux en le disant. » A mir hunn duerfir ënnerstrach, dass et sech bei de Personnes à vacciner ëm déi handelt, déi geimpft ginn.

Mir hunn och méi prezis definéiert, wat déi zousätzlech Leit ugeet, déi Zougrëff op déi Impfdaten hunn.

Da gëtt beim Sport den negativen Antigen-Schnelltest obligatoresch, oder gëtt de Schnelltest obligatoresch, a fir kënnen ze spillen, muss dee Schnelltest negativ sinn. Och fir u Kompetitiounen deelzehuelen. Dat betrëfft d'Sportler an d'Athleeten, hir Betreier, d'Traineren, den technesche Staff an och aner Persounen, déi um Bou stinn, an och d'Arbiteren an d'Jugen, déi am Kontakt mat de Sportler sinn. Ënnert dës Bestëmmung falen all Kompetitiounen oder kompetitiv Sportsmanifestatiounen, Matcher, Coursen, Championnater, Meetings, Kriterien an esou weider.

Ze betounen ass, dass dëst am Prinzip fir all Sportart gëllt, wou Kompetitiounen am Moment duerch dëst Gesetz erlaabt sinn. Et ass also op där enger Säit eng Contrainte, mee et ass op där anerer Säit eng Contrainte, déi opgrond vun enger Öffnung decidéiert ginn ass. Et ass also schonn eng Ausnam, dass déi dote Kompetitiounen alleguer kënnen stattfannen, mat Oplagen, déi elo preziséiert ginn.

De Staatsrot hat gemengt, dass d'Federatiounen jo souwiesu alleguer do dermat d'accord wieren. Mee et ass awer besser, wann dat hei am Gesetz festgehalten ass, da weess jiddwereen, wou en drun ass.

An ech hunn de Moien nach mat engem vun eise Spëtzesportler geschwat, deen ech an der Piscine begéint hunn, an dee mer gesot huet: „Dat do ass fir eis ewell Normalitéit.“ Ech war ganz fréi an der Piscine.

Wann en negative PCR-Test vu manner wéi 72 Stonne virläit, muss natierlech net nach e Schnelltest gemaach ginn. Ass awer de Schnelltest positiv, da gëtt nach e PCR-Test gemaach an duerno, wann deen och positiv ass, da kommen déi normal Prozeduren, wéi se bei all dësen Tester gemaach ginn, dat heescht: Tracing, Quarantän, Isolatioun an, an, an ... a wat alles do dermat verbonnen ass.

An da kommen ech bei déi zweet Moosssnam, net ouni awer ze ënnersträichen, dass déi Testserie eng Rei vu Veräiner, eng Rei vu Federatiounen virun deen een oder anere Problem stellt. Mee do ass festgehalten, dass de Ministère, dass d'Regierung do mat upaakt, wou et noutwendeg ass.

Wichteg ass dann och, dass, wann den normale Presenzunterrecht elo erëm agefouert gëtt, de Sport bei de Kanner an de Veräiner erëm weidergefouert ka ginn, natierlech ënnert de Konditiounen, déi aktuell am Covidgesetz festgehalen sinn, also maximal zéng Leit mat all Kéier zwee Meter Distanz, déi mussen agehalen ginn, respektiv dann och d'Gréisst vun de Raimlechkeeten. Dat heescht jo dann och, dass ab e Méindeg - wou d'Gesetz a Kraaft trëtt, wann et e Sonndeg verëffentlecht gëtt -, wa jo dann den normale Schoulbetrieb erëm wäert ulafen, de Veräinssport bei de Jugendlechen ënner 13 Joer ënner bestëmmte Konditiounen erëm ka stattfannen.

Da sinn ech bei deene Moosssnamen, déi de Sport betreffen, wann d'Grondschoulen zougemaach ginn: Do kënn den Automatismus, dass, wann d'Schoulen zougemaach ginn, dann automatesch och de Sportbetrieb fir d'Veräiner zou ass.

Da kommen ech bei dee leschte Volet. Am Beräich Educatioun, Enfance a Jeunesse war ursprënglech am Projet de loi virgesinn, d'Identifikatioun an de Fonctionnement vu Structures d'accueil de dépannage festzeschreiwen. Dës Bestëmmung gouf gestrach no enger Opposition formelle vum Staatsrot, dee bemängelt huet, dass mir, de Legislateur, net kéinten engem Minister de Pouvoir ginn, fir eng Ausnam zu enger Decisioun vun der Regierung ze maachen, wann déi de legale Kader duerfir huet.

Mir kruten vum Ministère och d'Informatioun, dass et och ouni dës Bestëmmung am Gesetz weiderhi méiglech ass, esou Depannagestrukturen ze identifizéieren a fonctionéieren ze dinn opgrond vu Konventiounen iwwert d'ASFT-Gesetz (ndlr: Activités sociales, familiales et thérapeutiques ; loi du 8 septembre 1998 réglant les relations entre l'État et les organismes œuvrant dans les domaines social, familial et thérapeutique).

Vill Froe goufen opgeworf am Zesammenhang mat deene verschiddenen Derogatiounen zu besteende Gesetzter bei Behëllefinfrastrukturen, wien do d'Responsabilitéit hätt, wann et zu engem Incident géif kommen. Do krute mer verséichert, dass, wa Gemengen do beträff wären, déi net géifen am Reestoe gelooss ginn, an datt do och Konventiounen kéinten ofgeschloss ginn, wann d'Gemengen dat wëilten.

Déi heite Reegelung, déi kënn am Fall, wou zousätzlech Strukture gebraucht géife ginn, dee Moment, wou méi Ustiechungen ënnerwee wären. Dat Gesetz reegelt och déi Situatiounen, wou zousätzlech Personal ka rekrutéiert ginn, respektiv op de Pool vun der Education nationale respektiv dem Jugend- a Schoulministère kann zrëckgegraff ginn.

Dann, mengen ech, wär et un der Zäit, fir kuerz drop anzegoen, wat fir ee Wee dësse Projet gemaach huet: Depot den 12. Februar, also virun enger Woch; déi éischt Kommissiounssëtzung dee leschte Méindeg; Avis vum Staatsrot de leschte Mëttwoch; dee selwechten Dag zweet Kommissiounssëtzung fir den Examen vun Avis vum Conseil d'État; Explikatiounen vun deenen dräi Ministeren; de Rapport ass geschter ugeholl gi mat de Stëmme vun der Majoritéit; eng ganz Rei vun Avise sinn erakomm, déi Der och detailléiert resuméiert fannt am schrëftleche Rapport.

Alles an allem - an ech wëll dat ënnersträichen -, och wa bei der Ofstëmmung iwwert de Rapport eng Ofstëmmmajoritéit vis-à-vis vun der Opposition war, oder Majoritéit géint Opposition - ech gebrauchten dat Wuert net ganz gär, well souwuel Majoritéit wéi Opposition ganz effikass un dësem Gesetz matgeschafft hunn -, also och, wann et aacht zu siwen ausgaangen ass, gouf et keng Stëmmen, déi gesot hunn, dass mer dat Gesetz hei net géife brauchen. Et gouf keng Stëmmen, déi gesot hunn: „Mir sinn an enger Situatioun, wou mer kënnen labberloossen.“ Dat heescht, do ware sech Majoritéit an Opposition eens, dass mer dat Gesetz hei brauchen.

Zum Schluss bleift mer nëmmen nach, jiddwereengem Merci ze soen, deen hei matgeschafft huet ënnert deene bekannten haarde Konditiounen. De Rapport ass „just in time“ fäerdeg ginn, de Staats-



rot-Avis ass „just in time“ fäerdeg ginn. An do sinn e ganze Koup kleng Ekippen, déi ganz vill geschafft hunn.

Merci, mäi Respekt, mäi Respekt och op dëser Tribün fir eist gutt Chamberspersonal, dat sech an dëser Kris ëmmer erëm iwwertrëfft. Här President, wann Der wëllt dee Merci weiderginn. Mir hu gutt Ekippen.

An ech soen lech Merci, dass Der mer nogelauschtert hutt.

■ **Plusieurs voix.**- Très bien!

■ **M. Fernand Etgen, *Président.***- An ech soen dem Här Rapportier Mars Di Bartolomeo villmools Merci.

An ech ginn d'Wuert weider un den éischten ageschriwwene Riedner, den honorabelen Här Claude Wiseler. Här Wiseler, Dir hutt d'Wuert.

Discussion générale

■ **M. Claude Wiseler (CSV).**- Merci, Här President. Ech wëll ufänken, andeem ech och dem Rapportier villmools Merci soe fir déi Aarbecht. Et ass fir d'13. Kéier! Ech weess, datt dat net evident ass, mee et ass awer och fir d'13. Kéier, wou mer dat an deene richtegen Delaien iwwert d'Bün kréien, an dat ass haut awer och schonn, muss ech soen, e besonnesche Merci wäert, well et net ëmmer evident ass, dat alles esou hinzekréien.

Virun dräi Wochen hu mer och schonn e Gesetz am Parlament verlängert, d'Moossname verlängert, an déizäit waren d'Zuelen net gutt. D'Regierung huet gesot: „Mir verlängeren déi Moossnamen, well et noutwendeg ass, datt mer déi Zuelen nach méi erofkréien.“ Mir hu gesot: „Mir zweifelen drun, datt, wa mer just déi do Moossname verlängeren, datt mer d'Zuelen dann erofkréien.“

An haut stelle mer fest, datt mer den 28. Januar, dat war de leschte Mount, op eng Millioun Awunner héichgerechent 207 Neiinfektiounen haten; haut hu mer der 246, dräi Wochen duerno. D'Zuele sinn also net erofgaangen, mee eis Zuele si säit där Zäit eropgaangen, net exponentiell, Gott sei Dank, mee trotzdem eropgaangen.

Mir hunn hei de Risiko vun neie Varianten als CSV als enorm héich ageschat. Haut stelle mer fest, datt déi nei Variant an der Moselle, dat heescht an deenen Departementer vu Frankräich ronderëm eis, en extreem héije Prozentsaz huet. Mir hu regrettéiert, datt d'Regierung sengerzäit net mat op de Wee gaangen ass, fir nach méi preventiv Moossnamen ze huelen, wa Leit aus Géigende kommen, wou nei Varianten extreem héich sinn.

Haut ass eng vu mengen éischte Froen déi, datt ech wëilt d'Zuelen ...

Dir kënnt mer och direkt d'Fro stellen, Här Bettel, da kann ech se direkt beäntweren. Wann den Här Di Bartolomeo se stellt, kritt Der vläicht net d'Äntwert.

■ **M. Xavier Bettel, *Premier Ministre, Ministre d'État.***- Här President, wann den Här Wiseler selwer freet ... Déi éischt Saach ass: Dir hutt gesot, elo vu Varianten ... Heescht dat, dass Dir elo fir Tester op der franséisch-Lëtzeburger Grenz tëscht der Moselle a Lëtzebuerg sidd? Déi éischt Fro. An déi zweet Fro ass: Dir hat viru Woche gesot, et hätt ee missen aner Mesuren huelen, fir d'Zuelen erofzekréien. Wéi eng wieren dat da gewiescht?

■ **M. Claude Wiseler (CSV).**- Ma ech kommen zum Schluss vu menger Ried - vu datt ech elo eréischt eng Minutt geschwat hunn - selbstverständlech op all eis Propositionen zréck. Op déi éischt Fro evidenterweis: Mir hunn zum Beispill déi leschte Kéier virgeschloen, datt, wa Fligeren hei zu Lëtzebuerg landen aus deene Länner, wou Variante relativ heefeg sinn, datt mer da fir déi Leit niewent den Tester, déi gemaach ginn, och gär eng Obligatioun vun enger zäitweileger Quarantän hätten. Dat hu mer déi leschte Kéier virgeschloen.

■ **M. Xavier Bettel, *Premier Ministre, Ministre d'État.***- Dir hutt vun der Moselle geschwat.

■ **M. Claude Wiseler (CSV).**- Jo, ech hunn elo vun der Moselle geschwat, an op déi Fro kommen ech duerno nach eng Kéier zréck, op déi grouss regional Fro, well dat fir mech, mengen ech, an den nächsten Deeg, a fir lech och, eng essenziell wäert ginn, wéi mer mat eisen Nopeschlänner ëmginn.

Ech stelle just fest, datt déi nei Varianten an eisem noen Ausland extreem héich sinn. A meng Fro ass: Mir sinn nach ëmmer net gewuer ginn, wéi déi Variant hei zu Lëtzebuerg am Pourcentage doheem ass. Mir kruten ëmmer gesot: „Mir hunn zwar Resultater, mee déi sinn nach op engem Echantillon, deen net representativ ass.“ Dat ass awer elo schonn eng Rei Deeg a Wochen hier. Ech géif elo wierklech gär eng Kéier wëssen: Wéi sinn dann déi nei Variante schonn zu Lëtzebuerg etabléiert?

Drëttens: Mir hu virun e puer Wochen - mee net nëmme virun e puer Wochen, och scho virun e puer Méint -, scho fënnef-, sechsmol gesot, datt mer déi Moossnamen, déi an der Schoul geholl gi sinn, net géifen als genügend empfangen, datt mer déi Politik, déi do gemaach gëtt, als farlësseg géifen empfangen. An den 29. Januar ass déi leschte Kéier,

wou ech et hei op der Chambertribün gesot hunn. Dunn ass mer erkläert gi vun der Majoritéit, datt all déi Saachen net sënnvoll wäeren, déi mer hei fir d'Éducation nationale géife proposéieren. Dat war den 29. Januar. De 4. Februar, fënnef Deeg duerno, mécht den Här Meisch d'Schoulen zou a féiert se an den Homeschooling zréck.

Ech muss lech soen, ech verstinn net, wéi ee ka véier, fënnef Deeg virduen einfach all déi Propositionen, déi mer gemaach hunn, als net satisfaisant an onnéideg duerstellen, a véier, fënnef Deeg duerno muss een d'Schoulen an den Homeschooling zréckschécken. Dat liicht mer net an.

Mir hunn den 29. Januar hei eng Impfstrategie gefrot. Mir haten eng Diskussioun hei op der Chambertribün. Ech ka mech gutt erënneren, well et sinn och nach owes genau déi Extraite vun där Diskussioun bei RTL an den Noriichte komm. Ech hu gefrot, fir eng Impfstrategie op den Dësch ze leeën, wou mer net nëmmen déi zwou éischt Phasen, mee déi sechs Phase géife gesinn, fir datt d'Leit eng lwwersiicht géife kréien, fir datt se sech e weínege kéinten affilen an déi Perspektiven, déi se hunn.

De Premierminister ass opgestanen an huet mer gesot, dat géif hien net maachen, well hie kéint sech net iwwert déi nächst Wochen engagéieren an hie wëilt de Leit näischt versprechen, wat en duerno net kéint halen, an dat, wat mir géife froen, wär u sech inakzeptabel an net seriö. Dat ass dat, wat mer sengerzäit den 29. Januar freides vum Staatsminister op déi Proposition geäntwert kritt hunn!

Den 1. Februar, méindes, ass d'Madamm Lenert an enger Pressekonferenz dohinnergangaen an huet genau déi Impfstrategie virgestallt, dräi Deeg duerno! Do muss ech soen: Ech si wierklech frou driwwer, well ech et einfach als noutwendeg empfanen. Mee ech muss lech awer iergendwéi soen, datt s de als Parlamentarier, wann s de freides esou dohinnergestallt gëss, wéi wann s de vun näischt eppes géifs kennen, a méindes gëtt da genau dat gemaach, wat s de gefrot hues, an da gëtt et als normal empfonnt, da kënns de der awer e weínege domm vir.

■ **Une voix.**- Jo!

■ **M. Claude Wiseler (CSV).**- Fir et emol einfach auszedrécken.

■ **Une voix.**- Très bien!

■ **M. Claude Wiseler (CSV).**- E weínege domm.

An ech wëll elo net drop agoen, ech wëll just der Madamm Lenert soen, datt ech frou sinn, datt se sech einfach iwwert dem Premierminister seng Ausféierung ewechgesat huet.

■ **Une voix.**- Très bien!

■ **M. Claude Wiseler (CSV).**- Mee komme mer op d'Ausriichtung vun dësem Text zréck. Éischtens, déi Zuele si momentan méi héich wéi virun dräi Wochen: Den 28. Januar hate mer 207 Neiinfektiounen; haut hu mer, op eng Millioun Awunner héichgerechent - ech maachen dat ëmmer esou, well dat international besser vergläichbar ass -, haut si mer op 246.

Mee och am internationale Vergläich mat eisen Nopeschlänner leie mer net gutt do: Frankräich läit do zwar liicht méi héich, mir leien awer mat 246 - am Verglach zu England mat 181, zur Belsch mat 159 an zu Däitschland mat 87 - wierklech net gutt do. A souguer Amerika a Portugal - déi eng mat 232 an déi aner mat 224 -, déi haut awer dohinnergestallt gi wéi déi, déi Riseproblemer hunn, hunn am Fong haut héichgerechent manner deeglech Infektiounen, wéi mir der hunn.

Mir hunn och déi Zilsetzungen, déi mer eis gesat haten, net erreecht: Mir sollen ënner 150 Infektiounen den Dag bleiwen, den Taux de reproduction ënner 0,7, den Taux de positivité ënner 3 - déi Zilsetzungen hu mer an dësem Moment och net erreecht.

All national an international Gremie warnen nach ëmmer - net nëmmen zu Lëtzebuerg, mee och fir Lëtzebuerg - zur Virsiicht, och eis eege Gremien. De LIST huet och virun zwee Deeg nach eng Kéier seng Revue iwwert d'Kläranlagen erausginn, wou e seet, datt ee géif perceptibel gesinn, datt et lues géif an d'Luucht goen. Dat wär zwar nach net signifikativ, mee et wär awer och net onsignifikativ an et misst een oppassen.

An haut virun e puer Stonnen hunn ech de Professor Wilmes vun der Covid-19-Taskforce héieren, deen eis do relativ kloer an däitlech seet, datt ee misst enorm oppassen, datt eng drëtt Well riskéiert, virun der Dier ze stoen an datt senger Meinung no déi Moossname vun der Regierung net géifen duergoen.

Duerfir soen ech hei: Mir deelen d'Meenung vun der Regierung, datt et net Zäit ass fir opzemaachen, datt d'Gefore momentan ze grouss sinn, datt Virsiicht gebueden ass. Mir ënnerstëtzen also ausdrécklech d'Decisioun vun der Regierung, all déi Moossname weiderzeféieren. Mee mir soen: Déi Moossnamen, déi do waren, hunn et net erlaabt, d'Zuelen erofzesetzen, mee se sinn an deene leschte Wochen eropgaangen. Dofir stelle mer eis d'Fro,

ob déi Moossnamen duerginn, a mir sinn der Meenung, datt een zousätzlech Moossname misst huelen, op déi ech duerno zréckkommen.

Mir sinn awer frou, datt zu Lëtzebuerg dee spezifische Lëtzebuerger Wee, iwwert dee soss ëmmer geschwat ginn ass, definitiv vergiess ass. De Virus selwer kennt och kee spezifische Lëtzebuerger Wee. Mir sinn iwwerzeegt, a mir hunn dat och ëmmer gesot, datt Lëtzebuerg muss kucken, wat am Ausland ronderëm geschitt, datt mer fréier oder spéider déi selwecht Tendenzen hu wéi d'Ausland ronderëm an datt et dofir weesentlech ass, sech an de grousser Prinzipie mat der EU ofzeschwätzen, d'grouss Prinzipie vun de Politicken anzehalen, an datt een haaptsächlech am Detail mat der Groussregioun muss kucken, wéi ee seng Politik gemeinsam gestalt.

An dat ass d'autant plus noutwendeg, well eis Nopeschlänner jo reagéieren. Mir gesinn, wat Däitschland op verschiedenen anere Grenze gemaach huet, wann ech d'Tschechei oder Éisträich kucken, a mir gesinn och, wat fir eng dagdeeglech real Problemer do entstane sinn. Mir gesinn, wat an der Moselle lass ass.

A meng Fro ass natierlech och déi: Ech si jo sécher, Här Staatsminister, datt Dir och eng ganz Rei international Kontakter hat mat Däitschland, mat Frankräich an datt do och eng Rei Diskussiounen necessairement hu misse gefouert ginn, notament déi vun der Oppenheet an der Geschlossenheet vun de Grenzen, wann eis Wäerter weesentlech méi héich si wéi déi an Däitschland.

Ech wär frou ze héieren, wat Der eis duerno kënnt doriwwer soen, well ech ginn awer dervun aus, datt e gréissere Risiko besteet, datt mer Reaktiounen aus dem Ausland iergendzwousch kréien, wann déi Zuelen, déi mer zu Lëtzebuerg hunn, nach géifen an d'Luucht goen an haaptsächlech, wa mer Problemer hätte mat deenen neie Varianten, wann déi méi massiv géifen op Lëtzebuerg eriwierkommen.

Et ass net Zäit opzemaachen, aus sanitäre Grënn, aus laangfristegen ekonomesche Grënn, soen ech, awer och aus europäesche Solidaritéitsgrënn an aus ausepolitesche Grënn. D'Fro stellt sech: Ginn déi Moossnamen duer, déi mer elo hunn? Mir wëllen, an dat soen ech kloer, zousätzlech Moossnamen. An ech hunn et virdu schonn ugeschwat op d'Fro vum Staatsminister hin: Mir sinn der Meenung, datt déi Tester, déi um Flughafe gemaach ginn, net effikass si fir déi Leit, déi sech ugestach hu just een, zwee Deeg, ier se fortgeflu sinn, an datt et do noutwendeg wär, fir Leit, déi aus roude Gebidder komme respektiv Leit, déi aus Gebidder kommen, wou déi nei Variante relativ héich sinn, eng Quarantän vu siwen Deeg zu Lëtzebuerg virzeschreiwen.

D'ailleurs soen ech, datt d'Kommissioun och kloer an däitlech freet, datt systematesch Protektiouns-moossname fir deen Typ vun Areese géife gemaach ginn an datt all déi Leit, déi vun esou enger Rees kommen, sollen obligéiert sinn, a Quarantän ze goen an additionell Tester bei an no der Arrivée ze maachen. Dat ass en däitlechen a klore Wunsch vun der Kommissioun a mir verstinn net richtig, firwat d'Lëtzebuerger Regierung deem Wunsch net nokënn.

Mir hätten och gär hei zu Lëtzebuerg, datt mer eng effikass Politik vun de Schnelltester géifen definéieren. Wéini gi se agesat? Mir hate laang Woche mat der Madamm Lenert eng korrekt Diskussioun fir ze soen: Wat ass dann d'Valeur vun deene Schnelltester? Kënne mer eis drop verlossen? Kënne mer eis net drop verlossen? Ech hunn elo verstanen, datt déi awer vill méi prezis gi sinn, datt se elo zu engem Deel verlässlech sinn. Mir setze se jo elo och deelweis um Flughafen an. Mee ech fanen natierlech, datt een elo och misst definéieren, wou ee se dann nach ansicht kéint asetzen a wou se sënnvoll wäeren an där ganzer Politik.

An d'Fro zum Beispill an den Altersheimer ass fir mech eng normal Fro, ob een net kann, fir awer eng Rei Visitten ze erlaben, well déi eeler Leit heiansdo an enger Isolatioun liewen, déi schwiereng ass ... Mir wëssen et alleguer, well mer méiglecherweises Familljen esou kennen, datt mer et do systematesch mat Schnelltester wierklech kéinten erlaben. An ech géif et flott fannen, wann einfach déi Politicken esou géifen definéiert ginn, datt mer kloer an däitlech wësstens, wou mer do géifen higoen.

D'ailleurs froen ech ... - dat ass awer just eng Klammer a keng politesch Ausso vu menger Fraktioun -, ech froe mech och, wa mer fënnef, sechs Stonnen hei zesummen zu 60 bis 70 am Sall heibanne sëtzen a mer wëssen, datt mer zwar all Masken unhunn, mee datt sechs Stonnen e Mask unhalen en continu net ëmmer evident ass, ob et net och sënnvoll wär, hei d'Méiglechkeet ze ginn, Schnelltester ze maachen. Ech wëll dat elo net als Politik definéieren, ech wëll et just als Fro definéieren, well ech mer se oft stellen, wéi virsiichteg dat ass, wéi mir selwer domadder ëmginn. Mir musse selbstverständlech hei sinn, fir eis Aarbecht ze maachen, an et kann och keen eis empêchéieren, heihinner ze

kommen. Mee ech froe mech, ob et net sënnvoll wär, och dat virzeginn.

Dir wësst, datt mer nach ëmmer Problemer mam Curfew hunn. Dir wësst, datt mer och nach Problemer hu mat deene Froen oder mat deenen Obligatiounen, fir just zwee Leit vun enger Famill ze empfänken. Mir hätten do gär aner Modeller gehat, déi an eisen Aa mindestens grad esou effikass gewiescht wäeren.

Mee dat - an da kommen ech op ee vun den Hauptpunkten -, wat fir mech wierklech schwiereng ass, dat sinn déi Moossnamen an der Éducation nationale. Dofir sinn ech och frou, datt de Mëtten den Här Meisch hei ass, well ech hunn ëmmer gär, wa mer déi Diskussiounen kënnen de face à face féieren.

Do ginn et zwee Problemer: Dat Éischt, dat ass: Wat geschitt um Terrain? Wat sinn d'Moossname selwer? An dat Zweet ass: Wat ass déi juristesche Émsetzung vun deene Moossnamen? Ech muss soen, mir hunn an all deene Rieden, déi mer hei gehalen hunn, vill iwwert d'Éducation nationale geschwat. An ech hu ganz oft gesot, datt ech d'Politik, esou wéi se ëmgusat gëtt, als eng Feelaschätzung géif gesinn, well fir d'éischt de Minister gesot huet: „Et ass kee Problem an der Schoul, wann d'Kanner sech ugestach hunn, dann ass et anzousch anescht.“ Duerno ass gesot ginn: „D'Schoul ass wéi d'Gesellschaft, d'Kanner stieche sech un a kënnen aner Leit ustiechen.“ An haut ass d'Schoul ee vun den essentiellen Herden, wou Covid da present ass. An dat Hin-an-Hier an den Aussoen, muss ech éierlech soen, mécht d'Leit konfus, mécht d'Politik net kohärent an erlaabt och keng uerdentlech laangfristeg Virbereedung.

An et gesäit een och doranner, wéi u sech déi Decisioun vum Homeschooling geholl ginn ass vun engem Dag op deen aneren, ruckzuck, am Fong ouni Virwarnung an ouni Virbereedung. Elo seet de Minister: „Mee ech hunn déi misse schnell huelen.“ Ech verstinn dat och, datt een esou eng Decisioun heiansdo da muss schnell huelen. Dat, wat ech hei soen, datt ass, datt ech et awer sënnvoll fonnt hätt, wa schonn eng Rei Deeg oder Woche virdu gesot gi wär: „Wa mer eng Kéier esou Zuelen an der Schoul kréien, dann ass eis Reaktioun déi, fir den Homeschooling duerchzeféieren.“ Dann hätt ee schonn eng Virlafzäit gehat, ouni den Datum ze wëssen. Et hätt ee gewosst, wat hätt kënnen kommen, et wär ee virbereet gewiescht. An hei ass et wéi aus heiterem Himmel souwuel op d'Eltere wéi op d'Léierpersonal erofkomm.

An ech soen dann hannendrun, elo verstinn ech dee Wëllen, deen de Minister huet. Et ass a mengen Aen absolutt nozevollzéien, datt mer e Méinden erëm wëllen d'Schoulen opmaachen aus ville Grënn, soziale Grënn fir d'Kanner, wat och ëmmer, dat verstimer, dat akzeptéieren et och.

Mee ech soen, wa mer se wëllen opmaachen, da fannen ech déi Moossnamen, déi Der virgeschloen hutt an déi elo e Méinden a Kraaft trieden, an eisen Aen insuffisant. Dir sot, Maskepflicht iwwerall, Tester a Schnelltester, datt ass och okay, Kontroll vu Quarantänen ass och okay fir eis. Mee da sot Der, et kommen eng Rei aner Mesuren eréischt an enger zweeter, an enger drëtter Etapp, zum Beispill déi, fir de Secondaire quasiment komplett an A- a B-Gruppen ze maachen, zum Beispill déi, fir an de Maison-relais d'Kanner no Klasse besser ze trennen.

An do soe mir ganz kloer: Dat si Moossnamen, déi mir scho gär méi fréi gehat hätten, déi mer schonn an der Virbereedung gär esou gehat hätten, datt mer se den nächste Méinden alleguer kéinten asetzen, well mer mengen, datt do wierklech e Problem ass an datt déi Moossnamen, déi Der fir e Méindeg virschlot, net duerginn an datt Der déi Moossnamen, déi Der an deenen Etappen hannendrun envisagéiert, schonn hätt missen e Méinden a Kraaft setzen. An da feelen an Ärem Plang och eng Rei Iddien, déi mer och scho säit Woche soen. Dat sinn déi vun enger anerer Organisatioun vum Transport scolaire, vun engem Decalage vun den Horairë vun de Schoulen, fir also d'Bussen nach méi eidel ze kréien. Ech weess, datt Der se méi eidel kritt, wann Der A- a B-Gruppen aféiert. Mee ech fannen, datt den Decalage horaire aus sanitäre Grënn duerchaus sënnvoll gewiescht wär. An dat selwecht gëllt fir d'Ventilatioun an d'Equipement an de Klassen, déi mer schonn eng ganz laang Zäit froen.

An da muss ech lech soen, Dir annoncéiert elo, Här Minister, datt Der elo amgaang sidd, e Guide fir den Homeschooling auszeschaffen. An do soen ech lech awer éierlech: Elo si mer néng Méint an där Kris hei a mir wëssen, datt dat do eng Méiglechkeet ass. Mir wëssen, datt den Homeschooling méiglecherweis op eis zoukënn. An da muss ech éierlech soen: Ech verstinn net, firwat Der dann elo ufänkt, e Guide auszeschaffen, fir Homeschooling ze organiséieren. Dee misst dach scho fir e Méindeg laang um Dësch leien. Dee missten d'Enseignantë scho virun der Vakanz kritt hunn, fir datt se sech uerdentlech kënnen op Basis vun deene Guidelinë virbereeden. Ech verstinn net, firwat dat net schonn elo do läit!



An ech fannen, datt Der am Allgemengen an der Schoul eng Politik maacht, déi éischter eng reaktiv Politik a keng preventiv Politik ass. Dir sot: „Mir setzen eng Rei Moossnamen an, wa mer de Virus massiv an der Schoul hunn.“ Dat heescht, Dir waart drop, bis en an der Schoul ass a wann e bis do ass, reagéiert Der. Ech fannen, datt ee wierklech misst déi Moossname virzéien, fir datt en net kann an d'Schoul kommen, well ech mengen, dat ass d'Basiss, de Grond vun enger effikasser Politik.

An da kommen ech zu deem anere Punkt: eng ganz Rei Onzoulänglechkeeten, déi momentan an deem Gesetz sinn, respektiv déi net am Gesetz ugeschwat ginn iwwert déi Moossnamen, déi Der a Kraaft setzt. Ech wëll do ganz kuerz siwe Punkten opzielen, déi mer awer Problemer stellen.

De Conseil d'État huet eis op Basis vum Artikel 76 vun der Constitution opgrond vun Ingerence vum Legislativ an den Exekutiv en Artikelerausgeholl, deen d'Schoul betraff huet an deem Gesetz. Dat erlaabt eis als Chamber an dem Conseil d'État, net iwwert de Prinzip ze schwätze vun deem Artikel. Mee trotzdem stelle sech eng Rei Froen. An et ass fir d'éischt, wou Der an engem SantésGesetz méi grondleeënd Educationsartikele maacht. Dofir wëll ech déi Fro opwerfen ..., all déi aner Decisiounen, déi Der elo huet, ob dat déi vun de méigleche Suspensiounen oder déi vun den A- a B-Gruppen ass, wëll ech einfach froen, op Basis vu wat fir engem Gesetz se geholl ginn, duerch wat fir eng Acte-administratif se geholl ginn.

Mir wëssen alleguer heibannen, well mer domadder ze dinn hunn, datt d'Éducation nationale eng Matière réservée à la loi ass, Artikel 23 vun der Constitution. Alles muss also am Gesetz respektiv am Règlement gereegelt ginn. Ech hunn awer hei d'Impressioun, datt eng Rei grondleeënd Organisationsfroen an der Educationspolitik iwwert d'Cirulaire un den Direkter gereegelt ginn, deen dann am Kader vu senger Autonomie gefrot gëtt, dat esou ze maachen, wéi hien dat fir richtig empfënnt, an dat deelweis iwwert dat, wat d'Reglementer an der Organisation scolaire effektiv zouloossen.

Elo kann den Direkter an der Autonomie eng Rei Saachen decidéieren, mee e muss sech awer ëmmer am Kader vun deem, wat an de Règlementer festgeschriwwen ass, halen. Dofir ass eis kloer Fro: Wéi ass dat dann effektiv gereegelt? Wou ass d'gesetzlech Basis, haaptsächlech an notament fir d'Lyceën? Op déi Fro, déi mer ëfters scho gestallt hunn, krute mer momentan nach keng zefriddestellend Äntwert.

Zweet Beispill: Den Artikel 4 (8) vum Gesetz, wat mer haut stëmmen oder wat mer haut erneieren, seet, dat de Port du masque beim Rassemblement deelweis obligatoresch ass, ausser fir d'Schoul. Dat Gesetz vun haut gesäit also extra, wat de Port du masque ugeet, eng Ausnam fir d'Schoul vir.

Elo féiert de Minister awer eng Maskepflicht an der Schoul an. Dann ass meng Fro: Wou ass dat da festgehalen? Ech si jo 100%eg d'accord mat der Moossnam. Mir hu se méi wéi eng Kéier gefrot. Mee an deem Gesetz, wat mer haut verlängeren, steet am Fong, datt d'Schoul déi Pflicht net huet. Elo féiert Dir se iwwer Circulaire awer an. Also ech mengen, d'Schoul ass vläicht anescht wéi de Rescht vun der Gesellschaft, mee juristesche kënne mer awer keng Ausnam maachen. Dat muss awer alles kloer an däitlech a propper juristesche gereegelt sinn.

Mäin drëtt Beispill ass dat vun der Fermeture vun der Structure-d'accueil. Dat gesitt Der als Méiglechkeet vir, net nëmmen am Secteur public, mee och am Privatsektor. Or ass d'„Liberté du commerce“ awer eng konstitutionell Fräiheet, déi festgehalen ass. D'„Liberté de faire du commerce“ gëtt awer heimadder a Fro gestallt, aus gudde Grënn zwar an ech ginn lech och Recht mat der Moossnam, mee ech soen awer kloer: Wa mer konstitutionell Fräiheeten ausser Kraaft setzen, da kann dat awer nëmmen iwwert d'Gesetz goen - da kann dat awer nëmmen iwwer d'Gesetz goen!

An dofir ... Dir hutt mer op déi Fro geäntwert: „Jo mir maache jo keng Fermeture“, obwuel dat ëmmer anescht gesot ginn ass, „mir dierfe keng Fermeture vun deene Strukturen maachen, ech gi jo just“, sot Der, „eng Recommandatioun, datt se zoumaachen. Ech recommandéieren, datt se zoumaachen a si gi jo dofir bezuelt.“ Mee da sot Der hannendrun: „Déi, déi awer net zoumaachen, déi kënne sech awer direkt erwaarden, datt de Santésdirekter eng Ordonnance hëlt, duerch déi se dann de facto einfach zougemaach ginn.“

Da muss ech lech soen, wann dat do d'Fonctionnement vum Rechtsstaat ass, wann Der sot: „Ech ginn eng Recommandatioun; Dir hutt wierklech besser menger Recommandatiounen nozogen, soss kënnt de Santésdirekter mam decken Hummer a mécht lech zou.“ Esou ass et net, wéi ech mer d'Fonctionnement vum Rechtsstaat virstellen! An ech wär frou, och eis Justizministesch eng Kéier driwwer ze héieren, well déi huet e gutt Gefill fir de Rechtsstaat an ech wëll eng Kéier vun hir wëssen, wat se da vun där doter Applikatioun vum Lëtzeburger Rechtsstaat hält.

Mäi véierte Punkt, dat ass den Artikel 4bis Punkt 6. Do geet et ëm de Sport. An do ass d'Situatioun déi, datt mer u sech e Gesetz hunn, wat seet, oder wat sech eng Base légale schaaft, fir fräiwëlleg Amateursaktivitéiten zouzemaachen. Ech fannen dat richtig, datt mer dat am Gesetz schreiwen. Dat heescht, déi Veräiner, déi u sech Kanner ënner 13 Joer betreien, dierfen, wa kee Présentiel méi an der Schoul ass, och keen Training méi halen. Ech fannen dat fundamental richtig op där enger Säit, mee op där anerer Säit seet d'Éducation nationale dann, datt mer fir constitutionell garantéiert Liberté keng Base légale brauchen, mee do iwwert déi Recommandatiounen fieren.

Beim Sport gëtt et esou gereegelt, bei der Éducation nationale gëtt et esou gereegelt. Elo muss ech awer soen, ech hätt awer gär, datt d'Regierung wéisst, wat fir ee Wee se wëllt aschloen, datt se et net eng Kéier esou mécht an eng Kéier anescht mécht. Mee genau dat hunn ech awer d'Impressioun, datt momentan amgang ass, an der Regierung ze geschéien. Jiddweree mécht dat à peu près esou, well en et wëllt a wéi en et als richtig empfënnt, ouni datt do déi noutwendeg Koordinatioun hannendrun ass.

Fënnefte Punkt: Den Artikel 7 vun deem Gesetz, dee gesäit vir, datt mer Quarantänen an Isolémente kennen hunn. An deen Artikel gëtt et säit siwe Méint vir - scho méi laang, well en och an dem Text stoung, dee mer am État de crise haten, also quasiment säit néng Méint. Contrairement zu deem, wat am Artikel 4 virgesinn ass, ass am Artikel 7 keng Exceptioun fir d'Schoul virgesinn. An deen Artikel ass also applikabel fir d'Schoul. Dat ass eis och vum Educationsminister confirméiert ginn.

Elo kënnege den Educationsminister als grouss nei Moossnam fir den nächste Méinden un, datt mer elo eng Kontroll maachen no der Quarantän, wann e Kand wëllt no sechs Deeg an d'Schoul zrëckkommen. Ech fannen dat och absolutt richtig, datt dee Contrôle gemaach gëtt. Mee ech froen lech awer kloer ... Dat Gesetz, wat mer elo hunn, dat ass awer scho säit néng Méint applikabel, dat misst also scho säit néng Méint esou applizéiert ginn. A wéi ass et da méiglech, datt d'Éducation nationale säit néng Méint den Text net anhält an dat elo als nei grouss Moossnam verkeeft, datt mer vun e Méinden un d'Gesetz respektéieren? Da stellen ech mer awer eng Rei Froen!

■ **Une voix.** - Très bien!

■ **M. Claude Wiseler** (CSV). - Firwat vun e Méinden un? Ech fannen et richtig. Ech fannen, datt et scho laang misst lafen. An da sot Der och nach hannendrun op déi Fro, déi mer da stellen: Wien huet dann d'Recht dee Certificat, wa Kanner zrëckkommen, ze kontrolléieren? Da sot Der: „Ma do änneren ech nach de Règlement grand-ducal vun 2004 iwwert d'Règles de conduites an d'Lyceën, fir datt mer eis do déi noutwendeg Base légale ginn. Och dat fannen ech richtig.“

Mee da soen ech, da misst dat jo fir e Méinden am Prinzip schonn a Kraaft sinn. Well e Méindeg leeft jo déi ganz Reform do un. An ech sinn da sécher, datt Der d'Urgence wäert ufroen, fir dat Règlement iergendzwoosch relativ terminno a Kraaft trieden ze loosse. A wann Der Jo sot, Dir frot d'Urgence un, da soen ech lech: Mee wéi kënnt Der dann d'Urgence ufroe bei engem Text, deen Der am Fong säit siwen oder néng Méint schonn hätt misse gemaach hunn, a wou d'Urgence am Fong just doranner besteet, datt Der e bis elo nach net gemaach hutt a bis e Méindeg braucht? Dat ass net déi Definition, déi an eisen Texter fir d'Organisatioun vun der Urgence steet.

Mäi sechste Punkt, dat ass een, dee méi de Sport concernéiert. Dat ass eng Fro. Elo gëtt en Test gefrot fir déi professionell Sportler, déi Matcher wëlle spillen. Ech fannen dat och richtig. Mee d'Situatioun ass déi: Du kriss elo vum Gesetz gesot, du misst en Test maachen - notament fir professionell Spiller -, fir dāi Beruff kënne auszeüben, fir also dee Match kënne matzespillen, an du muss dengem Patron, dem Veräin dat weisen.

Dann ass fir mech d'Fro: Wéi ass et da fir aner Beruffer, déi vläicht grad esou exposéiert si wéi Fußball- oder Basketspiller? Ass dat hei dann net fir aner Beruffer och e Präzedenzfall? Wéi ass et mat der Égalité devant la loi? An dat ass fir mech eng grouss aarbechtsrechtlech Fro, déi mer awer misse klären an op déi mer och, och wa mer et nogefrot hunn, keng satisfaisant Äntwert kritt hunn.

An dann ass mäi siwente Punkt - mee ech ginn do schnell driwwer ewech -, datt ech och nach net richtig matkritt hunn, wat dann elo d'Base légale wär an den Affaires étrangères vun deene Moossnamen, déi agefouert gi sinn, fir déi Tester op de Flughäfen ze maachen, respektiv fir am Fong de Leit ze soen: Wann Der keen Test hutt, kënnt Der - inklusiv d'ailleurs Leit, déi Resident hei zu Lëtzebuerg sinn - net op Lëtzebuerg zrëckkommen. Nach eng Kéier: Ech fannen déi Moossnam fundamental richtig. Mir hunn déi Fro gestallt an der Kommissioun. Mir krute geäntwert: „Mee do gëtt et eng Circulaire vum Ausseminister, déi ass publizéiert ginn, an et gëtt e

Règlement.“ An deem Règlement hu mer gekuckt, do steet awer strictement näischt vun der Obligation vun esou Tester dran.

Do och meng Fro: Wou ass et gereegelt? Nach eng Kéier: Ech fannen déi Moossnam absolutt richtig, ech fannen déi Moossnam absolutt noutwendeg! Mee wa mer esou fräiheitsbeschränkend Moossnamen hunn, fannen ech et absolutt normal, datt mer dat awer kloer an däitlech an e legale Kader aschreiwen, deen novollzéibar ass, deen och fir jiddwereen akzeptabel ass. Dat fannen ech eng absolutt Noutwendegkeet!

Dat zu de fundamentale Froen zum Fonctionnement vun eise Rechtsstaat. Déi Froen hu mer bis elo net ugeschwat, well an der Santéskommissioun am Fong nach ni déi do Problematiken op den Dësch komm sinn, well mir eis als Santéskommissioun op d'Gesondheitsfroen konzentréiert hunn, esou wéi se bis elo am Gesetz waren. Et ass elo fir d'éischt, wou se op eis zoukommen, well eeben e puer Artikele vun der Éducation nationale an deem Text och mat dra waren.

Ech wëll awer och déi puer Punkte soen, déi ech an deem Text als positiv empfangen. Ech empfangen zum Beispill als positiv, datt mer de Fichier vun der Protection des données personnelles elo esou gemaach hunn, datt de Fichier vun deene vaccinéierte Leit fir 20 Joer gehale gëtt, mee datt mer eng ganz Rei Donnéeën eraushuelen au fur et à mesure vun der Evolution: no zwee Joer d'Identifikatioun an d'Coordonnéee vun där Persoun, déi geimpft ginn ass, an no zéng Joer all déi aner Santédonnéeën. Ech fannen dat fundamental richtig an domat kënnen mir och liewen.

Ech fannen och d'Obligation vun deene verschiddenen Tester, déi do stinn an déi beim Sport gefrot ginn, fundamental richtig. An dofir kënne mer och mat deene Propositionen liewen. Ech fannen et och richtig, datt mer eng Obligation hunn, fir déi Infrastruktur fir eeler Leit, datt déi sollen an Zukunft Lëschten eraginn, wou da jiddweree ka feststellen, wie Pensionnaire ass, a wou ka vun der Santé de Suivi op eng ganz aner Aart a Weis gemaach ginn. All déi Moossname begrësse mer.

Mee dat Ganzt schreift sech awer an eng Impfstategie an, déi muss ofgestëmmt gi mat dem Rescht vun der Politik. An dovun häng schlussendlech mëttel- a laangfristeg de Succès vun eiser ganzer Politik of. A wann ech awer haut kucken, wat d'Zuele vu Lëtzebuerg sinn, da stellen ech fest, datt eis Zuele weesentlech méi schlecht si wéi déi vun deene Länner ronderëm - net ze schwätze vun Israel oder dem UK, mee och Länner wéi Portugal, Däitschland, Belsch, Frankräich sinn, wat d'Testen (veuillez lire: d'Impfen) ugeet, einfach proportionell gesinn, virun eis. An dat ass eppes, wat fir eis awer eng ganz Rei Froen opwërft. Bei den Zuelen op jidde Fall hu mer d'Impressioun, datt mer extreem lues sinn - ze lues sinn!

Dofir meng Fro un d'Regierung: Firwat ass dat esou? An dat ass esouger esou, wann ech déi Zuele kucken, och bei Länner, déi u sech eng änlech Strategie wéi mir fieren - dat heescht, eng Strategie, wou mer déi zweet Dosis halen -, och déi Länner si momentan, an den Zuelen zumindest, besser wéi mir.

An dofir ass meng Fro: Kréie mer manner Dose wéi déi aner Länner, proportionell gesinn? Dat kann ech mer bal net virstellen. Oder firwat si mer momentan méi lues? An ech mengen, datt hei d'Regierung eis, mee awer och de Leit dobaussen eng Explikatioun schëlleg ass.

Mir kënne mat ville Punkte vun der Impfstategie d'accord sinn: d'europäesch Akeef, d'Krittären, d'Reiefolleg vun der Impfung, d'Prinzipie vun den Decisiounen; och de Fait, datt grouss Impfzentre gemaach ginn, fanne mer richtig.

Et stelle sech awer nach eng Rei Froen hannendrun. Wa mer elo méi aner Vaccine kréien, déi net mussen bei minus 70 Grad gehale ginn, kann ee jo deelweis op eng aner Impfstategie ëmstellen. An do wollt ech froen, Madamm Ministesch, wou mer da mat den Diskussiounen dru sinn, fir d'Dokteren anzubannen an déi ganz Impfstategie, well mir schéngt et logesch a sënnavoll ze sinn, datt och d'Hausdoktere kënne Impfung virhuelen. Ech mengen, datt do och eng ganz Rei vun hinne bereet wären, dat ze maachen. Ech froen lech also: Wou si mer dru mat deenen Diskussiounen?

An dat selwecht gëlt fir d'Certificats de vulnérabilité. Doriwwer hu mer scho virun enger Rei Wochen hei geschwat. Mee ech kréien - ech weess net wéi et lech geet - eng ganz Rei Uruff vu Leit, déi soen: Mee wéi geet dat da mat deem Certificat? Wéi solle mer eis do uleeën? Verschiddener wenne sech un den Dokter a kréien da gesot: „Mir wëssen et nach net richtig. Mir wëssen, datt esou eppes kënnt.“ An dat mécht d'Leit richtig nervös, haaptsächlech déi, déi da vulnerabel a sensibel sinn, wa se net wëssen, wou deen Zuch ufirt. Do wär ech och wierklech frou, wa mer kéinten eng Rei Explikatiounen kréien.

Mir sinn also frou, datt d'Madamm Lenert en Impfplang virgeluecht huet. Mir wëssen och, datt dee

muss geännert ginn, deemno wat fir eng Informationen op eis zoukommen. A mir hätten do net ongär ... oder mir verlaangen, fir et méi kloer auszedrecken, datt d'Regierung och do eng Kommunikationspolitik mécht, déi de Leit Äntwerten op déi Froe gëtt, déi se legitimmerweis stellen. Zum Beispill froe se: Wat fir eng Konsequenz huet déi Decisioun, fir AstraZeneca net iwwer 65 Joer ze impfen, op den Impfplang? Zum Beispill déi Fro iwwert d'Niewewirkunge vun AstraZeneca, wou jo vill am Ausland driwwer geschwat gëtt, datt Leit, wa se et kruten, sech net gutt gefillt hunn duerno. Ass dat esou? Ass dat net esou? Zéie mer Konsequenzen doraus oder net? A firwat? Verschidden Impfungewirken net esou gutt bei Varianten. Ass dat esou? Ass dat net esou? Huet dat Konsequenzen op den Impfplang oder net? Ech mengen, dat sinn einfach Froen, déi sech dobausse gestallt ginn, a wou mer missten Äntwerten drop bréngen.

Ech weess, datt d'Regierung momentan net wëllt eng Campagne fir d'Impfung maachen. Ech halen dat perséinlech fir e Feeler, well et mécht Plaz fir Rumeuren, fir Konterwourechtchen, fir Verschwörungstheorien. Mee wann Der scho keng Campagne elo wëllt maachen, da soen ech awer ganz kloer, datt ech der Meinung sinn, datt Der nu wierklech déi Erklärung do esou vill wéi méiglech de Leit musst ginn, well se verlaangen duerno. A loosst keng Rumeuren hei zu Lëtzebuerg opkommen!

Zum Schluss nach zwou Remarken: Ech fannen - an dat ass am Fong eng Remark net un d'Regierung, mee un d'Chamber, deelweis och un d'Regierung, mee haaptsächlech och un d'Chamber -, datt mer eis awer mat enger Rei deontologeschen, fundamentalen Froen anescht sollten auserneesetzen, wéi mer dat heiansdo mat pauschale Sätz einfach esou maachen.

Ech fannen eng Diskussioun iwwert den obligatoreschen Charakter vum Vaccin, an d'Grënn, firwat mer et net wëllen, noutwendeg. Well et gëtt jo Froen vu Responsabilité individuelle a vun Autonomie individuelle, mee et gëtt och Froen vu Solidarité collective a vu Responsabilité collective. Ech mengen, datt et sollt eng Kéier thematiséiert ginn, fir kloer ze soen, firwat mer déi eng Positioun an net déi aner anhuelen.

Et gëtt en eetheschen Enjeu iwwert de Certificat de vaccination. Ech fannen, datt een net kann einfach Jo oder Nee soen. Ech fannen, datt een einfach eng Kéier seriö an ouni politesch Hannergedanke soll doriwwer diskutéieren: Wat ass sënnavoll a wat ass net sënnavoll? Ech fannen, datt een hei eng Kéier muss iwwert d'Abzëiung oder d'Netabzëiung vun de Frontalieren an eis Impfstategie diskutéieren. Ech fannen, datt eng Diskussioun iwwert de Prinzip vun de Prioritéiten vun de Vaccinatiounen och sënnavoll gewiescht wär. Ech fannen och eng Diskussioun iwwer méiglech Liste-d'attentes a Rechter, déi nach net vaccinéiert Leit hei zu Lëtzebuerg hunn, noutwendeg. Do geet een Twittersaz net duer, fir eng Äntwert ze ginn.

A schlussendlech soen ech lech och, datt ech mengen, datt déi Laangzäitstrategie, iwwert déi mer zwar heibanne gemeinsam ofgestëmmt hunn, datt mer déi géifen entwéckelen, mee wou mer einfach net ukommen a wou och kee Suivi vun deene Motiounen gemaach gëtt, awer noutwendeg ass.

Ech fannen, datt mer eis heibannen elo eng Kéier mussen d'Fro stellen: Wéi ass et da mat där Wuestungsgesellschaft, déi mer virun haten a wou een haut d'Impressioun huet, datt mer alles - alles! - maachen, fir esou schnell wéi méiglech erëm an déi Wuestungslogik zrëckzekommen?

Ech wëll de Covid lassginn, mee ech fannen, datt mer eis awer och eng Rei Froen mussen stellen: Wéi geet et nom Covid weider? Wat wëlle mer duerno? A wat kënne mer elo maachen, fir datt mer vläicht déi eng oder aner Weich anescht stellen? Ech géif gäre Froen stellen iwwert d'Autonomie vun Europa notament, déi mer esou grouss eropbeschuer hunn, wéi mer iwwert eis Autonomie a Produiten, déi mer onbedéngt hei brauchen, geschwat hunn, wa mer ofhängeg vun Ausland waren. Dat fannen ech richtig. Mee da mussen mer heibannen eng Diskussioun iwwert eis Industriestrategie féieren, och zu Lëtzebuerg. Si mer da bereet ze reindustrialiséieren? Zu wat fir enge Konditiounen? A wéi maache mer dat? Dat fannen ech eng noutwendeg Diskussioun.

D'selwecht ... déi europäesch Iwwerleeung iwwert d'Communautarisatioun vun der Gesondheitspolitik, iwwert d'europäesch Organisiatioun a Krisenzäiten, déi fannen ech noutwendeg. Eng Diskussioun iwwer Fräiheeten a Rechtsstaatlechkeet gehéiert och dozou. Ech regretéieren, datt ..., an ech spriechen d'Regierung wierklech net schëlleg dofir, mee ech soen, och an der Chamber sollte mir eis Gedanke maachen, well dat sinn Diskussiounen, déi heihinner gehéieren an hirer ganzer Villfalt a mat alle Kontroversméiglechkeeten, déi doranner bestinn, fundamental politesch, deontologesch Froen fir d'Zukunft vum Land, déi mer hei mussen stellen. Ech profitéiere vun deem Gesetz, fir meng Meinung eng Kéier kloer an däitlech doriwwer auszedrecken.



Meng Konklusioone sinn déi hei: Éischtens, mir fannen, et ass net Zäit fir opzemaachen. Zweetens, mir fannen, datt de Risiko nach extreem héich ass, no-tamment dee vun de Varianten. Mir sinn der Mee-nung, datt d'Moosname vun der Regierung net duer-ginn. Mir sinn dréttens haaptsächlech der Mee-nung, datt an der Schoul déi Moosnamen net duer-ginn. Véiertens, mir soe ganz kloer, datt de Kader vun der Regierung ze vill konfus ass, datt eis eng Rei wëssenschaftlech Wäerter feelen, déi d'Deci-sioone besser géifen erklären a se besser verständ-lech dobause géife maachen.

Mir fannen, datt déi Impfstrategie momentan ze lues an och fir d'Leit net verständlech ass. Mir re-grettéieren, datt keng Kommunikatiounsstrategie do ass, déi effizient ass. Mir fannen, datt dësen Text technesch net gutt ass, datt e schlecht ge-maach ass an datt en och eng Rei Decisioune vun der Regierung, déi se elo geholl huet, an eisen Aen net op eng gesetzlech Basis stellt, déi duergeet.

Dofir wäerte mer an der CSV dësen Text net stëm-men. Mir wäerten Nee stëmmen. An ech wënsche mer, datt d'Regierung et fäerdegréngt, an deenen nächsten Deeg a Wochen de Courage ze hunn, fir Perspektiven opzezeechnen, Leadership ze weisen, realistesch Perspektiven, wou et higeet, wat fir eng Zilsetzungen mer an deenen nächste Woche mat eiser Impfstrategie hunn, esou wéi den Här Biden, esou wéi d'Madamm Merkel, esou wéi den Här Macron et och gëschter gemaach hunn. Do kann ee sech natierlech ieren, dat ass e Risiko. Mee ech mengen, wa Saachen anescht lafen, wéi ee se am Ufank virausgesinn huet, dann hunn d'Leit absolutt kee Problem domat, wann een hinnen erkläert, wat anescht gelaf ass, wann ee seng Zilsetzunge rea-justéiert.

Mee ech fannen et extreem wichteg, de Leit Pers-pektiven no baussen opzezeechnen, fir se mat um Wee ze halen, fir hinnen ze soen: „Dir musst elo nach e puer Méint op d'Zänn bäissen, da packe mer et zesummen.“ A fir hinnen ze soen: „Loosst lech alleguer impfen, net nëmme fir lech, mee och fir d'ganz Gesellschaft.“

Ech soen lech Merci.

■ **Une voix.** - Très bien!

■ **M. Fernand Etgen, *Président.*** - Merci villmools, Här Claude Wiseler. An den nächsten ageschriw-ene Riedner ass den honorabelen Här Gilles Baum. Här Gilles Baum, Dir hutt d'Wuert.

■ **M. Gilles Baum (DP).** - Merci fir d'Wuert. Här President, eis Zuele si leider nach ëmmer op engem vill ze héijen Niveau.

(Brouhaha général)

■ **M. Mars Di Bartolomeo (LSAP).** - Si mer op en-gem Joermaart?

■ **Une voix.** - ... op enger Kiermes!

■ **Une autre voix.** - Et muss een och kënne matenee schwätzen.

(Coups de cloche de la présidence)

■ **M. Fernand Etgen, *Président.*** - Et wier gutt, wann déi bilateral Reuniounen ausserhalb vum Sall wie-ren.

■ **M. Gilles Baum (DP).** - Eis Zuele si leider nach ëmmer op engem vill ze héijen Niveau. Déi gutt No-riicht ass déi, dass eis Infektiionszuelen - obwuel mer zanter Januar de Commerce souwéi och de Sport an d'Kultur nees ënner strikten Aschränkun-gen opgemaach hunn - bis elo nach net staark an d'Luucht gaange sinn. De Reproduktiounstaux läit bei 1 %, dee misst awer bei 0,7 % leien, fir dass mer d'Situatioun géife gutt an de Grëff kréien. Den Taux de positivité dréit scho säit enger Zäitche ronderëm déi 2 %. A ganz wichteg: D'Situatioun an de Spidee-ler huet sech awer entspaant an ech mengen, dat si gutt Nouvellen.

Et gouf weider an de leschten dräi Woche massiv getest. An der Woch vum 25. Januar: iwwer 51.000 Tester, an den Inzidenztaux iwwer siwen Deeg - dat heescht, den Duerchschnëtt iwwer siwen Deeg, dat ass deen, mat deem eis däitsch Nopereen och mëtt-lerweil schaffen -, dee louch an där Woch bei 160.

D'Woch vum 1. Februar sinn 61.000 Tester ge-maach ginn an de siwen Deeg, den Inzidenzwäert louch bei 182. D'Woch vum 8. Februar sinn iwwer 70.000 Leit getest ginn, an de Wäert, dee louch bei 176.

Wat wichteg ass, fir eis kënne mam Ausland ze ver-gläichen, ass den Taux de positivité sur ordonnance (veuillez lire: den Taux de positivité pour les tests effectués sur ordonnance). An do ass et esou, dass mer erofkomm si vu 5,2 % op 4,8 %, an d'Woch vum 3. Februar souguer op 3 % - 3 %, wat jo dee Wäert ass, deen d'WHO eis virgëtt, fir ze soen, dat doten hutt Der hallefweegs am Grëff.

Mir ass opgefall, dass an deene leschte Publika-tioune vun der Santé elo och ëmmer ugi gëtt, wéi vill Leit erausfonnt gi sinn iwwert den Tracing, dat heescht, wéi vill Leit kontaktéiert gi sinn, déi dann iwwert den Tracing geruff gi sinn, an da getest gi sinn. An dat ass ganz ënnerschiddlech: Do fënn

een Deeg, do huet ee méi Leit, déi positiv getest gi sinn, well se an den Tracing geruff gi sinn; aner Deeg hues de méi Leit iwwer Ordonnance. Ech fan-nen dat awer och eng ganz, ganz wichteg Angab. Et ass eng ganz wichteg Angab, fir op dat anzegoen, wat virdrun hei vum Här Wiseler vun der CSV gesot ginn ass, deen eis mat anere Länner vergläicht: Dat ass richtig, et soll ee vergläichen, wat vergläichbar ass, an dat ass den Taux de positivité sur ordon-nance. An do leie mer awer däitlech besser wéi eis däitsch Nopereen.

Bei eisen däitschen Nopereen, do wësst Der vläicht: 35, dat ass elo déi nei 50, jo dat ass den neie Wäert. Ech hunn de Moie gelauschtert ..., si lou-chen, ech menge gëschter, bei 57 Komma ... op 100.000 Awunner. Et gëtt an Däitschland elo effek-tiv Landkreesser, déi sinn erëm gréng. Et gëtt ganz interessant interaktiv Kaarten, déi Der kënn kuck-en. Et gëtt Landkreesser an Däitschland do si se gréng, do leie se ënner zéng. Et gëtt awer och Land-kreesser, besonnesch am Oste vun Däitschland, déi sinn extreem héich, do leie se nach ëm déi 200.

Fir awer trotzdem dat ze relativéieren, wat den Här Wiseler gesot huet, wëll ech eng Kéier hei ervirsträi-chen, dass et an Däitschland kee Large-Scale-Tes-ting gëtt. Ech hunn och nach net ganz vill héiere vun engem konsequenten Tracing an Däitschland, esou wéi mir e maachen. An ech hunn awer eppes héiere vun enger App, enger App, mat där jo dann och soll noverfollegt ginn, wéi d'Leit sech infizéiert hunn. Also ech kann lech soen, den Här Söder huet scho virun e puer Woche gesot, dass déi App do e Reifall wär, dass dat net géif fonctionéieren. Ech hu gëschter e Bericht gelies, an deem steet, dass sech nëmmen all Siwenten, dee sech effektiv infi-zéiert huet, och an där App do umellt. Also géif ech soen, dass dat net wierklech ganz vill bréngt.

Dir hutt virdrun, Här Wiseler, gesot, de Lëtzebuurger Wee ..., Dir géift näischt méi dovunner héieren. Ma ech kann da vläicht nach eng Kéier soen, wat de Lëtzebuurger Wee ass, an dat ass och dee Wee, dee mer gewëllt si weiderzegoen. Ech soen de Kolléeg vun der CSV dat. De Large-Scale-Testing wëlle mer weiderféieren, den Tracing, dee bis elo awer, men-gen ech, seng Preuvë gemaach huet, wëlle mer wei-derféieren. An ech mengen och, dass dee vu kenger Säit vun der CSV a Fro gestallt ass, weeder den Tra-cing nach de Large-Scale-Testing. Da sollte mer wannechgelift net eis Zuelen zu Lëtzebuerg ver-gläiche mat Zuelen aus Portugal, aus Däitschland, aus Amerika oder aus anere Länner. Dann hunn ech léiwer, mir bleiwe beim Taux de positivité sur ordon-nance, do kënne mer eis mat eisen Nopere vergläi-chen.

Eis Situatioun ass zwar am Moment net direkt be-onrouegend, mee se ass awer och net op déi liicht Schëller ze huelen. D'Situatioun ass a bleift eescht, besonnesch, wann een d'Zuele vun de leschten Deeg a Betruuecht zitt. Et ass elo net de Moment fir lasszeloossen, fir opzemaachen. Et ass net de Mo-ment, fir liichtfankeg mat der Situatioun ëmzegoen.

Wéi séier et nämlech ka goen, dat huet een um Bei-spill vu Portugal gemierkt, a besonnesch d'Regioun ronderëm d'Haaptstad Lissabon. Eng Kombinatioun aus Lockerungen an der méi ustiechender britte-scher Variant hunn d'Zuelen an d'Luucht schéisse gelooss an hire Gesondheetssystem quasi iwwer Nuecht u seng Grenze bruecht. Gott sei Dank sinn awer elo d'Infektiionszuelen do erëm um Falen, och wann d'Situatioun nach ëmmer ugespaant bleift. An Dir hutt och vläicht matkritt, dass och Lëtzebuurger medezinnescht Personal doënne op der Plaz ass fir ze hëllefen.

Och hei am Land mécht d'Verbreedung vun de Mu-tatiounen, a virop der brittescher Mutatioun, be-rechteterweis Suergen. Dowéinst bleiwe mer wei-derhi virsiichteg a mir verlängeren d'Mesurë bis de 14. März. A wéi d'Zuele weisen, huet de Virus sech do verännert, well e ganz besonnesch a leschter Zäit bei deene Jonke méi aktiv ass an d'Zuele bei de Kanner tëschent null an zéng respek-tiv bei deene Jugendleche staark geklomme sinn.

Enn Januar war et eng Hausse an Zäit vun enger Woch vu 64 % (veuillez lire: 68 %) bei de Kanner vun 0 bis 14 Joer an déi Woch drop nach eng Kéier eng Hausse an där Alterskategorie vu 46 %. An duerfir mengen ech, dass d'Decisioun, déi den Educa-tiounsminister Claude Meisch geholl huet, fir d'Schoulen eng Woch virun der Fuesvakanz an den Homeschooling ze setzen, richtig war.

Mat dëser preventiver Mesure ass der Verbreedung vun der neier ustiechender Variant vum Coronavirus an de Schoulen entgéintgewierkt ginn. Et war eng Noutbrems, déi engem Zäit ginn huet, fir sech en Iwwerbléck ze verschafen. Well jo, wann de Virus sech verännert, da muss och d'Schoul sech upa-sen. Dat ass elo geschitt an dat begrësse mir. Mir begrëssen, dass d'Schoulen ab e Méinden nees op-maache kënnen. Och ënnert den Elteren, de Schüler, den Enseignanten, mengen ech, besteet e breede Konsens, dass alles muss dru gesat ginn, dass d'Léieren esou normal wéi méiglech ka fonctionéie-ren an dass d'Schoulen esou laang wéi méiglech opbleiwen.

Beim Presenzunterrecht gëllen ab e Méinden nach eng Kéier nei verstärkt sanitär Mesuren. Nieft enger allgemenger Maskepflicht mat Ausnam vum Cycle 1 an a verschiddene Kompetenzzenteren, wäert och méi an de Schoule getest ginn.

Ech wëll hei nach eng Kéier kloer soen, dass an der Spillschoul an am Precoce keng Mask brauch ge-droen ze ginn, och wann d'Kanner an der Spill-schoul sechs Joer kritt hunn. Ech mengen, dat war e bëssen an de Medie gëschter. Ech soen dat hei nach eng Kéier ganz kloer: An der Spillschoul an am Precoce brauch keng Mask gedroen ze ginn.

Den Asaz vu Schnelltester ass fir de März virge-sinn, an dat bitt engem natierlech aner Méiglech-keeten, fir méi séier a méi effikass op eng Infek-tioun ze reagéieren an och doduerch potenzial In-fektiounskette guer net eréischt net entstoen ze loos-sen oder se ze ënnerbannen. Och CO₂-Dete-cteurs gi weider an de Klassen installéiert, a fir d'En-seignanten ass eng Commande vun 30.000 FFP2-Masken erausgaangen.

Wann d'Zuel vu Coronafäll an de Schoulen trotz-deem erëm staark sollt klammen, da sinn natierlech weider Mesurë geplangt. Dat geet vu punktuellen, lokale Mesurë bis hin zum Zoumaache vun de Schoulen an d'Iwwergoen an den Homeschooling. Dat hätt natierlech och seng Inzidenz op d'Maison-relaisen an op d'Sportsveräiner an deene betraffene Gemengen oder am schlémmste Fall souguer op d'ganzt Land.

Et gëtt wierklech eng Panoplie vu Mesuren, déi alle-guer dozou bäidroen, dass déi alleréischte Piori-téit, nämlech d'Schüler an d'Enseignanten ze schüt-zen an d'Schoul opzehalen, och ka gewärleescht ginn. Dat ass vun enormer Wichtigkeet, well ech hunn et virun e puer Wochen a menger Interpella-tioun gesot: Et geet ville Kanner net gutt.

Dat Joer Pandemie mat Lockdown, Social Distan-cing, Homeschooling, wou ee vläicht keen hat, deen engem konnt hëllefen, vill Ängschten, Opreegung, Ongewëssheet, dat huet seng Spuere bei de Kanner a bei de Jugendlechen hannerlooss. Den Impakt op déi mental Gesondheet ass net ze negligéieren a mir mussen dat eescht huelen. Den Educationsmi-nister huet duerfir d'Wuelbefanne vun de Kanner scho bei der Rentrée am September an de Mëttel-punkt gestallt. Op där Schinn gëtt elo virugefuer mat enger ganzer Campagne ronderëm de Bien-être vun deene Jonken.

E puer konkreet Mesurë vun dëser Campagne erausgepickt: Et gouf e Guide ausgeschafft mat Re-commandatiounen a Best Practices, et gëtt eng ex-tra Helpline fir psychologesch Betreierung aktivéiert, d'Enseignanten an d'Eltere gi weider sensibiliséiert an och de CePAS huet eng Campagne op de Social Media lancéiert.

Déi Jonk solle virun allem léieren, dass et net schlémm ass, wann et engem eng Kéier net gutt geet. Duerfir brauch ee sech net ze schummen. Duerfir brauch ee sech net ze entschëllegen. Et brauch ee sech och net ze rechtfertegen. Déi „no worries, only good vibes“-Welt, déi sozial Netzwier-ker wéi TikTok oder Instagram deene Jonke virgau-kelen, huet an der momentaner Situatioun relativ weéneeg mat deene Jonken hirer Realitéit ze dinn. Déi toxesch Positivitéit - dat Gefill, sech ëmmer misse gutt ze spieren, ëmmer misse gutt drop ze sinn -, bewierkt nämlech genau de Contraire: dass ee sech méi schlecht spiert.

Dat Wichtigst ass a mengen Aen, dass jiddwereen, deen Hëllef sicht, dass jiddwereen, deen Hëllef brauch, och Hëllef kritt an och weess, wou e se fënn. Dorëms geet et!

Här President, no der grénger Luucht vu Bréissel huet de Minister Lex Delles annonciéiert, d'Aide „coûts non couverts“ an d'Aide de relance ze ver-längeren. Dat verschafft ville Betriber elo emol Loft a gëtt hinnen och eng gewësse Previsibilitéit. Zu-deem wäerten och jonk Betriber, déi virdrunner net an de Genoss vun den Aidë komm sinn, d'Aide „coûts non couverts“ an Zukunft kënnen an Usproch huelen.

D'Verlängerung vun deene Mesurë bedeit natier-lech och, dass den Horeca-Secteur nach staark an den Aktivitéiten ageschränkt bleift. A gleeft mer, wann ech queesch duerch de Sall hei kucken, wäert Der keen heibanne fannen, deem dat do Freed mécht, dass mer grad an deem Secteur nach eng Kéier musse verlängeren. Mee duerch d'Situatioun ass et einfach néideg.

Dem Restaurateur bleift fir de Moment just den Takeaway, an hei ginn et awer, mengen ech, positiv Nouvellen: Fir d'Betriber ze motivéieren, den Take-away unzebidden oder weider unzebidden am-plaz d'Aktivitéit ganz anzustellen, wäerten d'Recetten aus dem Takeaway net méi ganz aus der Aide erausgerechent ginn, mee se ginn zum Deel immu-niséiert. An ech mengen, dass dat fir d'Restaurateu-ren eng ganz gutt Noriicht ass. An dës Ännerung setzt e wichteg Zeechen, dat den Asaz vun de Restaurateuren an de Cafetieren honoréiert, déi, ob-wuel hir Dieren zou sinn, hir Clientë weider zer-weéiere wëllen.

Mir sinn och frou, dass an deem dote Kader eng Léisung fir d'Independantë fonnt gouf, déi oft hir ganz Erspuernisser, hir Zäit an hiert Häerzblutt an hire Betrib gestach hunn. An enger Kris, wéi mer se bis elo erliewen, kann de Salarié an de Chômage partiel geschéckt ginn an e kritt dann 80 % vu sen-gem Salaire vum Staat bezuelt. Dat géllt awer net fir en Independant, obwuel hien och an de Fonds pour l'emploi cotiséiert. Wann ee Betrib keen Ëm-saz mécht, dann huet de Patron keng Pai. A wa sech dat iwwer Wochen oder Méint hinzitt, dann ass iergendwann alles, wat e sech iwwer Joren er-schafft huet, fort.

D'Léisung, fir elo iwwert d'Aide „coûts non cou-verts“ ze fueren, dréit dëser Situatioun kuerzfristeg Rechnung a weist, dass d'Independanten, déi e ganz wichtige Pilier vun eiser Gesellschaft, e ganz wichtige Pilier vun eiser Wirtschaft sinn a vill Aar-bechtsplaze schafen, net vergiess sinn.

Wa mir de Covid bis hannert eis hunn, wäert sech d'DP awer nach eng Kéier mat der prinzipieller Fro beschäftegen, wéi ee mat der spezifischer Situa-tioun vun den Independanten an esou engem Fall ëmgeet. Et geet eis ëm all Einzelnen, vum klengen Handwierker bis zum Commerçant, deem all Dag d'Äerm eropstréppt, deen all Dag fir säi Brout op-steet a bei deem et op all Su ukënn.

All dës finanziell Hëllef si batter néideg, grad well mer déi sanitär Mesuren nees verlängeren a well mer och net wëssen, wéi d'Situatioun hei zu Lëtze-buerg an engem Mount ausgesäit. Mat den neie Mutatioune geet eng Onvorsichtegkeet duer, an d'Situatioun kéint erëm kippen. Esou schwéier et eis och fält, muss ech lech soen: Mir brauchen alle-guerte weiderhi Gedold a mir brauchen allegueren Zouversicht, dass mer dat hei zesumme packen.

Ech ginn dowéinst am Numm vu menger Fraktioun den Accord zu dësem Gesetz an ech soen lech Merci fir Är Opmierksamkeet.

■ **Plusieurs voix.** - Très bien!

■ **M. Fernand Etgen, *Président.*** - Merci villmools dem Här Gilles Baum. An ech ginn d'Wuert weider un den honorabelen Här Georges Engel. Här Engel, Dir hutt d'Wuert.

(Désinfection du pupitre et interruptions diverses)

Ech mengen, dat do gëtt keng Iwwerschwemmung.

■ **M. Georges Engel (LSAP).** - Merci, Här President. Ech sinn net aus Zocker, et geschitt näischt. Mir maache méi déi elektresch Saachen hei Suerge wéi ech. Okay, ech paken elo emol Holz un.

Voilà! Här President, Dir Dammen an Dir Hären, d'Leit sinn es midd. De Marc Baum hat et schonn déi leschte Kéier gesot, hie wär es och midd. An ech kann en och ganz gutt verstoen, an d'Leit do-baussen, hunn ech d'Impressioun, sinn es och midd.

Ee Joer Corona huet eis Gesellschaft verännert, huet eist Zesummeliwee verännert an huet och Réss an eis Gesellschaft bruecht. D'Situatioun nervt a jiddweree wëllt, dass et eriwuer ass. Well ech ginn d'Gefill net lass - a vläicht ass et och just e perséinlech Gefill -, dass d'Gedold bei de Leit lues a lues ofhëlt. Wuel hale sech d'Leit un d'Mesuren, gréisstendeels richtig an och ganz korrekt, soss géifen d'Zuele jo nach vill méi an d'Luucht schéis-sen. An awer héieren ech a mengem Ëmfeld dat sel-wecht, wat ech och selwer fillen: Déi Ukënnegung vun deem Vaccin, déi huet esou dat Liicht am Tun-nel bruecht, a wann een da bis d'Enn gesäit, wann ee gesäit, dass dee Cauchemar hei gläich eriwuer kéint sinn, da wëllt een och, dass e séier soll eriw-er sinn an dass dat esou séier wéi méiglech geet. D'Ukënnegung vum Vaccin, vum Liicht um Enn vum Tunnel, déi huet dëst Verlaangen no engem Enn vun der aktueller Situatioun nach eng Kéier verstärkt.

An no engem Joer kënne mer soen, dass mer de Virus besser kennen, mee dass mer nach iwwer-haapt net um Enn vum Wëssen ukomm sinn, dass mer all Dag Neies léieren, all Dag nei Erkenntnisser gewuer ginn, déi fir d'éischt als eng Studie oder alt emol en eemolegt Experiment erausfonnt ginn, an da musse se sech verifizéieren duerch wëssen-schaftlech Bättrëg a Publikatiounen, déi dann erëm déi Mesuren, déi en place sinn, zum Deel a Fro stel-len oder déi et dann néideg maachen, dass d'Me-surë musse adaptéiert ginn. Dat si schwiereg Pro-zesser an déi brauchen Zäit a si kommen och net bei jiddwerengem un.

Ech muss mer wierklech Gedanke maachen iwwert ee Saz, deen ech haut héieren hunn, well deen huet mer wierklech vill Fragezeichen opgeworf. Ech hunn haut héieren, wéi ee gesot huet: „Do kënn Der Etüde bréngen, mee ech gleewen dat als Laien net.“

(Interruption)

Da gëtt et wierklech schwéier, wann een Etüde bréngt, a si schéngen engem awer net als Laien esou op d'Mooss geschneidert ze sinn.

(Interruptions)

Jo, da gëtt et wierklech schwéier, d'Leit ze iwwer-zeegen.



Wann de Mënsch eppes net gären huet, dann ass et Onsécherheet! Am Moment si mer awer genau an esou enger Phas vun Onsécherheet. Villes ass nach an der Evolutioun, et gött nach net déi néideg Erkenntnisser a ville Beräicher: Wéi eng Auswierkungen hunn déi Mutatiounen? Wéi wierkt den Impfstoff dorobber? Wéi een Impfstoff ass dee richtegen? Ginn et Kombinatiounen vun Impfstoffer, déi méiglech sinn? A wa mer geimpft sinn, komme mer dann erëm an eng Normalitéit oder ass et dann nach net eriwwer a musse mer nach ëmmer an där Situatioun bleiwen, wou mer elo sinn? An et ginn nach Honnerte weider Froen, wou mer keng Äntwerte wëssen.

D'Onsécherheet, déi mécht sech breet, och bei deenen, déi mussen Decisiounen huelen, well déi Decisiounen mussen op faktebezunnen Evidenze geholl ginn, wat seng Zäit brauch. An da gött et och nach d'Onsécherheet vun der Vermëttlung vun de Mesagen, an duerno natierlech och déi vun der Akzeptanz vun de Moossnamen, déi zur Andämmung vun der Pandemie geholl musse ginn.

An déi Onsécherheet, déi nei Entwécklungen - mir haten elo grad d'Diskussioun iwwert d'Mutatiounen -, jo, déi maachen och d'Schwieregkeet vun der Laangzäitstrategie aus! Wann all Dag nei Erkenntnisser kommen, dann ass d'Laangzäitstrategie natierlech en „Ding der Unmöglichkeit“.

An der Lescht konnte mer hei zu Lëtzebuerg eng deelweis Stabilitéit hale bei de Mesuren, déi geholl goufen. D'Leit hunn dës akzeptéiert, well se och net all Dag geännert hunn a well se och zum gréissten Deel ... Jo, et sinn ëmmer e puer Saachen, déi onverständlech sinn, mee de gréissten Deel vun de Mesuren ass awer verständlech.

D'Onsécherheet, déi eis ëmgëtt, kënn awer och duerch eist Ëmfeld, duerch eis Nopeschlänner, déi alleguer an enger anerer Situatioun sinn, allegueren! Et kann een och Däitschland net mat Frankräich, a Frankräich net mat der Belsch, an eis net mat deenen aneren dräi direkt vergläichen, well mer allegueren aner Situatiounen hunn a well mer och alleguer aner Mesuren hunn - zum Deel déi selwecht, awer och zum Deel anerer -, fir dësem Virus Meeschter ze ginn.

A jo, et kann een och gedeelter Meenung sinn iwwert déi eng oder aner Measure. Ech soen et nach eng kéier, an dat hunn ech elo schonn e puermol hei op der Tribün gesot: Et ass d'Zesummespill vun deene Mesuren, dat et ausmécht. Ech mengen och, dass mer eis do zum gréissten Deel eens sinn.

An esou ass et och mam Couvre-feu. Ech sinn hei net deen, deen hei mordicus wëllt de Couvre-feu verteidegen, well d'LSAP steet och op der Säit vun de Vertrieeder vun de fundamentale Rechter. A fir eis ass d'Ausgangsspär och eng grouss Aschränkung vun de perséinleche Fräiheeten. Dat ass fir eis och ganz kloer. Mee grad wéi zu Lëtzebuerg loosse d'Regierungen am Ausland sech jo vu Wëssenschaftler, vun Experte beroden, fir ze wëssen, wat fir eng Moosssname kënn geholl ginn, fir déi Pandemie an de Grëff ze kréie respektiv fir Neiinfektiounen dann och ze reduzéieren.

A grad wéi zu Lëtzebuerg ass do eeben eng vun de Mesuren, déi vun deene Beroder virgeschloe gëtt, de Couvre-feu! An esou gött et de Couvre-feu a Frankräich um 18.00 Auer, an der Belsch um 22.00 Auer, an Holland um 21.00 Auer, am Vereenegte Kinnekräich um 18.00 respektiv um 20.00 Auer, an Däitschland regional um 20.00 Auer, an Italien um 22.00 Auer, a Spuenien um 22.00 Auer, a Portugal an der Woch um 23.00 Auer an de Weekend um 13.00 Auer! An Tschechien, Slowenien, Éisträich, Griicheland, Rumänien, Ungarn ..., also et ginn eng ganz Rei vu Länner, do gött et de Couvre-feu och.

An all déi Regierungen - a se si vun alle politesche Faarwen, et ass net eng Faarf, déi do predominant ass -, déi sinn zum Schluss komm, dass de Couvre-feu kann dozou bäidroen, dass de Virus agedämmt ka ginn. Net nëmme mir hei zu Lëtzebuerg! Et ass och keng Erfindung vun de Lëtzeburger, de Couvre-feu, a wa mir falsch hei leien, da läit och hallef Europa falsch. Dat muss een eng kéier soen.

Jo, déi kënn vläicht alleguer falschleien, dat ass méiglech! Ech wëll dat emol guer net behaapten, dass dat net esou kéint sinn! Mee et ass fir mech eng Mesure bei alleguer deenen anere Mesuren, déi dozou hëllef kann, fir déi Neiinfektiounen ze reduzéieren. A gleeft mer, och mir si frou, wann de Couvre-feu kann opgehewe ginn!

Dir Dammen an Hären, aktuell hu mer hei zu Lëtzebuerg, ech hunn et scho gesot, eng onsécher Situatioun: D'Tendenz vun den Infektiounen zu Lëtzebuerg ass llicht steigend am Géigesaz zu eisen Nopeschlänner. Et ass also eng ëmgedréite Situatioun wéi déi, déi mer virun dräi Wochen haten. Do hate mer grad de Géigendeel vun der Situatioun wéi elo. Eis Infektiounszuele bleiwen oder weider héich a leien iwwert deene vun Däitschland an der Belsch, awer ëmmer aus ënnerschiddleche Grënn. De Gilles Baum huet et virdrun hei gutt erkläert. Dëst gött Grond, fir besuergt ze sinn, an dëst léisst och keng

Lockerungen zou, obwuel mer eis déi all gewënscht hätten.

Natierlech leie mer duerch eis Teststrategie nach ëmmer ganz vir am Taux de dépistage an och am Taux de positivité. An och am Taux de mortalité leie mer am Verglach mat eisen Nopeschlänner ganz gutt. An de Spideeler huet d'Situatioun sech och be- rouegt: Vun deene 74 Hospitaliséierte sinn der 17 op der Intensivstation. An dës Zuele maachen dann och, dass mer déi Mesuren en place kënn loosse, ouni se nach mussen ze verschäerfen. Ech soen „haut“, muer kann d'Situatioun eng aner sinn.

An awer maachen eis déi Mutatiounen do Suergen. Déi brittesch an déi südafrikanesch Variant, déi hunn eng Rei vun den Donnéeën hei bei eis verännert. Et gött eng interessant Harvard-Studie, déi zum Schluss kënn, dass de B.1.1.7 duerfir méi geféierlech ass, well e méi laang ustiechend ass. Dat ass den Haaptgrond, firwat e méi geféierlech ass. D'Zuel vun de Vire wier deemno net determinant, mee d'Dauer vun der Ustiechung. An en plus ass de Krankheetsverlaf och nach en anere wéi bei der éischter Form vum Virus.

Dat ass elo eng Studie, et ass nach kee wëssenschaftleche Beweis, mee et gött eis awer Indikatiounen, et gött eis eppes, wat wëssenswäert ass a wat och hëllefbräich ass, well dës Erkenntnisser, déi kënnen eis hëllefen, eis Mesuren dann och ze adaptéieren, zum Beispill d'Dauer vun der Quarantän. Och dat kéint eng Erkenntnis vun där Studie hei sinn. Déi Studie, déi ass eng Woch al, déi ass ganz nei, an duerfir brauche mer hei nach e bësse Gedold. Mir wëssen nach net genuch iwwert déi Mutatiounen. Virsiicht ass also nach ëmmer dat éischt Gebot.

Mir haten et och an de leschte Woche mat enger Erhéijung vun den Infektiounen bei deene Jonken a Jugendlechen ze dinn. Duerfir sinn d'Moossnamen an der Schoul och noutwendeg gewiescht. Do gouf et jo haaptsächlech an der Alterskategorie vu 4 bis 19 Joer eng onverhältnisméisseg Erhéijung vun der Verbreedung vum Virus. Zweek Phenomeener konnt een hei gesinn: Éischstens, den Taux de positivité an dëser Alterstranche war méi héich wéi dee vum Rescht vun der Populatioun, an zweetens, den Zenario eent an den Zenario zweek - dat ass wann ee respektiv zweek Positiver an enger Klass sinn -, deen ass vill méi oft op den Zenario véier gewieselt - Zenario véier ass, wann eng Infektiounsketten an der Schoul ass mat méi wéi fënnf Fäll. Dat huet du bewierkt, dass de Ministère huet misse reagéieren. An der Educatioun hu mer mëttlerweil 14 % vun den Ustiechungen, dat ass besuergneserreegend an duerfir huet do och missen eppes geschéien.

An och bei den Impfungen kommen all Dag nei Erkenntnisser. Den Här Wiseler huet eng ganz Rei vu Froe gestallt iwwert den AstraZeneca. Do gött et eng Circulaire vum Ministère de la Santé; ech kommen herno nach eng kéier dorobber zréck. Vill Onsécherheet dréit nämlech ëm den Impfstoff vun AstraZeneca.

An ech kann do nëmme recommandéieren ... - ech weess elo net, ass et e Podcast oder war et um Facebook, wou ech dat gesinn hunn -, eng Informatiounsstonn mam Dokter Dentzer aus der Santé, deen dat exzellent, awer wierklech immens gutt erkläert huet. An en ass all Kéiers erëm eng kéier op déi Froen zréckkomm, déi e scho beäntwert hat - an en hat se schonn déi leschte kéier beäntwert -, en ass mat enger ganz grousser Gedold a grousser Kompetenz dorop zréckkomm.

An hien huet gesot, dass den AstraZeneca e gudde Vaccin ass, et ass keen Zweekklassenimpfstoff. A wann de Kierper sech wiert, wann een Niewewierkungen huet, dann ass dat jo u sech e gutt Zeechen, well de Kierper, dee schafft dann a bilt Anticorpsen an dat mécht dann och, dass de da resistent dergéint bass.

An elo kommen ech op déi Lettre circulaire vum Ministère ze schwätzen. Ech si frou, dass déi erauskomm ass, well do nämlech eng ganz Rei vu Froe beäntwert ginn iwwert den AstraZeneca, iwwert d'Effikassitéit vum Vaccin, iwwert d'Nieweneffekter, iwwert den Delai tëschent der éischter an der zweeter Impfung, wien ee soll mat AstraZeneca impfen, wéi d'Wierkung op aner Mutatiounen ass an och iwwert de Rattrapage, wann ee sech net mat deem Impfstoff wëllt impfe loosse, wéi ee sech dann herno ka rattrapéieren. Also op all déi Froen, déi den Här Wiseler hei gestallt huet, gött et säit dem 17.2. eng Circulaire, wou et mech e bësse wonnert, dass Der déi net hutt oder se net gesinn hutt, well do waren alleguer déi Froen, déi Der gestallt hutt, ganz einfach beäntwert.

■ **Une voix.** - Très bien!

■ **M. Georges Engel (LSAP).** - Beim AstraZeneca brauch een och en zweete Vaccin. Ech hunn et vir- dru gesot: De Conseil supérieur des maladies infectieuses, deen huet do proposéiert, dass de Rappel vun dëser Impfung, déi zweet Dos, dann tëschent der aachter an der zwielefter Woch soll gemaach ginn. Dat sinn dann u sech zweek Méint, zweek

Méint!, wou een da muss waarden op den zweete Vaccin. Bis elo hu mer hei zu Lëtzebuerg bei enger Impfung, déi zwou Dose gebraucht huet, ëmmer déi zweet Dos en réserve gehalen, fir sécherzestellen, dass de Rappel och gemaach kéint ginn.

An do war et beim Pfizer/BioNTech esou, dass dat véier Woche waren. Dat huet fir mech och en ..., dat ass e räsonabelen Delai. Hei beim AstraZeneca ass den Delai awer elo zweek Méint. En ass zweek Méint, soudass ee sech d'Fro ka stellen - an ech géif dann der Madamm Minister dat mat op de Wee ginn -, ob et hei nach ëmmer opportun ass, déi zweet Dos och hei ze reservéieren, oder ob et net besser wär, esou vill wéi méiglech Leit hei mat der éischter Dos ze impfen, wëssend, dass een an enger Zäit vun zweek Méint awer mat enger grousser Warscheinlechkeet eng nei Liwwerung vu Vaccine kritt. Dës Impfung, déi verhënnert, dass d'Leit e schwéiere Verlaf vun der Krankheet kënn kréien a souguer kënn stierwen. Heimadder hätte mer dann e séiere Schutz fir d'Leit ginn. Ech mengen, dass et derwäert ass, déi lwwerleung do ze féieren, zemools zweek Méint eppes anescht ass wéi ee Mount. An dann hätt een awer vläicht bei méi Leit e schwéiere Verlaf verhënnert, oder dass se eventuell souguer gestuerwe wä- ren.

Dir Dammen an Dir Hären, nee, mir sinn nach net duerch de Bësch! D'Onsécherheet bleift, an de Manktum u Wësse bleift weider eise Begleeder. Et ass leider nach net un der Zäit, eis besteeënd Mesuren opzelockeren, och wann et schwéierfällt. Mir brauche weider Gedold an Zäit, fir déi néideg Léieren aus der aktueller Situatioun ze zéien a besser ze wëssen, wéi et sech mam Virus a virun allem eebe mat de Mutatiounen verhält.

A wann ech de Bericht, deen och schonn ugeschwat ginn ass, vun der Taskforce vun haut de Moie liesen, dann dierfe mer och net zécken, wann et esou wäit ass, fir weider Mesuren ze huelen, wann d'Situatioun dat verlaangt. Séiert Handeln ass dann ugesot. Mir mussen dat ganz séier maachen, well hei zielt all Dag: Haut ass d'Situatioun esou, a muer ka se anescht sinn. Duerfir musse mer déi Evolutioun wierklech ganz gutt am A be- halen. Et muss een awer och soen, dass déi Task- force och net ëmmer Recht hat mat all hire Previsiounen, déi se bis elo gemaach huet, soss wiere mer bei enger vill méi héijer Zuel vun Doudegen.

Ee leschte Saz, Dir Dammen an Dir Hären: Ech hunn et e ganz, ganz staarkt Zeeche fonnt, dass Lëtze- buerg Leit a Portugal geschéckt huet, fir do ze hël- lefen an där extreem schwiereger Situatioun, déi se haut a Portugal hunn. Ech hunn dat ganz grouss fonnt, an och dat wollt ech eng kéier hei ernimmen.

Ech ginn heimadder den Accord vun der LSAP zu dësem Gesetzesprojet. Merci fir d'Nolauchteren!

■ **Plusieurs voix.** - Très bien!

■ **M. Fernand Etgen, Président.** - Merci villmools dem Här Georges Engel. An da wier et un der honorabler Madamm Josée Lorsché. Madamm Lorsché, Dir hutt d'Wuert.

■ **Mme Josée Lorsché (déi gréng).** - Merci, Här President. Ech kann et net oft genuch widerhuelen, et ass schonn dräimol gesot ginn - vum Rap- porter, deem ech villmools Merci soe fir säi Rapport, vum Gilles Baum a vum Georges Engel -: Jo, mat de Moossnamen, déi mer haut verlängeren, ass et wierklech gelongen, d'Evolutioun vun der Pandemie ze kontrolléieren. A mir kënnen haut och feststel- len, datt d'Infektiounszuelen zanter hirem Akraaft- triede sensibil erofgaange sinn an datt déi expo- nentiell Dynamik vun der Pandemie gebrach ginn ass. An esou steet et dann och richtegerweis am Exposé des motifs vun dësem Projet de loi. An et ass och richtig, datt Lëtzebuerg am Verglach zu anere Länner besser dosteet - och dat ass virdu- gesot ginn -, wat den Inzidenztaux, d'Bettbelegung an de Spideeler an d'Stierfäll ugeet. Esou wäit, esou gutt.

An awer ass et och an eisen Aen net un der Zäit, fir opzeootmen an d'Moossnamen ze lackeren. Éisch- tens, well d'Zuele sech op ze vill engem héijen Ni- veau agependelt hunn, Tendenz llicht steigend. Zweetens, well mer mat Onsécherheeten ze dinn hunn, wat d'Konkurrenzkämpf um Impfstoffmaart ugeet, déi zwar elo manner si wéi am Ufank, mee och wat d'Ofstëmmung vun de Strategien um inter- nationalen Niveau ugeet. An drëttens natierlech, well kee weess, wéi de Virus sech weiderentwé- ckelt a wéi eng Geforen en nach mat sech bréngt.

Dat eenzegt, Dir Dammen an Dir Hären, wat mer aus de leschte Méint eigentlech wëssen, ass, datt d'Wëssenschaft dem Virus stänneg hannendruleeft, net well d'Wëssenschaft ze lues ass - am Fong war se nach ni esou séier wéi an dëser Pandemie -, mee well de Virus eng Eegendynamik entwéckelt huet, déi net vun der Wëssenschaft anticipéiert ka ginn a scho guer net vun der Politik, net emol vun deenen Oberschlaunen.

Beschtt Beispill sinn d'Mutante vum Covid-19, wou net méi spët wéi gëschter nees vun enger neier, finnescher Variant mam Numm Fin-796H rieds- gaangen ass, déi anscheinend net esou gutt mat

PCR-Tester detektéiert ka gi wéi déi aner Mutanten. Dëst emol onofhängeg vun der Erkenntnis, datt déi scho bekannt Mutanten, a virun allem déi brittesch, jo méi ustiechend an zum Deel méi geféierlech sinn an datt d'Erreeger d'Kanner méi staark befale wéi déi Erwuessen, et ass genannt ginn: 14 % ass en héijen Taux, wat de Schoul- a Betreuungssecteur na- tierlech kuerzfristeg an akut virun nei Erausfu- erunge gestallt huet. Educatiounsminister ze sinn, ass, mengen ech, ni ganz einfach, an an enger Pandemie nach vill manner.

■ **Une voix.** - Très bien!

■ **Mme Josée Lorsché (déi gréng).** - Net fir näischt gött um internationalen Niveau virun enger geféier- lecher drëtter Well gewarnt.

Alles dat sinn d'Grënn, firwat mir als Gréng d'Ver- längerung vun de Moossnamen och ënnerstëtzen, wuelwëssend datt et keng 100 Méiglechkeete gött, fir de Virus a Grenzen ze halen an de Mënsche gläichzäiteg en halbweeeg normalen Alldag ze er- méiglechen. Halbweeeg normal, jo, domat mengen ech en Alldag, deen net just aus Schaffen a Kon- suméiere besteet an zumindest e Minimum vu soziale Kontakter, Kultur a Sport erméiglecht, an en Alldag, deen alle Generatiounen gerecht gött.

Domat sinn ech bei der Fro vun der Generatiounen- gerechtgkeet, eng Fro, déi zu Lëtzebuerg nach net esou oft thematiséiert ginn ass, déi awer ëmmer méi wichteg gött, wat d'Pandemie méi laang dauert a wat se méi schued urlicht.

D'Aschränkunge verlaangen nämlech net nëmme- der eelerer Generatioun vill Sacrificer of, virun allem bei de Kanner a Jugendleche riichte se grouss kier- perlech a mental Ravagen un: Datt d'Kanner an déi Jonk trotz eisen éischter fräizüege Reegelen am Verglach zu anere Länner jiddefalls schonn zanter Wochen a Méint op hiert gewinnnt Veräinsliewen an op Fräizäitaktivitéiten am gewinnte Frëndeskrees musse verzichten; datt den Austausch mat hire Frënn kaum nach méiglech ass ausser iwwer digital Medien a sozial Netzwerker, déi net ouni Gefore sinn an déi Jonk virun de Schiermer souzosen im- mobiliséieren, wou déi Jonk awer Beweegung brau- chen; datt et de Kanner a Jonken u Réckzuchsméig- lechkeete feelt, wa se op engstem Raum mat hiren Elteren a Geschwëster liewen, och dat ass e Pro- blem - mee alles dat war laang keen Thema!

An et huet och laang gedauert, bis erkannt ginn ass, datt Depressiounen, mee och Aggressivitéit a Gewaltbereetschaft bei deene Jonke während der Pandemie massiv an d'Luucht gaange sinn. Mëttler- weil vergeet bal keen Dag, ouni datt Pediatere, Kannerpsychiatere an aner Spezialiste sech mat Hëllefriiff an de Medien zu Wuert mellen. Esou huet d'Barbara Gorges-Wagner vum Kanner-Jugendtele- fon nach dës Woch op déi steigend Gewaltbereet- schaft bei Jugendlechen higewisen a fir eng fréi Hëllef plädéiert.

D'Wuerzel vun dëser alarmanter Entwécklung läit- daran, datt d'Liewe vu ville jonke Mënschen an en- ger ganz entscheidender Entwécklungsphas sou- zosen agefruer ginn ass a viles net méi nogeholl ka ginn. Net anescht ass et bei de Léierdefiziter an dem Mangel u sozialen Interaktiounen, déi duerch zoue Schoulen entstinn. An duerfir ass eng Schoul ouni soziaalt Mateneen op Dauer weeder tragbar nach zoumuttbar.

Här President, domat wëll ech eng weider kéier ën- nersträichen, datt déi gréng Fraktioun fir oppe Schoule steet an d'Decisioun vun der Regierung voll a ganz ënnerstëtzt, no der Vakanz nees zum Pre- senzunterrecht iwwerzegoen.

Doriwwer elaus begrësse mer och, datt elo eng Zort Stufeplang fir den Educatiounssecteur virläit, deen d'Moossnamen am Fall vu massiv steigenden Infektiounen an enger oder méi Schoulen oder awer an enger ganzer Gemeng definéiert. Dat erlaabt, sech op deen Zenario virzebereeden, woubäi ech awer net verheemleche wëll, datt Pabeier gedëlle- g ass: An der Praxis ass d'Organisatioun effektiv net ëmmer esou einfach, wéi se um Pabeier ausgesäit. A grad dowéinst muss den Dialog tëschent alle Partner groussgeschriwwe ginn an d'Hëllefss- telung vun den Autoritéite grad esou.

Datt deen Dialog guer net esou schlecht ass, wéi e vu verschiddene Säiten duergestallt gött, kann ech eigentlech aus der Praxis bezeien, jiddefalls wat d'Gemengen ugeet, wou och de Syvicol mat am Boot ass a wou souwuel d'Regionaldirektioun wéi och d'Schoulkommiteeën an d'Gemengeservicer ze- summe vill gutt Aarbecht leeschten an alleguer hir Verantwortung iwwerhuelen.

■ **Une voix.** - Très bien!

■ **Mme Josée Lorsché (déi gréng).** - Dir Dammen an Dir Hären, erlaabt mer e Wuert zu der legaler Basis vun de Bestëmmungen, déi jo méi an d'Schlagzeile gero- de war. Jo, effektiv ass bei dësem Projet de loi eng gewësse Verwirrung, ech kéint och soen Hick- hack, opgetaucht, well Brochdeeler vum Educa- tiounssecteur an d'Santésgesetz agefloss waren, déi aus verfassungsrechtleche Grënn dann nees zum Deel hu misse gestrach ginn.



Domat bleibt et zum groussen Deel dobäi, datt d'Regierung weiderhin eegestänneg reegelt, wéi déi staatlech Institutioon mam Numm „ëffentlech Schoul“ an der Pandemie intern organiséiert gëtt, natierlech op Basis vun eise Schoulgesetzter, déi awer nach ëmmer a Stee gemeesselt sinn an déi net an Zäite vun enger Pandemie geschriwwé gi sinn. Se konnten der Pandemie dofir och net Rechnung droen.

Wat de privaten Deel vum Kanner- a Jugendsektor ugeet, sou gëtt weiderhin op Recommendationen, Verhandlungen a finanziell Ënnerstützung gesat. Well d'Chamber bei dësen Decisiounen eigentlech da contouréiert gëtt, wéi dat dann och gesot gëtt, kann een dës Approche vum demokratesche Standpunkt hier natierlech op eng Manéier kritiséieren - den Här Wiseler huet dat och gemaach -, quitte datt de Staat, an dat muss een och betounen, nach ëmmer fir den interne Fonctionnement vun de Schoulen zoustänneg war. Et gëtt also kee ganz neie Moment. Am Fong befanne mer eis hei op enger Gradwanderung tëschent Pragmatismus a juristeschem Formalismus.

Relevant ass fir eis als Gréng awer virun allem, datt et hei net drëms geet, d'Demokratie ausser Kraaft ze setzen, mee Decisiounen ze huelen, déi dem Schutz vun de Kanner a Jonken zegutt kommen a séier gräifen. Wann d'Regierung nämlech decidéiert, ënner schwierere sanitäre Konditiounen um Presenzunterrecht festzehalen, dann ass dat net eng Decisioun géint d'Demokratie, et ass eng Decisioun fir d'Kanner a fir hir Zukunft! Net anescht ass et a méi akute Situatiounen, wou et wichteg ass, datt d'Decisiounen esou séier wéi méiglech ëmgesat kënne ginn, fir datt se och deen néidegen Effekt esou séier wéi méiglech hunn.

Dann nach e Wuert zu der genereller Maskepflicht an de Schoulen, wou an de sozialen Netzwerker jo neierdengs vun Elteren drop higewise gëtt, datt d'Maskepflicht en No-Go wier. Eltere beschwéiere sech, datt d'Kanner dorënner leiden, an dat geet méttlerweil esou wäit, datt eng Rei Elteren op Facebook dozou opgeruff hunn, d'Kanner net méi an d'Schoul goen ze loossen, wa se eng Mask müssen unhunn, wat emol scho weinst der Schoulpflicht illegal wär. Djuna Bernard an ech hunn och eng Question parlementaire dozou gestallt.

Där Suerg muss een dann awer d'Fro entgéintstellen, wat méi schlëmm ass: de Schoulalldag zwar mat enger Mask, dofir awer zesumme mat de Schoukolleegen a wichtige Bezugspersonen ze verbréngen oder stonnelaang doheim ënner munchmol schwierere Konditiounen beim Bildscherm ze dëmpelen. Mir plädéiere fir déi éischt Optioun. A firwat net och emol d'Stëmm vun de Kanner a Jonken zu deem Thema héieren?

Här President, Dir Dammen an Dir Hären, datt weider Infektiounsclusteren duerch d'Maskepflicht an de Schoule komplett verhënnert kënne ginn, ass natierlech eng Illusioon. Allerdéngs muss dës Risiko esou niddreg wéi méiglech gehale ginn, a grad duerfir ass et wichteg a richtig, souwuel d'Tester wéi och den Tracing am Schoul- a Betreuungssektor ze verstärken.

Am Verglach zum Ausland lafe mer der Entwécklung hei e Stéckelchen hannendrun. Ech denken zum Beispill un d'Spaut- an d'Guergelschnelltester, déi an éisträichesche Schoule scho konsequent zum Asaz kommen. An och an Däitschland gi méttlerweil Schnelltester agesat, déi grad esou sécher vu Privatpersounen duerchgefouert kënne gi wéi vu medezinneschem Personal.

Quitte datt Lëtzebuerg hei nach e gewëssene Réckstand huet, si mir awer frou, datt sech laut den Aussoe vum Thomas Dentzer, dem Koordinator vun der Krisegestioun an der Santésdirektioun, och zu Lëtzebuerg gläich nei Méiglechkeete wäerten opdi bei de Schnelltester. Nieft de Schoule kënnen dës Tester dann och konsequent an den Alters- a Fleegeheemer agesat ginn, wat e laang erwaarte Fortschritt bedeit an de Wee an d'Normalitéit wäert erliichten.

Ech kommen elo zum Sektor vun den Alters- a Fleegeheemer a vum Drëtten Alter generell: Wat d'Bewunner vun dësen an anere Strukturen aus dem ASFT-Sektor ugeet, sou gesäit dës Projet de loi jo vir, datt d'Date vun de Bewunner eemol am Mount un d'Santé iwwermëttelt muss ginn. D'Zil ass bekannt. Et besteet doran, d'Evolution vun den Ustiechunge besser ze analyséieren an der Santé gläichzäitig déi néideg Donnéeë fir den Tracing a fir d'Impfungen zur Verfügung ze stellen.

Dëst ass sënnavoll, mee nawell stellt sech d'Fro, wéi all déi aner sougenannt vulnerabel Persounen effikass detektiéiert kënne ginn, déi net an esou enger Struktur liewen, a wat de Begrëff vulnerabel iwwerhaapt bedeit. Hei ginn d'Meenunge liicht ausereen.

Vum Santéministère si wuel eng Rei Pathologien definéiert ginn, déi an d'Kategorie „vulnerabel“ fallen a bei der Impfung Prioritéit kréien. D'Konditioun ass, datt d'Spideeler an d'Dokteren déi perséinlech Date vun dësen Patienten un d'Santé weidercommuniquéieren.

Laut dem Lëtzebuerger Mikrobiolog an Epidemiolog Michel Pletschette, deen och Fuerscher op der Uni München ass, limitéiert d'Vulnerabilitéit sech awer net eleng op dës Pathologien. Dat ass och eng Saach vun Interpretatioun. Laut him missten 20 % bis 40 % vun de Patienten, jee no Definitioun, als méi oder manner vulnerabel agestuft ginn. An duerfir wier et a sengen Ae méi effikass, d'Date vun der CNS iwwert d'Administratioun vun de Medikamenter ze consultéieren, fir déi vulnerabel Mënsche besser kennen ze identifizéieren.

Wann een da weess, datt d'EU-Datenschutzverordnung am Artikel 9 ausdrécklech erlaabt, datt persounbezunne Gesondheetsdaten am Fall vun enger sanitärer Kris veraarbecht dierfe ginn, da muss ee sech froen, ob Lëtzebuerg dann elo op dee Wee soll goen oder net an awéiwäit dës Approche awer mam Datschutz vertriebbar wier, quitte datt d'EU-Verordnung et zouléisst.

D'Impferfolger vun Israel a Groussbritannien si jiddefalls net nëmmen op déi disponibel Quantitéit vun Impfstoff zréckzeféieren, mee och dorop, datt d'Autoritéiten net op d'Kommunikatioun vun de Spideeler an den Dokteren ugewise waren. A Groussbritannien sinn déi vulnerabel Persounen vum ëffentlechen nationale Gesondheetsservice erfaast ginn, an Israel vun de véier besteende Krankeeseen. Duerfir eis Fro un Iech, Madamm Minister, wéi Dir zu där Approche stitt. Ech denken, et ass ëmmer eng Diskussioun wäert.

An deem Kontext wier et och net oninteressant, iwwer méi e flexibelen Émgang mat den Impfdosen nozedenken - ech mengen, de Georges Engel hat och virdrun dovun geschwat. D'Intervallen hutt der ugeschwat, Här Engel, esou wéi de Virolog Claude Muller vum LIH dat och geschter an engem Interview am „Tageblatt“ ugestouss huet. Alles an allem muss et jo drëms goen, méiglechst vill vun deene gefäerte Mënsche virun engem schwéiere Krankheitsverlaf ze schützen an domat méi Sécherheet a méi Gewëssheet an der Gesellschaft ze schafen, mee och méi Sécherheet a Gewëssheet fir d'Spideeler.

No laange Méint vu grousser Ongewëssheet an Onsécherheet ass et op alle Fall normal, datt d'Sich no Gewëssheeten a Sécherheet, wéi zum Beispill grad de Schutz duerch d'Impfung, bei ville Leit ëmmer méi grouss gëtt, virun allem bei deene virbehaaschte Patienten. D'Definitioun vun eendeitege Risikogruppe bitt an dëser Situatioun scho ganz sécher eng gewësse Sécherheet a bitt der Politik op där anerer Säit och d'Chance ze bewiesen, datt se handlungsfäeg ass.

Ongewollt Nieweneffekter dierfen dobäi awer net ignoréiert ginn, wat keng medezinnesch Remark ass, mee eng Remark, déi gesellschaftspolitescher Natur ass. Esou zum Beispill besteet eng Gefor bei der stereotypen Klasséierung vun eelere Mënschen an d'Grupp vun de Vulnerabelen. Domat stellen ech net a Fro, datt eeler Leit prioritär geimpft solle ginn, dat ass de medezinnesche Volet. De gesellschaftspolitesche Volet ass awer en aneren: Esou hëllefärich dës Approche nämlech am Kampf géint d'Pandemie ass, esou geféierlech ass dat neit Bild vum defizitären Alter op där anerer Säit eebe grad aus gesellschaftspolitescher Siicht.

Dat neit Bild vum eelere Mënsch steet nämlech a klorem Widdersproch zu der moderner Seniorepolitik aus de leschte Joren, wou den Alter eigentlech net méi mat Krankheet, Virsuerg, Fragilitéit oder Hëllefbedierftegkeet gläichgesat ginn ass. D'Altere stoung an de leschte Jore fir d'Kompetenz, d'Potenzial, d'Autonomie an d'Selbstbestimmung vun eelere Mënschen. Net fir näischt huet d'EU d'Joer 2012 zum europäesche Joer vum aktiven Alteren a vun der Solidaritéit tëscht de Generatiounen erkläert.

D'Wärter, déi domat verbonne gi sinn, dierfe mir an der Pandemie net aus den Ae verléieren. A mir dierfen och net vergiessen, datt de Kampf géint d'Pandemie ëmsou besser gräift, wat d'Generatiounen méi solidaresch sinn. Dozou gehéiert dann eebe grad och d'Diskussioun ronderëm d'Generatiounegerechtegkeet, déi an Zukunft net ze kuerz dierf kommen, well mir mussen verhënnern, datt déi Jonk zu de gréisste Verléierer vun dëser Pandemie ginn. A wa mer op där enger Säit dem Här Wiseler Recht ginn, datt mer iwwert de Wuesstum an eis Produktiounsmethode mussen schwätzen, dierfe mer och déi gesellschaftspolitesche Aspekter net vergiessen.

Domat ginn ech den Accord vun der grénger Fraktioun a soen Iech Merci.

■ **M. Fernand Etgen, *Präsident*.** - Merci villmools, Madamm Josée Lorsché. Nächsten ageschriwwene Riedner ass den honorabelen Här Jeff Engelen. Här Engelen, Dir hutt d'Wuert.

■ **M. Jeff Engelen (*ADR*).** - Merci, Här President. Léif Kolleeginnen a Kolleegen, erlaabt mer, fir unzefänken, en härerleche Merci ze soen dem Kolleeg Mars Di Bartolomeo fir säi schrëftlechen a mëndleche Rapport.

(Mme Djuna Bernard *prend la présidence*.)

Haut decidéiert d'Chamber fir déi x-te Kéier nei Moosnamen am Kader vun der sanitärer Kris. Et muss een dëst Gesetz op zwee Volete kucken: Engersäits behale mer praktesch all déi al oder déi viregt Moosname bäi, an op där anerer Säit kommen nei Moosname bäi a Prezisiounen speziell am Beräich vun der Schoul, dem Sport an dem Datschutz, wat mer deels begreissen.

Mir begreissen och als ADR d'Verbesserung vun den neien Hëllef fir d'Entreprise, an zwar huet dat net direkt eppes mat dësem Gesetz ze dinn, mee den Horeca hänkt awer hei mat dran, an duerfir wëll ech heirobber agoen. Dat kënnt zwar an engem anere Gesetz, mee erlaabt mer an dësem Kader vun de Moosname fir eis Betriber eng Suggestioun. Vill Entreprise hu jo bekanntlech Schwieregkeeten, fir sech hei erëmfannen. Et gëtt sech dobausse riets a léns beklot, wat mer och verstinn. Et gëtt wuel den Apperçu vun all dësen Hëllefsmoosnamen op engem Site, mee deen ass awer - ech war dat geschter emol kucken - e bëssen iwwerflächlech a fir mech och net prezis genuch.

Wär et hei net ubruecht, nom Virbild vum CCSS oder de Pensiounskeesen, eng Opstellung ze maache vun dëser Panoplie vu Moosnamen - esou huet den Här Mëtzelstandminister, den Här Lex Delles, déi Saache jo genannt - an do och ze publizéieren? Wou een eng kuerz Beschreiwung fënnt an duerno en direkten Zougang op de betreffende Formulaire. Et gëtt et wuel um Site, mee wann ee sech derduerchwullt, ass et awer komplizéiert. Net geüübte Kräfte ginn iwwerhaapt net eens dermat, a geüübte Kräfte - ech hu mer déi Deeg vun engem soe gelooss, hien hätt annerhallef Stonn gebraucht, fir ee Formulaire auszefüllen, fir sech derduerchzewullen.

Bon, ech si kee Fachmann an deem Beräich, mee datt ass e jonke Kärrel vun ëm 25 bis 30 Joer, an ech kéint mer virstellen, datt deen awer e bësse méi bewandert ass mat deene Saachen am Internet wéi ech. Ech mengen, dat soll eis ze denke ginn. Och déi Kloen, déi dobausse sinn an déi Onzeffriddenheet, dat muss mer e bëssen aschränken a mir müssen de Leit entgéintkommen. Mer hu jo e System beim CCSS a bei de Pensiounskeesen, wou et einwandfrei fonctionéiert, wou souguer ech dermat eens ginn. Dat géif vill Onsécherheeten an Onzeffriddenheeten zréckschrauwen. An ech mengen, et wier awer derwäert, fir sech op d'mannst eng Kéier Gedanken ze maachen, fir an dee Beräich emol kucken ze goen.

Mir als ADR poche weiderhin dorobber, datt eis elementar Grondrechter agehale ginn, a schwätzen eis géint d'Ausgangsspär aus, déi eiser Meenung no misst opgehuewe ginn. Och Gerichter, zum Beispill an Holland oder och deelweis an Däitschland, jee no Bundesland, hu rezent Urteeler gesprach, wou d'Legalitéit vun den Ausgangspären a Fro gestallt gëtt. Hei gëtt argumentéiert, datt de Moment keng akut Noutsituatioun méi besteet an d'Ausgangsspär eng strikt Aschränkung vun de Beweeungsfreiheete vun de Leit am Privatliwen ass.

Souwuel d'Ausgangsspär, wou fir de medezinnesche Succès bis elo nach kee Beweis virläit, wéi och zum Beispill d'Limitatioun op zwee Leit aus deem selwechte Stot, déi een dierfe besiche goen, stelle mer a Fro. Zwee Leit gi bei véier Leit, dat mécht sechs Leit, dat ass erlaabt. Dräi oder véier Leit, nach aus deem selwechte Stot, gi bei zwee Leit, dat ass verbueden. Dat ass fir d'ADR onlogesch an och fir déi meeschte Leit net ze verstoen a stellt en Agrëff an déi garantéiert Grondrechter vun eiser Verfassung duer.

An eiem Rechtsempfannen ass de Staat zoustänneg, fir d'Liewen am ëffentleche Raum esou wäit wéi néideg an esou mann wéi méiglech ze organiséieren. Aus dem Privatliewe vun de Leit soll a muss de Staat sech awer eraushalen. A wann dat muss gemaach ginn, da misst hei an der Chamber fir dës Moosnamen, déi an der Verfassung verankert sinn, och eng Zweedréttelmajoritéit heiriwwer befannen.

Den Horeca-Beräich bleibt zou, an dës Beräich ass ëmmer als keen Hotspot bezechent ginn a si hu sech all penibel genau un d'Sécherheitsmoosname gehalen, wat dës Sektor och nach vill Geld kascht huet. Elo si se awer zougemaach ginn, an op där anerer Säit bleiwe grouss Akafszentren oder de Beräich vum ëffentlechen Transport op.

D'ADR ass dowéinst dergéint, datt d'Restauranten an d'Caféen zougemaach ginn. Et wär sécher méiglech gewiescht, mat deenen néidege Sécherheitsmoosnamen, datt dës Sektor an engem gewëssene Kader hätt kënne viru fonctionéieren.

Mat dësem Aktionismus vun der Regierung, deen net wëssenschaftlech fondéiert ass, verschlëmmert d'Regierung dogéint nach emol déi déif ekonomesch a sozial Kris, an déi eist Land erageréit. Vill Leit aus dem private Sektor, a besonnesch déi, déi am Horeca-Sektor schaffen, ginn an der Kuerzaarbecht nëmmen zu 80 % indemniséiert. Grad an esou engem Sektor stellt och d'Dränkeld een

Deel vum Akommes duer. Dës „manque à gagner“ féiert zu ganz vill Nout a Suergen.

D'ADR hat dowéinst an der Chamber proposéiert, datt dës Indemniséierung am Kader vun der Covid-19-Kris bis zu engem bestëmmte Plaffong op 100 % misst gehuewe ginn. Leider hat jo keng Partei dës sozial Initiativ ënnerstëtzt. Domadder wäert an Zukunft d'Aarmut hei am Land leider Gottes nach weider eropgoen.

Et muss ee sech och d'Fro stellen: Wéi laang packe mer dat nach finanziell? Fir Suen an eis Staatskeess ze kréien, ass et jo vu Virdeel, wann eis Ekonomie méiglechst vill schafft. Bei dëser Kris vum Covid mussen mer op dräi Aspekter genee oppassen: Éischtens, dem Gesondheetsssektor e Maximum zur Verfügung ze stellen, fir d'Gesondheet vun all eise Bierger ze garantéieren. Zweetens, mer müssen och de rechtsstaatlechen Aspekter Rechnung droen; mir si jo a Friddenszäiten an net an engem Krichszoustand. Drëtzens, eis Ekonomie muss zu engem Maximum dréien, well mir dierfen dat Finanziellt net aus den Ae verléieren. Dës dräi Punkten, dat ass dee Spagat, andeem mer eis beweege.

Fir d'ADR ass et kloer, datt mer déi aktuell Politik am Kader vum Covid mussen generell iwwerdenken. Mir dierfen net vergiessen, datt vill Leit och ënner enger Verschlechterung vun hirer mentaler Gesondheet leiden. Esou huet dat jo och eng Analys vun dem Statec erginn. An ech mengen, wann een Drëtzel vun de Leit hei zu Lëtzebuerg uginnt huet, datt si duerch dës Kris psychesch an enger schlechter Verfassung sinn - a bei deene Jonken ass dat nach méi héich -, esou muss eis dat awer ze denke ginn a mer müssen dës Suergen och eescht huelen. Et muss een och ewell feststellen - dat hu Kolleegen a Frënn mer zougedroen -, datt dësen Effekt vun der mentaler Gesondheet sech elo scho lues a lues a verschiddene Fäll am Privatliewe bemierkbar mécht. Ech mengen, dat muss een och mat eranhuelen.

An all dës Mesurë sinn also geholl ginn, well anscheinend eis Intensivbetter un eng Grenz kommen. Am Fréijoer war gesot ginn, mir hätten 200 regulär Intensivbetter an de Spideeler an 100 an engem Feldlazarett. Haut si mer mat 44 Covid-19-Intensivbetter scho bei 50 % Auslaaschtung, dat heescht, mir hunn nëmmen 88 Intensivbetter. Wou sinn déi aner 112 Better an de Klinikken - ech schwätze just vun de Klinikken - hikomm?

Mir missten och zousätzlecht Personal hunn - am Summer wier d'Méiglechkeet gewiescht, fir déi e bëssen ze schoulen -, zousätzlecht Personal fir d'Intensivfleeg, well mir wëssen alleguerten, datt déi zweet Well elo hannert eis, ass a vun där drëtter Well hu jo och scho Kolleeg virdu geschwat. Et wier dann eng reng Virsiichtsmoosnam, fir an deem Beräich aktiv ze ginn.

Wat d'Schnelltester ubelaangt, ass jo am Prinzip alles gutt, a mir begreissen dat. Mee d'Fro stellt sech awer: Wéi zouverlässeg sinn dës Tester? Dacks gi se haut gelueft, a muer ass et just de Contraire.

Nach ee Wuert zu den Impfungen ... Ech gesinn, meng Zäit leeft mer fort. Ech mengen, bei mir geet ëmmer d'Auer méi séier wéi bei deenen aneren, Här President.

■ **Une voix.** - Dat ass Är Riedezäit.

(Brouhaha et hilarité)

■ **M. Jeff Engelen (*ADR*).** - Et ass scho méi dacks gesot ginn: D'Impfung ass leider déi eenzeg Méiglechkeet, fir dem Covid Meeschter ze ginn an erëm deels zu engem normale Liewen zréckzekommen. Mee och hei warne mer virun allze vill Erliichterung bei der Zouloosung vun dësen Impfstoffen. De Bierger soll seng Entscheedung a voller Transparenz kënnen huelen, ob hie sech impfe léisst oder net. Hei misst eng méi intensiv Informationscampagne gemaach ginn.

Mir poche weiderhin op d'Fräiwëllegkeet, wat d'Impfungen géint de Coronavirus ugeet. Och wann et an der EU keng Impfflicht soll ginn, esou hält awer den Drock op d'Mënsche, fir sech impfen ze loossen, europawäit zou. Duerfir erënnere mir un eng aktuell Resolutioun vum Europarat mat der Nummer 2361/2021: Do heescht et, datt d'Impfung géint de Covid-19 net obligatoresch dierfe sinn an datt d'Leit, déi sech net impfe wëlle loossen, net diskriminéiert dierfe ginn.

Europa fuerdert weider d'EU an d'Memberstaaten op, datt d'Bierger informéiert an dës Impfung ginn an et keng Mussesaach dierf ginn a se kengem politeschen, sozialen oder aneren Drock ausgesat ginn, fir sech fräiwëlleg impfen ze loossen - jo oder neen.

Mir hätten och nach gären déi Analys vun der Effikassitéit vun de Large-Scale-Tester. De Large-Scale-Testing geet elo ugangs Mäerz an déi drëtt Phas.

■ **Une voix.** - Denkt un Är Riedezäit!

■ **M. Jeff Engelen (*ADR*).** - An hei fält op, datt et vun Experten heiheim - vun Experten heiheim, betou-

Wat de Punkt Transparenz ugeet, begrësse mer, datt d'Santé dës Woch an hirem Wocherapport endlech eng Tabell mat all de virgesinne Liwwerunge bis Enn Mäerz publizéiert huet, soudatt sech déi passend Question parlementaire dozou eriiwwregt,



well endlech emol eng Kéier proaktiv kommuni-
zéiert gouf. Dat ass hoffentlech elo och an Zukunft
de Fall, wa weider Vaccinen autoriséiert ginn.

An deem Kontext wéilt ech d'Ministeschen froen, ob
et net vläicht och méiglech wär, datt och den ak-
tuelle Stock mat am Rapport publizéiert gëtt, fir
datt d'Leit net nëmme wëssen, wéini mer wat
kréien, mee och, wéi vill Vaccin am Moment nach
verimpft ka ginn. Et kann een et zwar errechnen,
mee ech mengen, datt dat bei enger ganzer Rëtsch
Leit dach op Interessi géif stoussen.

Am Kader vun der Transparenz muss ech dann
awer och soen, datt mer an der Lescht ëmmer méi
vu Gemengeverantwortlechen héieren, déi sech un
d'Press adresséieren, well se hiren Hänn kee Rot
méi wëssen, wéi dann d'Infektioungsgescheeën an
hire Gemengen ass. Ech verstinn, datt déi Don-
néeën net op der Place publique grouss diskutéiert
solle ginn. Ech verstinn, datt déi Kaart mat de Kan-
toner fir d'Effentlechkeet eng gutt Basis ass. Ech
sinn awer och der Meinung, datt ee Buerger-
meeschteren a Schafferéit muss kënnen zoutrauen,
iwwert d'Infektioungsgescheeën an hire Gemenge
méi detailléiert informéiert ze ginn, fir eeben och
kënnen ze reagéieren. A grad elo, wou et ëm
d'Schoule geet an ëm d'Schoulplanung, mengen
ech, ass dat néideg. Duerfir hunn ech eng Motioun
matbruecht, déi genau dat freet, datt eeben
d'Schafferéit eemol d'Woch e Rapport kréien, wéi et
an hire Gemengen ausgesäit, deen natierlech net fir
d'Effentlechkeet bestëmmt ass.

Här President.

Motion 1

D'Deputéierte Chamber stellt fest,

*- dass d'Infektiounsuelen op lokalem Niveau séier
kënnen no ënnen oder no uewe schwanken;*

*- dass d'Santé all Dag ee Rapport zu den Infek-
tiounsuele verëffentlecht;*

*- dass d'Maison relais an d'Crèchen oft vun de Ge-
menge verwalt ginn;*

*- dass bei erhéichten Infektiounsuelen an enger Be-
treiungsstruktur séier muss gehandelt ginn.*

*Aus dëse Grënn invitéiert d'Deputéierte Chamber
d'Regierung,*

*- dass d'Gemengeresponsabel all Woch ee Rapport
mat Informatiounen zu dem Infektioungsgescheeën
an hirer Gemeng kréien an och informéiert ginn, soll-
ten Infektiounsketten an der Gemeng optauchen.*

(s.) Sven Clement.

■ **M. Fernand Etgen, Président.**- Merci, Här
Clement.

■ **M. Sven Clement (Piraten).**- Här President, leider
existéieren awer och Punkten an dësem Gesetz,
mat deene mir nach ëmmer net kënnen averstane
sinn. Dozou gehéiert de Stufeplang, géint deem
seng Aféierung d'Regierung sech awer nach ëmmer
wiert.

Mir Piraten halen awer un eiser Fuerderung fest,
datt d'Regierung eis an der ganzer Bevëlkerung
esou e Plang sollt virleeën - virleeën, no wéi enge
Krittäre wéi eng Entscheedunge wéini getraff ginn.
Well mir zweifelen dorunner, datt esou wichteg De-
cisione sollen nom Bauchgefühl getraff ginn. D'Re-
gierung weess ganz genau, ab wéi enger Zuel vu
beluechte Better an de Klinicken a positive PCR-
Tester muss gehandelt ginn.

An Däitschland gouf d'Inzidenzzuel elo vu 50 erf
op 35 gesat. Ob dat gutt ass oder schlecht, wëll
ech hei haut net kommentéieren. Mee et weist, datt
ee kloer Krittäre fir d'Populatioun ka festhalen, un
deene sech d'Bierger kënnen orientéieren, ouni datt
dës Krittären awer a Stee gemeesselt musse sinn
an ni dierften ugepasst ginn. D'Situatioun huet sech
verännert, also huet d'Kanzlerin mat de Lännerchef-
fen en neie Wäert festgelegt. Also d'Argument, fir
weiderhin ze soen, datt Situatioun ze komplex ass
an datt ee sech net op eng oder méi Zuele festleeë
kann, ass domat a mengen Aen elo wirklech wid-
derluecht.

D'Regierung muss ophalen domadder, just déi Infor-
matioun erausginn, déi se wëllt erausginn. Mir
sinn net méi am État de crise, wou eenzeg an eleng
d'Regierung d'effentlech Meinung virginn huet. An
engem Rechtsstaat, wou d'Meenungsfräiheet an
d'Pressefräiheet am Grundgesetz verankert sinn,
muss d'Regierung de Pluralismus u Meinungen am
effentlechen Debat schützen an net ënnergrüewen.

D'ALJP (ndlr: Association luxembourgeoise des
journalistes professionnels) - an de Kolleeg Marc
Baum huet virdu schonn driwwer geschwat - huet
d'lescht Woch e kloeren Appell un d'Regierung ge-
maach, wat d'Veëffentlechung vun de Presse-
konferenz betréift, an deene Kriteschen Froe vun de
Reporter einfach ganz ausgeblent ginn. An och no
dëse Kritticken ass d'Pressekonferenz vum Mëttel-
standsminister awer erëm ouni d'Froe vun de Jour-
naliste publizéiert ginn. Déi Pressekonferenzen
däerfen net zur Selbstinzenierung mëssbraucht
ginn! Dat heiten ass kee Marketing an et ass och
kee Walkampf. D'Leit brauchen ongefiltert kriteschen

Informatioun. D'Froe vun de Journalisten an d'Froe
vun de Bierger si grad esou wichteg wéi d'Riede vir-
dru vun de Ministeren.

Ech bieden duerfir ausdrécklech drëms, do schleu-
negst erëm dee ganze Video um offizielle Kanal ze
publizéieren an net nëmmen déi gekierzte Versioun
mat de Riede vun de Ministeren. A fir dat ze ënner-
mauern, an ech hoffen och op breede Support am
Sënn vun der Pressefräiheet, hunn ech och eng wei-
der Motioun matbruecht, déi genau dat fuerdert.

Här President.

Motion 2

D'Deputéierte Chamber stellt fest,

*- dass d'Regierung an hirem Koalitiounsaccord fest-
gehalten huet : « il sera veillé au maintien d'un ser-
vice public dans les médias audiovisuels qui ré-
ponde aux standards les plus élevés en ce qui
concerne la qualité des programmes et de l'informa-
tion »;*

*- dass d'Regierung an hirem Koalitiounsaccord fest-
gehalten huet: « afin de permettre le traitement dans
les meilleurs délais des requêtes journalistiques et
de garantir les flux d'informations, les moyens né-
cessaires seront mis en œuvre en étroite collabora-
tion avec le Conseil de presse et les associations
professionnelles des journalistes »;*

*- dass Biergerinnen a Bierger ee Recht hunn op all
d'Informatiounen, déi während de Pressekonferenz
matgedeelt ginn.*

*Aus dëse Grënn invitéiert d'Deputéierte Chamber
d'Regierung,*

*- d'Pressekonferenz vun all de Regierungsmembere
mat all de Froe vun de Journalisten a Journalistin-
nen an den Äntwerte vum Minister oder der Minis-
teschen op den offizielle Kanal vun der Regierung ze
verëffentlechen.*

(s.) Sven Clement.

■ **M. Fernand Etgen, Président.**- Merci.

■ **M. Sven Clement (Piraten).**- Här President, léif
Kolleeginnen a Kolleegen, eng Dispositioun mussen
a wäerte mir Piraten an dësem Covidsgesetz wei-
derhi kritiséieren an dat ass d'Ausgangsspär. Wéi
jiddereen heibanne bestëmmt weess, huet en hol-
lännescht Verwaltungsgeriicht d'Ausgangsspär en
Dënschden kuerzzäiteg ausgesat. Jo, d'Gericht
huet dat an Holland gemaach, well do d'Parlament
net consultéiert gouf. Ech fannen dat nach méi
grav, datt een de Courage do hat, als Regierung ze
soen: „Ma bei esou enger grondrechtsaschneiden-
der Fro consultéiere mer d'Chamber net.“ Do muss
ech eis Regierung luewen, datt se dat glécklecher-
weis net probéiert. Nichtsdestotrotz huet d'Gericht
awer a sengem Urteel geschriwwen, datt et net pro-
portionell zu der Situatioun an Holland wär an datt
dësen Agrëff an d'Fräiheete vun de Bierger duerfir
net dierft sinn. Dat ass déi zweet Instanz, musst
Der ...

(Interruption par M. Guy Arendt)

Jo, Här Arendt, déi zweet Instanz huet d'Ausgangs-
spär no engem Appell vun der hollännescher Re-
gierung erëm a Kraaft gesat, mee d'Fro bleift: Wat
bréngt eng Ausgangsspär, wann den Horeca an och
soss alles an der Nuecht zou ass an et Kontaktbe-
schränkung gëtt, wou d'Leit net zu méi wéi zwee
Leit bei engem däerfe sinn? An eisen Aen ass déi
Ausgangsspär eng reng Policemesure, déi just
duerfir déngt, ze kontrolléieren, ob d'Leit sech un
aner Dispositiounen halen, mee déi, fir sech geholl,
keen eenzegem Impakt op d'Infektioungsgescheeën
huet!

D'Regierung konnt eis an der Santéskommissioun
nach ëmmer keng wëssenschaftlech Donnéeë vir-
leeën, déi beweisen, datt d'Ausgangsspär eleng ier-
gendeen Effekt op d'Covidzuelen hätt. An awer ginn
d'Fräiheete vun de Bierger weider ageschränkt.

Wat fir Risiken dat zum Beispill a puncto haislecher
Gewalt huet, esou hunn d'Kolleege vun déi Lénk
dëst hei scho méi wéi eemol ugeschwat. Mir fan-
nen, esou laang net bewisen ass, datt déi Aus-
gangsspär en dreiwende Facteur ass, fir d'Infek-
tioungsgescheeë kleng ze halen, an domadder zu en-
ger Verbesserung vun de Covidzuele bäidréit, muss
domadder opgehale ginn, liberticid Moosnamen
als neien Alldag ze etabliéieren. Dat ass okay, wann
et ganz grav ass. Dat ass à la limite okay, wann ee
séier reagéiere muss. Mee et ass op kee Fall okay,
wa mer dat dote quasi als nei Alldagsmoosnam
wouerhuelen.

An duerfir wäerte mir trotz all deene wirklech
gudde Verbesserungen am Text, dësen Text net
kënnen matstëmmen, well mir kënnen esou eng Aus-
gangsspär och weiderhin net droen. Merci.

■ **M. Marc Goergen (Piraten).**- Ganz gutt!

■ **M. Fernand Etgen, Président.**- Merci villmools,
Här Clement.

D'Regierung huet d'Wuert, den Här Premier- a
Staatsminister Xavier Bettel. Här Bettel, Dir hutt
d'Wuert.

Prises de position du Gouvernement

■ **M. Xavier Bettel, Premier Ministre, Ministre
d'État.**- Här President, e grouse Merci fir d'Méig-
lechkeet, haut e puer Wuert un lech ze richten. Ech
hunn och nach dräi aner Regierungskolleegen, déi
d'Wuert wäerten ergräifen. Fir d'éischt den Här
Meisch, fir iwwert de Volet vun der Éducation natio-
nale ze schwätzen, dann de Vizepremier an Trans-
portminister Bausch iwwert déi Fro vum effentle-
chen Transport a vun der Distributioun vun Gel,
wann den effentlechen Transport gebraucht gëtt, an
da selbstverständlech eis Gesondheetsministesch,
déi jo och den Auteur ass vum Text.

Et sinn eng Rëtsch vu Froe gestallt ginn. Ech wäert
elo op déi puer agoen, déi direkt u mech gestallt gi
sinn.

Déi éischt ass déi vun der Groussregioun an och
vun de Kontakter, déi mer mat de Kolleegen haten.
Net méi spéit wéi gëschter Owend hate mer nach e
Sommet vum Exekutiv vun der Groussregioun, wou
mer och en Echange haten. Tatsächlech ass et
d'Volentéit och vun den Exekutive vun der Grouss-
regioun, d'Grenzen net zouzemaachen.

Mir hunn d'Situatioun gesinn, wou am Ausland
Grenzen zougemaach gi sinn, wat net hëlleft. Mir
hunn och scho gesinn, dass de Fait, eng Grenz zou-
zemaachen, mat sech bruecht huet, dass ganz
Liwverkettechen och vu Material, vun Impfstoffer, déi
am Moment jo awer och wichteg sinn, blockéiert
ginn.

D'Diskussioun war iwwert d'Teststrategie. Mir ge-
héieren zu deene Länner, déi säit Méint, Här
President, säit Méint Frontaliere mat testen. Mir
gehéieren zu deenen, déi säit Méint d'Frontaliere
mat impfen, elo an dem Kontext vun der éischter
Phas. Dat ass eng Situatioun, déi een och muss
muss a Betruecht zéien. A wann een ..., wann elo
eng Capitale géif decidéieren, dass ee misst en
Test maachen, da misst een iwwer 260.000 Tester
den Dag, iwwer 260.000 Tester d'Woch maachen
zum Beispill. A mir wësse ganz genau, dass et jo
net méiglech ass, fir déi och kënnen ze maachen.

An do hunn ech och d'Fro gestallt - well ech si ganz
transparent och mat lech -, do hunn ech gesot,
éischters wier et materiell net méiglech an zwee-
tens, wie géif et och bezuelen. Ech hu keng Äntwert
kritt, weeder fir dat eent nach fir dat anert.

Mee de Fait ass, dass zu Lëtzebuerg, mengen ech,
déi Strategie, déi mer hunn, fir d'Frontaliere mat an
de Large-Scale-Testing ze huelen, awer och eng Ak-
zeptanz fonnt huet. D'Iddi ass, zum Beispill elo të-
schent de Fransousen an den Däitschen, do an den
Eurozonen - dat, wat si Eurozonen nennen -, och
Teststatiounen ze maachen. An et géif éischter op
Schnelltester goen, a wann dee positiv wier, dann
op PCR-Tester. Mee wéi gesot, net all Dag, mee dat
op enger regelméisseg Basis, dass do Tester
kéinte kommen. D'Texter ginn elo nach hin an hier,
mee Lëtzebuerg erfëllt, wéi gesot, seng Konditioun,
andeem mir den Netlëtzebuurger, déi heihinner
kommen, och d'Méiglechkeet ginn, getest ze ginn.

A mir wäerten alles maachen, fir dass d'Grenzen
net zouginn, well mir sinn eis bewosst ... A mir
erënnere all eis Kolleegen aus der Grenzregioun
drun, dass, wa se decidéieren d'Grenzen zouzema-
achen - zouzemaachen! -, mir an eng Situatioun kom-
men, wou hei zu Lëtzebuerg d'Spideeler net méi
kënnen fonctionéieren an dass et duerfir wirklech
ganz, ganz wichteg ass, do déi Kontakter och op ze
halen.

■ **Une voix.**- Très bien!

■ **M. Xavier Bettel, Premier Ministre, Ministre
d'État.**- Här President, iwwert d'Impfen: Et gëtt jo
esou eng Légende urbaine, wéi wann d'Lëtzebu-
er Regierung oder de Lëtzeburger Staat am léif-
ste géifen d'Impfungen hamstere. Mir géife se gä-
ren halen a mir géife se jo net ... Mir wieren an den
Zuelen net déi Beschta a mir wiere schlecht. A mir
géife jo d'Hallschent halen. Firwat géife mer d'Hall-
schent iwwerhaapt halen? Solle mer net jiddweren-
gem elo emol alles sprëtzen? An dann ... Il y a de
tout! Ech héiere vun allem. Vun allem!

Mir hu bis haut, um Stand vun haut 14.00 Auer,
26.300 Leit, déi mer kéinten impfen; dat heescht,
wéi Der wësst 52.600 Dosissen, gedeelt duerch
zwee: 26.300. Um Stand haut de Mëttag 14.00 Auer
waren zu Lëtzebuerg geimpft: 22.700 Leit mat
enger éischter Dosis, a 7.400 Leit mat der zweeter
Dosis. Domat hu mir elo Vaccine fir 3.600 Leit am
Stock, wann een elo déi vun deenen ofrechent, Vac-
cine fir 3.600 Leit, déi am Stock sinn.

Et sinn am Moment bis d'nächst Woch nach 600
Residenten an den Alters- a Fleegeheemer, déi ge-
impft ginn. Dann hu mer och d'Alters- an d'Fleege-
heemer, déi jo an der éischter Phas virgesi waren,
geimpft. Den Taux d'adhésion - an ech sinn och
ganz houfreg doriwwer - bei de Participanten an
den Haiser läit bei de Residente bei bal 90 %, bei
87,6 %, wat wirklech e staarken Taux d'adhésion
ass an deen och ganz, ganz wichteg ass.

Fir déi nächst siwen Deeg hu ronn 1.400 Leit e Ren-
dez-vous an engem vun de Centres de vaccination,

fir geimpft ze ginn. Dat heescht, mir si 600 a
1.400 ..., da si mer scho bei 2.000. An am Moment
hunn d'Spideeler nach 1.600 Vaccine fir hiert ee-
gent Personal, also Vaccine fir 1.600 Leit. Dat
heescht, et bleibt 0 am Moment - 0. Mee, tatsäch-
lech sinn der 1.600, déi an de Spideeler sinn, wou
se - an dat war eng Politik, déi mer dës le départ
gesot hunn, well d'Spideeler och Demandeur waren,
fir och hiert Personal kënnen ze impfen - au fur et à
mesure och verbraucht ginn. Et si 1.400 Leit, déi e
Rendez-vous hu fir d'nächst Woch, dat heescht, de
Stock, deen am Moment virtuell ..., ass bei 0. Do-
wéinsder also, déi Légende urbaine, mir géifen
hamsteren, mir géife se net benotzen, etc., etc. ... -
hei hutt Der d'Erklärung!

Tatsächlech, Här President, mir kéinten och deen
anere Wee goen an de Leit soen ..., well mer hei zu
Lëtzebuerg och probéiert hunn, de Leit entgéintze-
kommen, andeem mer eng gewësse Flexibilitéit
weisen, wou d'Leit kënnen hire Rendez-vous selwer
fixéieren. A verschiddene Länner kritt Der gesot:
„Dir gitt deen Dag an déi Zäit geimpft. Wann et net
geet, dann hat Der Pech.“ Mir hunn de Leit e kuer-
zen Delai gelooss, wou se sech och kënnen erauss-
chen, wéini se wëlle geimpft ginn. Jo, dat bréngt
mat sech, dass een do zwee, dräi Deeg verléiert vis-
à-vis vum Ausland. Mee mir mengen, dass et awer
schonn dee richtige Wee ass.

Mir kéinten och de Risk agoen elo mat AstraZeneca,
wou ee sech seet: „Et kann ee bis op zéng Wochen
oder zwielef Wochen eropgoen, da kommt, mir
impfe méi.“ Ech wëll awer net hei virun lech stoen,
wa mer op eng Kéier 10.000 oder 20.000 Leit hunn,
deene mer musse schreiwen, fir ze soen: „Dir hutt
zwar e Rendez-vous, mee mir hu keng Impfung
méi. An dofir kënnt Der déi zweet Impfung net
kréien. An dofir ass et gutt méiglech, dass Der an e
puer Wochen nach eng Kéier musst erëm vu vir
ufänke mat enger éischter oder mat enger zweeter
Impfung.“

Wa mer d'Garantie kréie vun der EMA - net vun eis,
vun der EMA! -, déi eis seet - oder vun deenen, op
déi mer eis am Moment och baséieren -, dass eng
éischt Impfung elo ouni Garantie vun enger zweeter
Impfung eppes ass, wat ee kéint maachen, si mer
bereet, dee Wee ze goen. Awer all zesummen. An
dann hätt ech och gären, Här President, wa mer dee
Wee sollte goen, fir vläicht un Delaien ze réckelen,
vläicht mam Risk, dass een eng zweet Impfung vun
AstraZeneca net huet, dann hätt ech gären d'Cham-
ber matagebonnen, Här President. Mir kënnen an
der Regierung doriwwer diskutéieren, mee dann
hätt ech gären eng Motioun hei an der Chamber,
wou Dir als Chamber eis sot, wat Der gären hätt. Et
kann net sinn, dass, wann duerno eng Kéier Liwwer-
kettenproblemer sinn, dass een duerno probéiert, ier-
gendengem eng politesch Responsabilitéit ze ginn.
Hei musse mer solidaresch bleiwen. Mir wëlle res-
ponsabel sinn, mir wëlle rasonabel sinn, mir wëlle
prevoyant sinn, well mer ganz genau wëssen, dass
mer total tributaire si vu Leit, vu Produzente vu Vac-
cinen. Et ass keen aneren am Moment, deen eis ka
matdeelen ..., an do kréie mer heiansdo op 24 oder
48 Stonne gesot: „Nee, déi Liwwerung kënnt net
un.“ Mir sinn op, Här President. Wa mer déi Diskus-
sion wëlle féieren, da solle mer déi och kënnen féie-
ren.

Schnelltester sinn och ganz wichteg. Et ass och vir-
drun - ech mengen vum honorabelen Här Wiseler -
vun de Schnelltester geschwat ginn. Ech muss lech
perséinlech soen, Här President, dass d'Schnelltes-
ter fir mech elo zu de Léisunge musse gehéieren,
net nëmmen an den Altersheimer oder an de Schou-
len - huet mer et net iwwel, do och! -, mee ech wier
frou, wa mer et géife fäerdegbréngen, déi Schnell-
tester och an den nächsten Deeg - ech soen net an
den nächste Méint, an den nächsten Deeg oder Wo-
chen! -, soubal se e CE-Label hunn - a si mussen
och verschidde Krittären erfëllen, d'OMS seet, zum
Beispill, se sollen eng diagnostesch Sensibilitéit
vun 80 % an eng diagnostesch Spezifizitéit vu 97 %
hunn ... -, och an de Supermarché kéint fannen.
Well och e Schnelltest géif et erlaben, engem méi
Fräiheeten ze ginn, méi Garantien ze ginn.

A wa se wirklech, esou wéi ee liest, vläicht anner-
hallwen oder zwee Euro géife kaschten ... Déi eng
soe mer: „Et kascht 15, et kascht 20“ - nee, da
kënnen mer et net generaliséieren. Mee wa mer fir
annerhallwen oder fir zwee Euro kënnen Schnelltes-
ter schafen an et kritt ee se muer am Supermarché,
sinn ech iwwerzeegt, dass ganz vill Lëtzebuurger,
ier se ee begéinen, ier se eng Aktivitéit maachen,
och bereet sinn, e Schnelltest ze maachen, deen
och kee komplizierte medezinneschen Akt mat
sech géif bréngen.

Dowéinsder, mir sinn - an d'Madamm Ministesch
schafft drun an der Santé - dofir, dass mer et fäer-
degbréngen, déi Schnelltester net nëmmen an
Altersheimer, net nëmmen an de Schoulen anzeset-
zen, mee och ze generaliséieren. Déi gehéieren am
Fong duerno bal zum Alldag, ier een eppes mécht,
wou een e Kontakt kéint hunn, wou e Risiko kéint
bestoen.

Dat heite Gesetz, Här President, ass nach ëmmer
en Equiliber. Et huet virdrun ee gesot: „Jo, psycho-



logesch, den Impakt ass do.“ Jo, deen ass do, an deen ass net nei! Mee mir hu vläicht, verschiddener, et eréischt entdeckt! An dowéinsder, wann ee kuckt, wéi deem engen an deem aneren ... Fir verschidde Leit si mer ze streng, fir aner Leit si mer net streng genuch, mee et ass den Equiliber, dee mer musse fannen. Fräiheeten anzeschränken, e Couvre-feu einfach weider ze imposéieren, Limitatiounen vu Leit, déi een doheem huet, Méiglechkeeten, verschidde Saachen ze maachen, déi ee virdu gewinnt war ze maachen, ze verbidden, ass, gleeft et, fir kee vun der Regierung eng „Partie de plaisir“.

An et ass traureg, dass mer an eng Situatioun komm sinn, wou mer haut, méinst de Varianten - an et ass virdu vun de Variante geschwat ginn -, net kënnen soen, wéi déi nächst Wochen ausgesinn. Mir sinn an enger Situatioun, wou mer am Moment eng Stabilisatioun, eng llicht Hausse hunn, mee déi ka mer nees an eng ganz aner Richtung goen.

An Dir hutt virdu gesot, et wier fir d'13. Kéier, wou mer hei géife stoen. Ech kann lech keng Garantie ginn, dass mer net eng 14. an eng 15. Kéier kënnen hei stoen a mussen hei stoen, fir nei Texter ze maachen. Ech wënsche mer et net! Mee d'Incertituden, déi mer am Moment hunn, sinn einfach ze grouss, fir hei kënnen ze soen: „Mir ginn einfach alles op.“ Ech mengen, Virsiicht ass dee richtege Wee - et ass dee Wee, dee mer elo bal säit engem Joer gewielt hunn -, d'Virsiicht, d'Suerg vun de Leit, d'Gesondheet vun de Leit an den Zesummenhalt vun onsem Land - ouni just dat eent oder dat anert ze kucken oder, nach schlimmer, dat eent géint dat anert ze kucken, mee dat Gesamtbild, an eng gesamt Populatioun wëllen ze schützen.

Ech soen lech Merci.

■ **Une voix.** - Très bien!

■ **M. Fernand Etgen, Président.** - Merci villmools dem Premier- a Staatsminister. An de Relais fir d'Regierung iwwerhëlt elo den Här Educationsmi-nister Claude Meisch.

■ **M. Claude Meisch, Ministre de l'Éducation nationale, de l'Enfance et de la Jeunesse.** - Merci, Här President, Dir Dammen an Dir Hären, merci och un de Rapporteur vum Gesetz. E Merci och nach eng Kéier un all d'Intervenanten, fir d'Agoen op déi spezifesch Situatioun an de Schoulen.

De Claude Wiseler huet sech laang domadder beschäftegt. En huet um Enn vu senger Interventioun an engem staatsmännneschen Toun gesot: „Wann een eng Aufgab wéi déi heiten ugeet, da brauch een e Plang. Et muss een awer och prett sinn, en ëmmer nees ze adaptéieren. A wann ee gutt Grënn huet, da ginn déi Grënn och verstanen an déi Adaptatiounen och matgedroen.“

Mir hate virun der Reentrée vum leschten, vun deem lafende Schouljoer, e Stufeplang - e Stufeplang 1.0, kann ee quasi soen - presentéiert, deen eis gutt duerch déi lescht Méint navigéiert huet. Well mir hunn eppes fäerdegbruecht domadder: nämlech, datt mer d'Schoulen dach wäitesgeeënd konnten ophalen. Am Enseignement fondamental ass et esou, datt mer 16 vun 18 Woche Presenzunterrecht haten, duerchgeeënde Presenzunterrecht konnten assuréieren. An am Lycée war et esou, datt mer 16 vun 17 Wochen duerchgeeënde Presenzunterrecht konnte garantéieren, mat engem Apprentissage en alternance op den ieweschte Klassen, wuel verstanen.

A wann ech déi Situatioun vergläiche mat deem engen oder aneren Nopeschland - notamment och mat Däitschland, wou sech nach ëmmer d'Fro stellt, weini et dann endlech eng Kéier zrëck an d'Schoul geet, nodeems Wochen, jo bal méintelaang kee Presenzunterrecht an deenen allermeeschste Schoulen do konnt assuréiert ginn -, da kann ee soen, datt an där doter Phas, an deem éischten hallwe Joer vun deem Schouljoer, dee Stufeplang 1.0 eis dach do gutt derduerch guidéiert huet.

An ech wëll hei och nach eng Kéier jidderengem Merci soen, deen derzou contribuéiert huet, virun allem och den Enseignanten, virun allem awer och de Gemengenautoritéiten, fir de Fondamental, virun allem och eisen Direktiounen. Ech wëll och Merci soen, well dat wär net méiglech gewiescht ..., de Gesondheetsinstanzen, dem Paulette Lenert, all senge Servicer, der Direction de la santé, der Inspection sanitaire, fir ëmmer nees nei Adaptatiounen an nei Ajustementer kënnen ze maachen, fir op nei Gegebenheeten nach emol besser kënnen ze reagéieren. Soss wär dat doten net dran! Mee et gëtt nei Momenter, an déi hunn eis derzou geféiert, en neie Stufeplang - hoffentlech fir de Rescht vun deem Schouljoer bis de Summer - kënnen virzeleeën.

Wat sinn déi nei Momenter, déi mer festgestallt hunn? Nun, et ass de Mëtteg och hei ugeklongen: De Virus ass méi present bei deene Jonken an deene leschten zwou, dräi, véier Wochen. Dat huet derzou gefouert, datt mer an de Schoule méi zesummenhängend Fäll constatéiert hunn, wéi dat an deene Woche virdu, notamment am Hierscht an de Méint Oktober, November, Dezember de Fall war. Dat huet derzou gefouert, datt mer och vill méi

Clusteren haten, vill méi Situatiounen haten, wou quasi vun haut op muer, innerhalb vun enger Woch, sechs, siwen, aacht, néng zesummenhängend Fäll an enger Klass oder zesummenhängend an der Schoul opgetaucht sinn. An dat huet eis gewisen, datt de Virus momentan dach en anert Verhalten huet, notamment bei deene Jonken. Mir ginn dovunner aus, datt déi nei Varianten och eng vun den Explikatiounen duerfir sinn. An duerfir hu mer do och misse reagéieren an eeben en neie Stufeplang misse presentéieren.

Wat doranner virgesinn ass, ech mengen, dat ass de Mëtten hei jo och mat an d'Diskussioun agefloss: eng generaliséiert Maskepflicht eeben och am Enseignement fondamental, wou mer se an där doter Form nach net haten, och während dem Unterrecht. Ech si frou, datt mer et bis elo ouni déi gepackt hunn. An ech soen nach eng Kéier, datt ech jidderee verstinn, dee skeptesch ass, ob et wierklech gutt ass, datt e Kand herno vläicht vu moies siwe bis owes siwen, mat Ausnam vun deenen 20 Minutten, wou et an der Mëttesstonn ësst, permanent de Mask unhuet. Mee wann et esou ass, datt mer dat musse maachen, fir iwwerhaupt nach kënnen Schoul ze assuréieren, da fannen ech, datt et dann dee richtege Choix ass - an och nëmmen dann dee richtege Choix ass. An ech si frou, datt mer et bis elo eeben ouni dat gepackt hunn.

Dann: Méi testen, anescht testen, schnell testen. Do si mer amgaangen, eis och do eng Strategie ze ginn.

Dann awer och, punktuell d'Maisons relais ze adaptéieren an hirem Fonctionnement, datt do just Kanner beienee sinn, déi och moies an der Klass beienee sëtzen. Ech soe wierklech „punktuell“. An ech héieren de Spriecher vun der CSV hei, de Claude Wiseler, dee seet, datt mer dat direkt iwwerall misste maachen. Ech hu mat den Enseignantsgewerkschafte geschwat, ech hu mat de Schouldirektiounen geschwat, ech hu mat der nationaler Eltereverriedung geschwat, ech hunn och mam Syvicol geschwat, an do seet kee mer, mir missten dat doten direkt op engem nationale Plang iwwerall imposéieren! A jiddereen ass frou, datt mer et elo emol do maachen, wou de Virus méi present ass a wou déi dote Mesure dann net onnëtz den Dagesoflaf vun de Kanner kujenéiert, mee wierklech dann och kann de Virus zrëckhalen, well en do present ass.

Mir gëtt dacks virgeworf, ech géif net genuch op déi Leit do lauschteren - ech hu jidderee consultéiert an d'Meenung war an deem dote Punkt, net an all Punkt, mee an deem dote Punkt wierklech awer unanime! An duerfir fannen ech et richtig, datt mer dat och nëmmen do punktuell maachen, wou et wierklech en Impakt hätt, well de Virus do méi present ass.

Mir schléissen awer net aus - an dat ass, mengen ech, och de Meritt vun deem neie Stufeplang -, datt mer vläicht eng national Mesure mussen huelen an d'Schoul an d'Kannerbetreuung nach eng Kéier vill méi dätlich mussen aschränken. Wann et esou ass, datt déi nei Varianten à la base si vun deem neie Verhalten an datt de Virus méi present ass bei Jonken an an de Schoulen, da gi mer dovunner aus, datt déi Presenz wäert zouhuelen. An da gi mer der-vun aus, datt mer nach schwiereg Wochen, wann net Méint virun eis hunn.

An duerfir gesi mer eng Mesure vir, fir esou laang wéi méiglech dach awer e Presenzunterrecht op d'mannst moies kënnen oprechtzeerhalen, wou d'Schoul moies opbleift, wou souwuel d'Grondschoule wéi d'Lycéeë moies opbleiwen an dann den Unterrecht mëttes op en Distanzunterrecht muss auswäichen an och d'Maison-relaise fir d'Kanner aus der Grondschoul mëttes mussen zoubleiwen. Och d'Schoulkantinnen an de Maison-relais an och an de Lycéeë wäerte mussen zougouen. Fir sécherstellen, datt mer an deem dote Punkt eebe kënnen nach e Presenzunterrecht fir all Kand souwäit wéi méiglech assuréieren, musse mer eis dorobber konzentréieren. Dat ass dee Plang, dee mer eis ginn hu fir déi nächst Wochen a Méint. A mir hoffe wierklech, datt mer domadder gutt derduerchkommen.

Ech sinn net onsensibel, Här President, fir déi Iwwerleeungen, wat d'Base légale vun all deene Mesuren ubelaangt. Ech fannen, mir sollen dat eng Kéier analyséieren. Ech soen awer och, an dat hunn ech an der Kommissioun och des Woch nach eng Kéier ënnerstrach: Mir sinn elo e Joer laang gutt derduerchkomm a mir haten e Joer laang ëmmer d'Méiglechkeeten, fir schnell ze reagéieren. An och, wann hei gesot ginn ass ... Jo, dat waren dacks Recommandatiounen, et ware Circulaires un eist eegent Personal, well e groussen Deel vun deem Secteur, op d'mannst wat d'Schoul ubelaangt, ass eegent staatlecht Personal, an dat kënnen mer net nëmmen iwwer Gesetz guidéieren a reegelen, do kënnen mer och iwwer Circulaires un d'Personal reegelen. Mee déi Iwwerleeungen, déi hei ugefouert ginn, déi kann een deelen.

Ech wëll awer nach eng Kéier soen: Mir hunn dat doten net zanter engem Joer an engem rechtsleere Raum gemaach! Mir hunn déi Gesetzter vun der Édu-

cation nationale respektéiert. A wéi de Claude Wiseler et beschriwwen huet: Mir hunn och dat eent oder dat anert Gesetz, wat existéiert, aus dem Domän vun der Santé, och emol vläicht zitéiert, fir dach awer deen een oder deen aneren derzou ze bréngen, sech hei ze alignéieren. An dat ass am Laf vun deem leschte Joer ëmmer esou gaangen. Wann ech soen: „Mir hu Gesetzter, op déi mer eis hei baséiert hunn“, da sinn déi dacks net geschriwwen ginn - virun allem net déi Gesetzter aus der Éducation nationale -, fir domadder eng Pandemie ze geréieren oder Schoule während enger Pandemie kënnen ze geréieren. Duerfir felt vläicht déi eng oder déi aner Kéier déi legistesche Eleganz. Trotzdeem war et méiglech, am Laf vun deem leschte Joer, d'Pandemie an d'Schoule gläichzäiteg kënnen doriwwer ze geréieren.

Nach eng Kéier: Wa mer et fäerdegbréngen, hei vläicht nach méi Rechtssécherheet ze schafen, gläichzäiteg eis awer - an dat ass mäi grouss Wunsch an ech mengen, dat muss awer och eng Konditioun sinn - och Flexibilitéit ze looszen am Agéieren a Reagéieren op d'Pandemie, op d'Präsenz vum Virus an deene jeeweilege Strukturen, sief et Schoul, sief et Betreierung - well dat huet eis extreem gehollef, wierklech nëmmen de Minimum zouzemaachen am Laf vun deem leschte Joer an de Maximum u Bildungschancen, Bildungschancen duerch déi formal Bildung a Bildungschancen duerch déi nonformal Bildung, kënnen ze assuréieren -, wa mer et fäerdegbréngen, déi Flexibilitéit och an Zukunft nach ze garantéieren, da wäert ech kenger méi staarker gesetzlecher Basis vun de Mesuren an der Education am Wee stoen a ka sécherlech dee Prozess och do begleeten.

Ech wëll awer och soen, datt et net meng éischt Prioritéit ass. An ech wëll duerfir dem Josée Lorsché och nach eng Kéier Merci soen, well dat, wou ech mengen, datt mer eis wierklech momentan mussen drop konzentréieren, dat ass d'Wuelbefanne vun de Kanner an deene Jonken, dat ass dat, wat des Pandemie mat de Kanner a mat deene Jonken, a ville vun hinnen, am Laf vun deem leschte Joer gemaach huet. A wann ech de Choix hätt, wou ech eng vu menge 24 Stonnen, déi den Dag dach huet, géif dran investéieren, da wär et doranner!

Villmools merci.

■ **Plusieurs voix.** - Très bien!

■ **M. Fernand Etgen, Président.** - Merci villmools dem Educationsmi-nister Claude Meisch. An d'Wuert geet elo un den Här François Bausch.

■ **M. François Bausch, Ministre de la Mobilité et des Travaux publics.** - Merci, Här President. Ech huelen d'Wuert nëmme ganz kuerz, well ech gesot kritt hunn - ech war zwar dobaussen, ech war jo am Fong net virgesinn, fir elo hei schonn esou fréi opzotrieden -, datt den Här Baum sech hei opgeregert huet, datt d'Regierung, oder datt ech géif Motioune vun der Chamber net seriö huelen. An ech weess net, wou en dorunner kënn! An Här Baum, Dir stellt mer jo soss vill Question-parlementairen, wann Der mer eng hei gestallt hätt, dann hätt ech zum Beispill geäntwert, datt mer entre-temps schonn - ech mengen, et sinn der zwielef - an zwielef Garen där Borne opgestallt hunn, wou een e Gel désinfectant ka kréien, an datt et och e Plang gëtt vun den CFL.

An ech mengen, et si schonn éischt Aktiounen gemaach ginn. Ech hunn elo ... Leider sinn ech net méi un d'CFL komm, ech hat dat nach probéiert, fir datt ech dat kéint confirméiert kréien, datt kleng Ampulle mat Gel verdeelt ginn un d'Clienté vum éffentlechen Transport. A LuxTram wäert dat nämmlech och maache fir den Tram. Mir maachen eng Rei Saachen. Et ass natierlech net esou einfach, iwwerall an de Gefierer där Borne opzustellen, well dat technesch gesinn net esou einfach ass an och net ëmmer Sënn mécht. Mee Dir musst awer verstoen, et ass natierlech vun der Ëmsetzung hier ..., dat rëselt een net einfach esou dohinner an den éffentleche Betriber.

Dat heescht, mir huele selbstverständlech dat eescht, wat d'Chamber hei als Optrag un d'Regierung ginn huet. An et sinn och schonn eng Rei Saache geschitt.

Ech wëll awer nach eng Kéier derbäisoen, datt mer awer och éischstens hei net solle maachen, wéi wann de Problem, oder den Haaptproblem am éffentlechen Transport wär. Et gëtt entre-temps genuch Etüden, déi dat beleeen. Am éffentlechen Transport ass et wéi iwwerall, et ass néierens null. Soubal mer net zu honnert Prozent kënnen d'Gestbarriären anhalen ... an da souguer nach, souguer wa mer se zu honnert Prozent kënnen anhalen, souguer da kënnen mer nach ugestach ginn. De Risiko ass ni null. An en ass och am éffentlechen Transport net null. Mee en ass awer bei Wäitem net dat, wat heiansdo gemengt gëtt a gefaart gëtt, aus verschiddearten Grënn, déi ech lech awer elo net hei wëll relatéieren. Et fënn een dat alles och erëm, wann een am Internet e bësse googelt. Dat ass dat Éischt.

An dat Zweet ass: Ech wëll awer och nach eng Kéier drop hiweisen, datt et entre-temps awer elo

vu masseng Studie beluecht ass, datt mer et bei där Virusiwwerdroung hei mat enger Tröpfcheniwwerdroung ze dinn hunn an datt et keng Schmierinfek-tioun ass an datt natierlech iergendwou och e Reschtrisiko besteet, datt, wann ech lech elo géif hei op den Dësch - wat net ganz manéierlech wär - néitschen an Dir géift da mat der Hand do driwwerfueren an lech duerno an de Mond fueren, datt Der lech dann natierlech kéint ustiechen, wann ech de Virus dann hätt. Mee mir sinn ons awer och eens, datt déi Probabilitéiten trotzdeem geréng sinn.

Dat heescht, de Risiko fir eng Iwwerdroung ze kréien duerch Schmierinfektioun, datt een et iwwert dee Wee ka kréien, deen ass net null, mee awer ganz, ganz geréng. An duerfir solle mer awer och net ëmmer hei esou Saachen an de Vierdergrond stellen a maachen, wéi wann dat elo dowéinst en Desaster wär.

Duerfir géif ech ëm e bësse Sachlechkeet am Dossier bidden; dat hëlleft eis allegueren. Well dat hei ass en Thema, déi Coronakris, wou et virun allem drop ukënn, datt mer sachlech sinn, datt mer net politesch domadder spillen. Well dat dréit derzou bäi, datt d'Leit sech och am meeschten un d'Reege-len halen!

Merci.

■ **Plusieurs voix.** - Très bien!

■ **M. Fernand Etgen, Président.** - Merci villmools dem Här Mobilitéitsminister fir déi Prezisiounen. An direkt Parole après ministre fir den Här Marc Baum.

■ **M. Marc Baum (déi Lénk).** - Merci, Här President. Den Transportminister a Vizepremier Bausch huet elo en Appell gemaach un d'Sachlechkeet. Ech sinn do - au contraire zu anere Saachen, déi e gesot huet - ganz mat em averstanen.

Zu där Sachlechkeet gehéiert, datt des Chamber de 15. Dezember unanime eng Motioun votéiert huet, déi en Optrag ginn huet un d'Regierung, en Optrag, deen net e quelconquë war, mee e ganz konkreeten. Ech liese just nach eng Kéier draus vir, nämlech: « mettre à disposition [...] du gel désinfectant [...] installer des bornes de distribution de gel désinfectant respectivement dans les bus ainsi que dans l'enceinte des gares et sur les quais, de même que dans les trains. »

Wann Dir mer elo sot, zwee Méint drop, datt Der schonn „zwou Borne“ installéiert hutt bei all deene Garen, ...

■ **M. François Bausch, Ministre de la Mobilité et des Travaux publics.** - Ech hunn net gesot „zwou Borne“, ech hu gesot: „an zwielef Garen“, Här Baum!

■ **M. Marc Baum (déi Lénk).** - ... zwielef Garen.

■ **M. François Bausch, Ministre de la Mobilité et des Travaux publics.** - An zwielef Garen, dat sinn net zwou Borne.

■ **M. Marc Baum (déi Lénk).** - Wann Der dat an zwielef Garen installéiert hutt, ...

■ **M. François Bausch, Ministre de la Mobilité et des Travaux publics.** - A puncto Sachlechkeet!

■ **M. Marc Baum (déi Lénk).** - ... dann entschëllegen ech mech, wann ech dat akustesche net richtig héieren hunn. Dann hutt Der héchstens e Brochdeel vun där Motioun zwee an en hallwe Mount drop ëmgesat, déi d'Chamber lech gefrot huet.

An engem zweeten Tret sidd Der och invitéiert, « de faire de même des services de transport privés ou communaux ». Ech sëtzen elo a kengem interkommunale Syndikat. Vlächte kënnen d'Kollegen aus dem TICE oder aus dem RGTR - nee, RGTR ass eng aner Situatioun -, mee d'Kollegen aus dem TICE soen, ob déi Invitatioun da schonn ukomm ass bei deenen Instanzen. Well dat ass och eng Opfuerderung, déi d'Chamber un d'Regierung gemaach huet, wuel verstane fir de 15. Dezember, et ass elo net, wéi wann dat elo virun zwou Woche gewiescht wier a keng Méiglechkeet gewiescht wier, anescht drop ze reagéieren.

Zur Sachlechkeet vun der Diskussioun gehéiert och, datt, wat d'Tröpfcheninfektioun ugeet, dat wuel wouer ass, datt et awer nawell eng Recommandatioun vun der ECDC, dem Europäeschen Disease Control ass, fir genau dat do ze maachen, wat hei gefrot gëtt. Dat gehéiert och zu der sachlecher Diskussioun.

A wat ech lech awer verzeien, well Der virdu bei der Debatt net derbäi waart, dat ass: Ech hunn zu kengem Moment gesot, datt dat doten als eenzel, vereenzelt Mesure de Coronavirus als Ganzt hei zu Lëtzebuerg géif bändegen! Mee all Gest - an et ginn der ganz vill, déi mer maachen, ganz vill, déi mer de Leit imposéieren - ass een Deel vun der Léisung. Och do froen ech awer d'Responsabilitéit an invoquéieren d'Responsabilitéit vun der Regierung, fir dat ze maachen, besonnesch, wann et objektiv Argumenter gëtt an d'Chamber dat gefrot huet. Dat schéngt mir awer essentiell wichteg ze sinn an dëser Diskussioun.

Merci.



■ **Une voix.** - Très bien!

■ **M. Fernand Etgen, Président.** - Merci, Här Baum. An d'Wuert geet direkt zrëck un den Här Mobilitéitsminister.

■ **M. François Bausch, Ministre de la Mobilité et des Travaux publics.** - Zu de Gemengen, Här Baum, wëll ech lech soen, an dat ass iwwregens och ... Ech war jo net derbäi, wéi déi Motioun hei diskutéiert ginn ass, mee dat hunn awer Verrieder, Deputéierter, souwäit ech dat weess, hei zrëckginn, well ech hinnen dat och iwwer Telefon matgedeelt hunn, wéi se mer telefonéiert hunn, datt déi Diskussioun hei wär ronderëm déi Motioun, datt ech dat och contestéiert hunn, datt ech gesot hunn: „D'Chamber stëmmt of, wat se wëllt, mee ech fannen et speziell, datt en Appell gericht gëtt un de Minister vun der Mobilitéit fir eppes, wat guer net seng Kompetenz ass.“ Ech kann net als Mobilitéitsminister de Gemengen en Uerder ginn a soen: „Dir musst op de Busarrëten“, wat jo d'Kompetenz ass vun de Gemengen, zum Beispill „do där Gelen histellen oder Gel-Apparaten hinhänken.“ Dat ass Gemengekompetenz! Dat kann héchstens ..., an dann nach, souguer d'Inneministes, déi kann dat och emol net maachen!

■ **M. Marc Baum (déi Lénk).** - Dat steet net an der Motioun.

■ **M. François Bausch, Ministre de la Mobilité et des Travaux publics.** - Jo, dat steet net an der Motioun. Mee Dir kënnt awer net Saachen an där Motioun schreiwen hei an der Chamber, déi awer vun der Kompetenz hier guer net ...

■ **M. Marc Baum (déi Lénk).** - Et steet net dran!

■ **M. François Bausch, Ministre de la Mobilité et des Travaux publics.** - Jo, dat hutt Der awer elo grad gesot, et géif drastoen! Dir hutt elo grad gesot, ob ech e Brëif geschriwwen hätt un d'Gemengen, wou ech d'Gemengen opgefuerdert hätt, dat ze maachen. Ech kann dat net maachen! Well dat ass net a menger Kompetenz. Et ass an der Kompetenz vun de Gemengen, fir Busarrëten ze installéieren, also donc och, fir dat doten ze maachen.

(Interruption par M. Marc Baum)

Dat ass dat Eent. Dat Zweet ass, Här Baum, ech hu virdrun net gesot: „Et sinn zwou Bornen“, mee: „Et sinn zwielef Garen“, wou et schonn installéiert ass. Dat ass dat Eent. Ech hunn och gesot, datt d'CFL ... An ech mengen, datt och scho verdeelt ginn ass, ech sinn awer do net ganz sécher, dat misst ech nach eng kéier nokucken. Ech schaffe jo net bei de CFL! Ech hunn eng Zäit do geschafft, mee de Moment schaffen ech am Ministère. An natierlech hunn ech de CFL gesot, si solle wannechgelift kucken, Saachen ze maachen, fir deem Rechnung ze droen. A si sinn och amgaang, dat ze maachen. Si hunn och eng Rei Saache gemaach. D'nämmlecht bei LuxTram an esou weider an esou fort, do lafen eng Rei Saachen, déi gemaach ginn.

Mee wéi gesot, nach eng kéier: Et ass net näischt geschitt. An et ass och net, datt déi Motioun net eescht geholl gëtt. An et ass och net, datt mir de Problem net eescht huelen. Mee mir mussen dat awer och an de Kontext setzen a mir sollen net eppes do erandeiten, wat net dranzedeiten ass! Merci.

■ **M. Fernand Etgen, Président.** - Merci villmools, Här Bausch. An d'Wuert geet elo un d'Madamm Gesondheetsministesch, d'Madamm Paulette Lenert. Madamm Lenert, Dir hutt d'Wuert.

■ **Mme Paulette Lenert, Ministre de la Santé.** - Merci, Här President. Da kucke mer fir déi 13. Kéier, de sachlechen Toun ze hale ronderëm dëst Pandemiegesezt. Et wäert sécher net déi leschte Kéier sinn, wou mer eis hei wäerte gesinn. E grouse Merci virop och dës Kéier nees un d'Ekipp, un de President vun der Chamberskommissioun an dee ganze Staff ronderëm, deen hei ëmmer a kierzter Zäit muss liwweren. Och dat wäert an Zukunft net ausbleiwen. Ech weess, dass och do ni déi richteg Routine kënnt. Et ass een einfach frou, wann dat eng Kéier eriwuer ass.

An och vläicht e klengt Wuert zur „juristescher Eleganz“: Déi ass leider och net op der Prioritéitelëscht, och net bei mir. Selbstverständlech, zu aneren Zäite géif mer dat Pleséier maachen, mee am Moment ass einfach d'Zäit net ginn, fir sech hei der juristescher Eleganz hinzeginn. An ech mengen, ...

■ **M. Claude Wiseler (CSV).** - Et ass awer net nëmmen Eleganz!

■ **Mme Paulette Lenert, Ministre de la Santé.** - ... et ass och am Interessi vum Land a vu jiddwerengem, dass mer do e bëssen Indulgence hunn an där Matière.

■ **M. Claude Wiseler (CSV).** - Et ass net nëmmen Eleganz, et sinn och rechtsstaatlech Notiounen. Et ass e wéineg méi wéi Eleganz.

■ **Mme Paulette Lenert, Ministre de la Santé.** - Ech kommen zur Rechtsstaatlechkeet, selbstverständlich, Dir hutt déi ugeschwat. An déi ass och virgesinn. Dat hei war net d'Äntwert op d'Rechtsstaatlechkeet. Loin de là!

Haut koum eng nei Evaluatioun vun der Situatioun. Och do gëtt et leider net vill Neies ëmmer nees ze soen. An déi lescht Wochen ass ganz vill Ongewëssheet am Raum. Et ass vill „wann ..., dann ...“, „wann ..., dann ...“. Et kann een et scho bal net méi héieren! Ech weess, Dir kënnt et net méi héieren - mir kënnen et och selwer net méi héieren. Fakt ass, dass dat awer nach ëmmer déi Tatsaach ass, mat där mer eis am Moment mussen auserneesetzen.

Mir hunn haut gelies, et gëtt keng, d'Taskforce nennt dat keng „Relaxatioun“. Dat heescht, et ass nach keng richteg Amelioratioun elo ze gesinn iwwert déi lescht Wochen. „Et ass ‚leedeglech‘ a ‚méiglech‘“, schreiwe se, „eng Stagnatioun“. Dat ass zweemol relativiséiert.

Jo, d'Zuele sinn erëm liicht eropgaangen. Mir hunn awer och natierlech ganz vill getest. Mir hu Clusteren, wou mer ganz schnell op der Plaz waren, wou mer extrem vill getest hunn, och ronderëm Asymptomatescher. Si mer elo an der Stagnatioun oder net? Et ass schwéier ofzeweien, Stand haut. Et si vill Inconnuen do ronderëm.

Am selwechte Rapport ass och ze liesen, wat och Fakt ass, dass een déi nei Varianten, déi ënnerwee sinn, an dat sinn der méi, am Moment nach ganz schwiereg kann aschätzen, dass een hiren Afloss net richteg kann ofschätzen op dat ganz Geschéien zu dësem Zäitpunkt. Firwat kann een dat net maachen? Ma well et eis u gänzlich representativen Donnéeë feelt, generell, net nëmmen hei zu Lëtzebuerg. Dat ass kee Makel, dee mir hei hätten, och loin de là! Mir sequencéiere vill hei am Land am Verglach zu eisen Nopeschlänner, och international am Verglach ganz vill.

Dee Prozentsaz, deen hei zu Lëtzebuerg sequencéiert gëtt, haut schonn, geet iwwert dat eraus, wat ugestriift ass. Et bleift awer esou, dass mer nach kee representativen Echantillon hunn. Et huet nach kee Land deen, d'ailleurs. Dat ass alles nach ganz wackeleg. Et gëtt sequencéiert ronderëm déi Varianten, déi elo rezent fonnt ginn. Do kucke mer, dat och ganz intensiv ze maachen, wat natierlech dozou féiert, dass mer der do och vill fannen, wa mer do ronderëm siche ginn.

Mee um representativen Echantillon schaffe mer, dat wësst Der. Mir haten och e laangen Echange doriwwer an der Chamberskommissioun, well Der vill Froen dozou hutt, wat och legitim ass. An do schaffe mer drun. A mir wäerte geschwënn och souwäit sinn, vläicht als éischt Land, wat wirklech e richtigen nationalen Echantillon huet, dee representativ ass.

Ech bedauern, dass effektiv hei dee groussen Asaz an déi dach ganz wäertvoll Aarbecht vum LNS net wirklech wäertgeschätzt gëtt. Et gëtt e bëssen duergestallt, wéi wann et un Informatiounen géif feelen. Lëtzebuerg liwwert do vill Informatiounen.

Et ass och: D'lescht Woch hu mer e Bilan erausginn, wat bis elo fonnt ginn ass, mam ganzen Historique vun deem Dag un, wou mer deen éischte Variant fonnt hunn. Et ass ganz transparent oppegeluecht ginn, wivill mer fonnt hunn. An an deem Kontext d'lescht Woch ass och daitlech gemaach ginn, dass mer eeben elo am LNS drop schaffen, dee representativen Echantillon un d'Stoen ze kréien. Dat brauch e bëssen Zäit. Dat ass näischt, wat een einfach esou aus dem Aarm rëselt. An dat wäert nach eng Woch daueren, vläicht hu mer et d'nächst Woch, et kann awer och sinn, dass dat nach eng Woch méi hëlt. Do gëtt gemaach, wat mer kënnen.

Déi Leit sinn extrem begeeschtert am Asaz. An och vun dëser Säit e ganz grouse Merci dofir! Och si si scho laang hei am Asaz an ëmmer erëm, ëmmer erëm wirklech do, fir dem Land ze hëllefen, fir wirklech alles ze ginn, wat mer kënnen, u Moyenen, fir wirklech déi Pandemie hei am Grëff ze halen.

Da wollt ech vläicht op e puer Saachen, déi ugeschwat gi sinn, agoen. Et ass, mengen ech, fir d'veiert hei um Mikro, wou ech verweisen op d'Recommandatioun vum Direkter vun der Santé zu de Schnelltester. Mir hunn do eng Strategie mat klere Recommendatiounen, wou se an den Asaz solle kommen, wou och net - Schnelltester gëtt et jo schonn eng Zäit -, wie se soll maachen.

Mir liwweren der och eraus un d'Altersheemer. Dir frot, dass misste Schnelltester an d'Altersheemer kommen. Dat ass säit November! Ech hu se dës Kéier wirklech net matbruecht - ech hat se elo allkéiers derbäi, mee ech duecht, dat Theema wär elo ofgeschloss, well mer et schonn esou oft ugeschwat hunn -, mee an der Recommendatioun steet dat, wou mer déi am Asaz gesinn: ënner anerem bei de Visiteuren. Ech weess och elo den Tablo net auswenneg, wivill Schnelltester ausgeliiwwert gi sinn. Jiddefalls hu mer der am Stock national. Wann der gebraucht ginn, ginn déi vun der Santé nogeliwwert. Dat ass iwwerhaupt kee Problem, dat ass lafend Geschäft!

Da sinn ech och ganz frou ze héieren, dass eis Informatiounen awer wirklech suivéiert ginn. Dir wësst, dass mer och un anere Schnelltester schafffen, och mam LNS zesummen, wou mer wirklech

nei Produiten ausprobéieren op hir Effizienz. Ech géif der Madamm Lorsché soen: Mir si vläicht do net esou schnell wéi déi aner, mee dofir vläicht awer da méi grëndlech. Mir loosse dat net einfach esou erauszirkuléieren. Dat huet en Enjeu, dat Ganz. Et si vill Produiten um Maart, ganz vill. Wann Der déi däitsch Lëscht kuckt, wat do recommandéiert ass, dat ass ellelaang. A mir maachen am Moment den Effort eeben am LNS, déi Produite wirklech ze testen, reell ze testen, dat heescht, parallel zu PCR-Tester, fir esou ze gesinn ...

A mir haten och doriwwer e laangen Austausch, dat ass eigentlech fir d'Leit hei am Sall, oder fir déi aus der Chamberskommissioun vun der Santé, näischt Neies méi. Dobaussé mag et vläicht nach net ukomm sinn: Och do si mer amgaangen, drop ze schaffen. A mir erwaarden, dass mer an deenen nächsten Deeg och do Resultater kréien, fir dass mer da kënnen eng Recommendatioun erausginn un d'Leit, fir dass d'Leit wëssen, wéi eng Schnelltester gutt sinn, wéi eng vläicht manner gutt sinn, wéi eng dat halen, wat dropsteet, wéi eng vläicht éischter net, a fir dass mer eis och da kënnen festleeën, wéi eng mer nach zousätzlech wäerte vum Staat hier akafen, fir se da méi an den Ëmlaf ze kréien.

Et ass eis awer wichteg, déi dote Garantien ze ginn. Dat heite si grouss Marchéen, déi sech opdinn. Et ass ganz villes um Marché a mir sinn der Meenung, dass mer de Leit et och schëlleg sinn, dat mat deem néidege Seriö wirklech ze testen, auszuprobéieren an dann eeben deementspriedend Recommendatiounen auszeschaffen, mat den Erklärungen, déi et brauch.

Da wat d'Rechtsstaatlechkeet betrëfft, do hate mer och dës Woch an der Chamberskommissioun doriwwer rieds. Déi Fro ass gestallt ginn. Ech hat do verweisen drop - et ass zwar sou, ech sinn net den Auseminister, ech kennen déi Texter elo net, ech hunn déi och net bei Hand -, mee dat ass de Règlement grand-ducal, hunn ech mer nach eng Kéier schreiwe gelooss, vum 20. Juni 2020, dee scho méifach adaptéiert ginn ass, eng leschte Kéier den 29. Januar dëst Joer, wou dann och déi Testpflicht drasteet. Dee misst awer esou am Mémorial stoen. Et ass op alle Fall dat, wat d'Leit mer elo hei confirméiert hu vum Büro aus. Et ass och net eisen Domän, et ass vläicht dann an der aussepolitescher Commissioun, wou Der dat vläicht eng Kéier misst verdéiwen. Mee et ass u sech näischt Neies. Dat ass dee Reglement, dee säit enger Rei Méint am Ëmlaf ass an deen elo den 29. Januar fir d'lescht nach eng Kéier ugepasst ginn ass, fir dann déi Testpflicht um Findel anzeféieren.

Da sinn ech och e bëssen erstaunt iwwert dat Erstaunen zu der Rechtsstaatlechkeet, wa vum Gesetz vun 1980 rieds geet, wou den Direkter vun der Santé duerch dës Chamber hei - ënnert der Regierung vum Här Werner war dat deemools - befugt ginn ass, ausdrécklech befugt ginn ass duerch d'Chamber, fir verschidden Decisiounen ze huelen. Ech hu geléiert, dass ee Gesetzter ze respektéieren huet, soulaang se do sinn, asoufern ass mengem Demokratieverständnis no näischt Ustéissegess derbäi, wann en Direkter eng Befugnis, déi e kritt iwwer e Gesetz, wat hei gestëmmt ginn ass an deem Land, géif uwennen. An dësem Fall wor et, souwäit ech mech erënneren, eng Recommendatioun, déi erausgaangen ass, fir verschidde Schoulen. Dat fonctionéiert u sech ganz gutt. Mee ech gesi prinzipiell do kee Problem vu Rechtsstaatlechkeet, wann ee sech op d'Gesetzter berëfft, déi hei gestëmmt gi sinn an déi an dësem Land applikabel sinn.

Dann zu de Gespräicher mat den Dokteren: Do hate mer och schonn ëfters Geleeënheet, eis auszetauschen, schrëftlech a mëndlech. Och do si mer natierlech am Austausch. Dir gesitt et och an der Impfstrategie, déi jo hei presentéiert ginn ass. Et gehéiert zu der Lëtzebuurger Impfstrategie, dass mer à partir vun deem Moment, wou mer Impfstoffen hunn, déi vun der Logistik hier kënnen an der Dokteschpraxis verofreecht ginn, dat selbstverständlech maachen. Dat ass vun Ufank u kloer gewiescht. Ech mengen, ech hat dat och hei exposéiert. An do lafen och schonn déi ganzen Zäit Gespräicher am Moment, intensiv Gespräicher eebe fir déi nächst Phas, déi usteet, fir déi héich vulnerabel Leit, wat och scho kommunikéiert ginn ass.

Do schaffe mer ganz enk mat de Spideeler zesummen. Mir schaffen net, wéi d'Madamm Lorsché gefrot huet, mat der CNS. Net, well mer eis einfach aus Spaass d'Liewe vläicht méi komplizéiert maachen, mee déi Donnéeën, déi mer do hunn, déi ginn dat net hier. Dat ass d'Facturatioun, do sinn och Decalagen. Wann déi Donnéeën dat doten natierlech einfach hierginn hätten, hätte mer dee Wee sécherlech gesicht. Mee mir setzen hei op eng enk Zesummenaarbecht mat deene behandelnden Dokteren. A sou wéi den Dokter Schmit lech dat och d'leschte Kéier an der Chamberskommissioun erläutert huet, sinn déi Gespräicher fir déi Phas 2 souwäit ofgeschloss.

Do ass eng Prozedur, déi steet, déi ass och scho kommunikéiert. An d'Gespräicher lafen elo dës Woch iwwert den Detail. Dat ass alles och net esou

einfach. Dat ass ganz komplizéiert, dat ëmzesetzen. Mee och dës Woch ginn nach déi lescht Detailer beschwat, wéi dat an deenen nächste Phase wäert goen, a mir wäerte selbstverständlech och le moment venu iwwert den Detail dozou informéieren a kommunikéieren.

Reegelméisseg gi mer zum AstraZeneca gefrot, Dir hutt do vill Froe gehat. Vun deene Question-parlementaire säit der Rentrée hu mer der mëttlerweil 166 hei beäntwert. Do sinn der och eng ganz Rei zum AstraZeneca derbäi. Et ass och Kommunikatioun erausgaangen an ech war frou ze héieren - ech weess net, et huet een et mentionéiert, mee et deet ëmmer gutt ze héieren -, dass eis Informatiounen gesi ginn a gelies ginn. Och do géif ech jiddwereen invitéieren, sech wirklech op eise Site ze beginn. Déi Saachen, déi mer live hunn, déi Eventer, déi kann een och noliesen. Wann Der do Froen hutt, do fannt Der ganz vill Material, och Frequently-asked-Questions, déi opbereet sinn an enger einfacher Sprooch, fir do de Leit hir Suergen ofzehuelen.

An natierlech si mer och beméit, de Suivi ze maachen. Mir hu vill iwwer Pharmacovigilance geschwat, notamment och am Kontext vun deenen Dispositiounen, déi haut zum Vott stinn. Dat ass eng grouss Prioritéit fir eis a mir maachen e ganz enke Suivi ronderëm déi Ängschten, déi och am Moment am Raum stinn, virun Nieweneffeten. Dat ass eppes, wat eis Direktioun ganz staark beschäftegt. Mir sinn do a ganz enkem Kontakt - och elo erëm - mat deene concernéierten Haiser. Do si jo eng Rei Saachen, déi am Raum stinn, och de Moien nees iwwer d'Press; wann esou eppes ass, ma da ruffen d'Leit un a si vergewëssere sech, ob alles an der Rei ass. A selbstverständlech wäerte mer och déi néideg Flexibilitéit hu fir ze reagéieren, wann do Problemer sinn. Dat ass eis Aarbecht, dat ass eis Pflicht, an et ass dat, wat mer dagdeeglech maachen an där Zäit, déi eis dann dofir gegénnt ass.

D'Situatioun generell, do sinn ech och, muss ech soen, ëmmer erëm e bëssen traureg, wa se grad hei am Land méi schlecht gemaach gëtt, wéi se ass. D'Inzidenzzuelen, do hu mer oft driwwer rieds. Et gëtt sech ëmmer erëm drop referéiert, ech soen och ëmmer erëm dat selwecht dozou: Déi Inzidenzzuel aleng seet net vill aus. Dat ass dee Plädoyer, dee mer onermiddlech am Ausland féieren, mat ganz villen Efforten - e gëtt och esou lues a lues gehéiert -, wou ëmmer méi awer trotzdeem den Taux de positivité gekuckt gëtt. Dat war och elo nees en Theema déi lescht Wochen, wou eis Kolleegen aus der Regierung an deenen ënnerschiddlechste Gespräicher ëmmer erëm betounen, wéi eis Situatioun hei am Land ass, wivill mer testen, wéi déi aner Indicateure grad stinn.

An déi sti ganz gutt, muss ee soen. Also ech mengen, et ass eng Situatioun, déi ons natierlech Suerge mécht am Moment, mee nach sti mer relativ gutt do. Wa mer eisen Taux de positivité kucken, deen ass gutt am Verglach. Den Taux de mortalité ass gutt. A virun allem ass d'Beleeung op den Intensivbetter ganz gutt. An ech sinn och ganz frou, dass net dat just vun den Deputéierten zu dëser Säit, mee eeben och vun den Oppositionsparteien awer och gehéiert ginn ass an d'Erklärungen verstane gi sinn an och esou hei duergestallt gi sinn. Mir ginn eis Méi, dat ëmmer erëm ze erklären. Den Dokter Schmit hëlt sech och ëmmer vill Zäit, fir dorobber anzegoen. An et ass natierlech dann och gutt ze héieren, dass awer déi Messagen ukommen an dass déi Relativéierung, déi mer par rapport zu den Indicateure maachen, dach awer verstane gëtt.

Dat ass wichteg, och fir d'Leit dobaussen, dass se net just op déi Inzidenzzuel kucken. Dat ass de Revers vun enger Strategie, déi mer hunn: Wa mer vill testen, fanne mer méi wéi déi aner. An dass dat esou ass an déi global Situatioun eeben net esou schlecht impaktéiert, dat gesäit een op deenen aneren Indicateuren. An déi stinn net esou schlecht do am Moment, och wa mer eis vill Suergen iwwert d'Situatioun maachen, wéi se am Moment ass, duerch déi Inconnuen, déi opstinn.

De „viralen Effet“, dat ass eppes, wat mer viru Corona kannt hunn duerch déi sozial Medien. Dat ass eppes, wou ee vill Geld bezuelt huet, fir et ze erzeugen, dass Messagé viral ginn an esou weider, e richtigen Hype! Bon, mir hunn den Hype an de viralen Effet elo heiheem. Mir kënnen e leider nach net richteg ofschätzen. Mir brauche Gedold. An dofir ass et wirklech de Moment, fir nach eng Kéier wirklech zesummenzestoen an déi restriktiv Mesuren, déi mer hunn, och weiderhin ze respektéieren. Et mag sinn, dass dës Mesuren duerginn, fir dat Ganz gedrosselt ze behalen. Dat ass eis Hoffnung, déi mer hunn. Mir hoffen, dass mer wirklech net mussen norüsten. Mee nach ass et ze fréi, fir do wirklech e leschte Jugement driwwer ze maachen. Mir brauchen do nach Erkenntnisser. Et bleift eis also näischt anescht iwwreg.

Vun eiser geografescher Situatioun hier si mer net schrecklech begléckt an der Pandemie. Et ass vläicht praktesch am Alldag, schnell am Ausland ze sinn, mee fir d'Pandemie ass et definitiv kee Virdeel. Mir kënnen keng Strategie fueren, wéi aner Länner, dass mer eis ganz zoumaachen. Mir hunn im-



mens vill Leit, déi dagdeeglech iwwer eis Grenze ginn, dofir si mir net Neuseeland, mir sinn net Australien, mir sinn och net Israel. Mir hunn eng aner Dateschutzveruerdnung hei an deem Land. Lëtzebuerg ass Lëtzebuerg, mir hunn eisen eegene Wee. A mir sinn definitiv keng Insel.

Dofir musse mer un déi Schrauwen dréie goen, un deene mer dat kënnen. An dat dréit sech manner ronderëm déi Baussegrenzen. Ech verstinn d'Suerg, fir nach zousätzlech zu den Tester, déi mer froen, wann een hei um Findel areest, vläicht eventuell nach eng Quarantän dropzesetzen. Et mag sinn - ech gleewen net drun -, dass dat dee groussen Effet hätt, fir dat Ganzt ze drosselen. Vill ze vill Leit gi bei eis iwwer aner Weeër hei an an aus. Dat ass net déi eenzeg Schrauf, déi mer hunn. Mir hunn do eng duebel Sécherheet duerch en Test um Embarquement, duerch en zousätzleche bei der Arrivée. Et mag e gudden Usaz sinn, mee ech mengen, et ass net d'Rettung aleng. Ech fäerte ganz, dass dat, falls et nach eng Kéier sollt aus dem Rudder geroden, och net d'Rettung wäert sinn. Dat ass op alle Fall meng Iwwerzeegung.

Et ass schonn esou, wéi et haut dann och vusäite vun der Fuerschung erëm eng Kéier ënnerstrach ginn ass; do ass jo haut erëm eng rezent Aschätzung komm. Ech hu mer et hei opgeschriwwen - wéi ass et? -, jo, mir musse mat méi héije Fallzuele rechnen. Dat ass dat, wat geschriwwe gëtt. Dat wësse mer och iergendwou. Et ass eng Eventualitéit, déi am Raum steet. An da gëtt gesot: „A falls mer eis net nees méi konsequent un d'Kontaktbeschränkungen halen, da riskéiert dat, problematesch ze sinn.“

Also läit d'Kand och nach net am Pëtz. Et geet just drëm, sech wirklech erëm drun ze erënneren, wat elo gëllt: Sech un déi Bestëmmungen halen! An dës Warnungen, wannechgelift, net op déi liicht Schëller huelen! Et ass wirklech elo, wou et zielt. Et ass eng ganz geféierlech Zäit. Mir wëssen net, wat ënner eis ëmgeet, wat dee viralen Effet ass vun deenen neie Varianten. An dofir gëllt et wirklech, sech un d'Reegelen ze halen. Mir hu kee Verhandlungspartner vis-à-vis. Mir kënnen net mam Virus verhandele goen.

Mir kënnen och net soen: „Fir Chrëschttag hale mer elo mol eng Kéier op. Mir leeën d'Waffen nidder.“ Dat geet net. Vill Leit hate sech dat gewënscht. Et ass och hei staark derfir plädéiert ginn. Mee de Virus schéngt net esou spirituellt ze sinn. Och d'Kanner net matzielen, dat ass e Wee, wou mir net wëllen higoen. Et gëtt elo gesot, wann een en anere Modell hätt fir de Besuch doheem, dat wär méi effizient. Ech gleewen och net drun, dass een do nach vill méi streng ka si wéi dat, wat mer hunn. An ech gleewen och net drun, dass, wa mer e bësse géifen oplackere ronderëm d'Bullen, dass dat e groussen Effet géif maachen. Mir hunn do e gudde Modell. Den Wichtegst ass, dass mer eis weiderhin drun halen. Dat ass de Punkt!

De Problem ass déi „fatigue pandémique“, vun där sou vill geschwat gëtt: D'Leit hunn es genuch! Mir hunn es alleguerte genuch. An dat ass déi grouss Erausforderung, dass mer net lues a lues mat der Zäit noloossen! Et ass och dofir, wou déi drëtt Well an enger Pandemie déi geféierlech Well ass, den Erfarungen no. Et ass déi drëtt Well, déi déi geféierlech ass, well d'Leit es einfach genuch hunn. Well een es einfach sat huet, sech un déi Reegelen ze halen.

An da géif ech och gären drop opmierksam maachen - et ass thematiséiert ginn -, wéi sou mer besser wëlle kontrolléieren, ob d'Leit wirklech den Test de sechsten Dag an der Quarantän maachen. Majo, well sech erweisen huet, an dat ass eng nei Erkenntnis, dass dat scheinbar net méi esou agehale gëtt. Iergendwéi happert et mat der Eegeverantwortung. Aner Länner hunn nach 14 Deeg Quarantän, do gëtt iwwerhaapt net diskutéiert. Mäi Meedche war an Norwegen, dat war 14 Deeg am Hotel. Punkt, fäerdeg! Mir ginn de Leit d'Méiglechkeet, no sechs Deeg en Test ze maachen, well mer och eng grouss Testcapacitéit hunn.

(Brouhaha)

Nach muss awer deen Test negativ sinn, fir dass alles gutt ass. Wann en net negativ ass, ma dann hu mer e Problem! Da si Leit, déi vläicht asymptomatesch positiv ronderëmlafen, déi de Virus weiderginn. A wa mer da feststellen, dass sech net méi dru gehale gëtt, ma dann ass dat den Challenge, mat deem mer eis musse befaassen. An do nennen ech déi Äntwert, déi komm ass vusäite vun der Schoul, dass een an deem Fall do e bëssen norüst an erëm de Leit rappeléiert: „Voilà, do war nach eppes de sechsten Dag, wat mer vläicht erëm lues a lues vergiess hunn“, fir dass mer dat erëm méi present kréien, dass ee sech erëm méi un déi Reegelen hält.

An ech géif gären drun erënneren - ech sinn zwar och elo, mengen ech, e bësse laang schonn ... -, mee mir hu festgestallt, dass déi Quarantänen hiren Zweck erfëllen, sou lästeg se och sinn. Si erfëllen hiren Zweck. Et ass ëmmer erëm e gewëssene Prozentsaz, zwëschent 15 % an 20 %, vun de Leit, déi a

Quarantän sinn, déi positiv ginn, déi vläicht net onbedéngt krank ginn, mee déi positiv ginn! Dat heescht, déi Leit selwer géife sech iwwerhaapt keng Rechenschaft driwwer ofginn (veuillez lire: déi Leit wiere sech däers guer net bewosst), dass si vläicht e Problem sinn. Mee si sinn et awer! An do-duerjer, dass mer dat dote strikt duerchzéien, egal wéi lästeg et ass, dass mer do zsummestinn, kréie mer eng gewësse Barriär. Mir kréien déi Infektionsketten einfach schnell gebrach.

An et deet mer leed, et ass dat Eenzegt, wat mer hunn! Mir hunn net eng grouss Wonnerwaff hei. A mir sinn och mam Impfen nach net esou wäit, dass ee kéint soen: „Et ass alles gutt.“ Et ass einfach nach en haarde Wee, dee virun eis ass. Mir mussen zsummestoen!

Liicht um Enn vum Tunnel, oder et ass éischter e Schrëtt a Richtung Liicht ... Mir hunn eis och scho vill driwwer ausgetosch. Och do gëtt et haut nach net déi richtig Gewëssheet. Mir wëssen nach net genuch ronderëm d'Impfstoffer, wéi se sech wirklech auswirken op d'Pandemie, awéifern een de Virus trotzdeem nach ka kréien, weiderginn. Dat, wat positiv ass - a kommt, mir halen eis dorunner fest -: Mir wësse mat Sécherheet, dass, wann d'Leit geimpft sinn à grande échelle, zumindest d'Decès wäerten zrëckgoen, dass zumindest déi schwéier Konsequenzen, déi Openthalter an de Spideeler wäerten zrëckgoen. An dat ass dach scho vill!

A wat mer méi Erkenntnisser kréien - an dat ass do, wou ech ofschléissend och nach eng Kéier wirklech ëm Äert Vertraue bieten -, wa mer nei Erkenntnisser hunn, ma da si mir déi Éischt, déi bemëit sinn, fir déi afléissen ze loossen. Dat ass eise Leit hir Aarbecht! Ech bieten dofir ëm Vertrauen an ëm Raum fir ze schaffen. Et ass dat, wat mer brauchen. Et ass extrem vill Neies ze verschaffe vun eise Leit. Mir suivéieren natierlech d'Wëssenschaft, d'Expertisen, déi kommen. Mir testen neit Material. Mir hunn dat um Radar. Mir maachen eis Besch, fir et kuerzefaassen! Mee et wäert nach laang daueren.

Dann eng Kéier kuerz zu den Daten: Date si ganz wichtig. Et geet net duer mat Vertrauen, mat Raum, et brauch Verstand, fir d'Reegelen ze verstoen. Et brauch och Disziplin, fir sech un d'Reegelen ze halen. Dat ass nach eng Nuance. Verstand an Disziplin sinn zwou verschidde Saachen. Leider brauch et déi zwee. A Fräiheet muss ee sech eppes kaschte loossen, sief et um Niveau vum Staat, duerch Suen, déi en investéiert, sief et um individuellen Niveau, duerch Disziplin, déi een dann opbréngt, fir Saachen ze respektéieren, wou ee vläicht fir sech selwer de Sënn net direkt gesäit. Dat ass an dësen Zäiten esou. An d'Daten, déi gehéieren och dozou. Si si wichtig.

Ech géif ënnersträichen, dass eis Intentioun bei den Daten déi ass, dass mer déi Pandemie sou gutt wéi méiglech kënn suivéieren. Dat ass déi eng Saach. Dat sinn Daten, déi brauche mer net esou laang. An ech sinn och ganz frou fir déi Zesummenaarbecht, déi mer haben. Dat war ganz konstruktiv an der Chamberskommissioun, wou mer op dësem dach ganz technesche Feld, wat den Dateschutz ass, an där kuerzer Zäit gutt Léisunge konnte fannen, fir wirklech do d'Delaien erfzesetzen, wou mer et net onbedéngt brauchen. Mee an der Pharmacovigilance ass et am Interêt vum Patient, dass mer déi Daten hunn, dass mer zu all Moment kënnen novollzéien, wie wéini wat geimpft kritt huet, fir gegebenefalls Laangzäitschpied ze reperéieren oder och dann eebe Kontakt opzehuele mat de Leit. Dat ass definitiv am Interesse vun de Patienten. Dat ass net iergendeppes Willkürlech, wat mer domadder maachen. Mir brauchen déi Daten, fir dat heite kënn seriö ze geréieren an och de Leit déi néideg Garantien ze ginn an der Dauer, och iwwert dës Pandemie eraus, dass hir Rechter kënn gewaart ginn.

An deem Sënn géif ech lech alleguerte bieten, dësem Gesetz zouzestëmme, et weider ze verlängeren. Et ass dat, wat mer zu dësem Zäitpunkt leider nach ëmmer brauchen. Et mag net perfekt sinn. Et ass en Ensemble vu Reegelen, déi mer zsummegestréckt hunn, déi iergendwou en Effet gewisen hunn. Dat ass dat mannst, wat ee ka behaupten, wann een zrëckkuckt op virun de Feierdeeg a kuckt, wou mer haut stinn.

A vergiesst net, par rapport zum Virus: Mir sinn alleguerten de Wiert an dëser Saach. Dat soll een net vergiessen. A wann een dat bis verstanen huet, dann ass et och ëmmer nees méi einfach, déi Reegelen ze respektéieren. All Einzelne vun eis ass e Wiert fir dee Virus.

Voilà. Ech soen lech Merci.

■ **M. Fernand Etgen, Président.**- An ech soen der Madamm Gesondheetsministesch villmools Merci. D'Diskussioun ass elo ofgeschloss.

Mir kommen elo zur Ofstëmmung iwwert de Projet de loi ...

■ **Une voix.**- Här President, ...

■ **M. Fernand Etgen, Président.**- O! Et ass nach eng Wuertmeldung do vum Här François Bausch.

■ **M. François Bausch, Ministre de la Mobilité et des Travaux publics.**- Jo, Här President, ganz kuerz: Ech hunn elo just d'Zuele kritt, fir dem Här Baum déi dann och ze ginn. Also, et si schonn eelef Garé mat Spenderen ekipéiert. An dat sinn all d'Garen, wou Personalpresenz ass, dat heescht, wou och eng Gestiou ass, wou Surveillance ass a wou och déi meeschte Leit zirkuléieren. An déi nächst Verdelungsaktioun fir de Gel, där klenger Dëppercher, an den Zich, déi lafen elo den 22., den 23. an de 25. Februar, an do ginn 20.000 där Flacone verdeelt, Här Baum. Voilà, just fir lech ze soen, dass doru geschafft gëtt.

■ **M. Fernand Etgen, Président.**- Merci dem Mobilitéitsminister fir déi Prezisiounen. Parole après ministre fir den Här Marc Baum.

■ **M. Marc Baum (déi Lénk).**- Merci, Här President. Merci dann och dem Här Minister fir déi Prezisioun, dass et eelef Garé mat Spendere sinn, an dann deemno wéi, och wéi eng dat sinn. Meng Fro bleift dann awer: Hutt Der wëlles, d'Motioun ëmzesetzen? Dat heescht, an der Motioun steet nämlech, dass - selbstverständlech do, wou et ënnert der Responsabilitéit vun Ärem Ministère ass - och an de Busser an an den Zich Spenderen opgestallt solle ginn. Dat freet nämlech d'Motioun. A wat d'Gemengen ugeet, ass et d'Fro, se ze invitéieren, sech där Initiativ ze associéieren, et ass net, fir hinnen dat ze ordonéieren.

Bon, souwisou ass et: D'Kompetenz vun Ärem Ministère huet jo awer och eng aner Dimensioun, mir hu jo och de gratis öffentliche Transport, dee jo och fir interkommunal Syndikater gëllt. Mee dat ass jo net gefrot. Et ass gefrot, si ze invitéieren, sech Ärer Initiativ ze associéieren. Duerfir meng Fro: Hutt Der wëlles, dass dann, sou wéi d'Motioun et freet, ëmzesetzen?

■ **M. Fernand Etgen, Président.**- Merci, Här Baum. Da Parole après ministre fir den Här Claude Wiseler.

■ **M. Claude Wiseler (CSV).**- Ech hunn eppes zu engem anere Sujet elo, wann den Här ...

■ **M. Fernand Etgen, Président.**- D'Wuert geet da fir d'Éischt zrëck un den Här Bausch.

(Interruption par M. François Bausch)

Dann den Här Wiseler, an nach den Här Fernand Kartheiser, an da geet d'Wuert zrëck un d'Regierung.

■ **M. Claude Wiseler (CSV).**- Da kann den Här Bausch sech nach iwwerleeën, wat en äntwert. Ech wëll Der Regierung Merci soe fir déi Äntwerten, déi se ginn huet. Eng Rei kann ech novollzéien, mat enger ganzer Rei anere sinn ech manner averstanen. Mee ech halen elo net eng frësch Ried.

Et ass just ee Punkt, deen ech hei wëll evoquéieren, well e mer wichtig ass, dat ass awer dee vun der Rechtsstaatlechkeet a vun eise Prozeduren. Wësst Der, mir sätzen am Fong hei, well mer am Mee d'lescht Joer, gemeinsam mat der Regierung d'ailleurs, decidéiert hunn, dass mer net e generell Gesetz géife maachen, wou d'Regierung kéint dann duerno hir Decisiounen am Regierungsgrot huelen, mee - well mer et hei mat konstitutionelle Fräiheeten ze dinn hätten, déi géifen ageschränkt ginn -, dass mer alleguer zsummen, Majoritéit an Opposition, géifen drop halen, dass all Aschränkung vu konstitutionelle Rechter bei de Leit iwwer Gesetz géif lafen. Dat hu mer gemeinsam decidéiert, hu mer d'ailleurs och an 13 Gesetzer 13-mol heibanen - an dofir sätze mer hei, well mer déi Decisioun geholl hunn - och exercéiert.

Allkéiers wann esou Rechter ageschränkt gi sinn, hu mer hei eng gesetzlech Basis dofir geschaaft. Wa mer d'Commercen zougemaach hunn, wa mer d'Caféen oder d'Restaurants zougemaach hunn, wa mer de Bau zougemaach hunn, ass et am Gesetz virgesi gewiescht. Wa mer d'Commercen zougemaach hunn, hu mer souguer gesot, wat fir eng nach géifen opbleiwen. Mir hu souguer gesot, wou déi eenzel Commercen da misste Riddoen driwwerhänken, wat net huet därfe verkaaft ginn. Alles dat hu mer quasiment am Gesetz protegéiert. An ech hunn dat richtig esou fonnt!

Elo ass et awer hei, just am Kader vun der Éducation nationale, wou mer déi Liberté de commerce notament bei Foyeren, bei Crèchen, déi kommerziell Betriber sinn, zoumaachen an elo decidéieren, dass mer dat oui Gesetz maachen. An ech soen, genau dat ass dat, wat ech net verstinn! Ech fannen et net normal, dass da gesot gëtt: „Dat geet iwwer Recommendation“, a wa se net follegen, da kënt den Direkter vun der Santé, da maacht Der eng Ordinance. Ech weess och, dass dat am 80er Gesetz esou steet. Mee dat ass awer net, fir eng generell Moosssnam ze huelen iwwer Wochen an iwwer Méint eraus, wou dann all déi Betriber einfach zougemaach ginn. Ech fannen, dass déi Decisioun, déi mer gemeinsam am Mee geholl hunn, fir esou Aschränkungen an e Gesetz ze schreiwen, nach wie vor déi richtig ass.

An ech proposéieren en fin de compte, dass d'nächst Woch - op jidde Fall wäerte mir dat ufanks

nächster Woch hei froen - d'Educatiouskommissioun zsummekënn, fir eng Kéier iwwert déi Problematik vun der Legalitéit vun deene Moosssnamen, déi an der Educatioun ze huele sinn, gemeinsam ze diskutéieren an och Recommendationen auszeschwätzen, wéi mir als Chamber mengen, dass et sollt gemaach ginn. Do geet et net ëm d'Eléganz vun den Texter, mee do geet et ëm Grondprinzipien, wa mer Fräiheeten aschränken.

■ **M. Fernand Etgen, Président.**- Merci villmools, Här Wiseler. An da geet d'Wuert un den Här Kartheiser.

■ **M. Fernand Kartheiser (ADR).**- Jo, Här President, ganz kuerz just: Ech wëll dem Här Wiseler a sengen Iwwerleungen do Recht ginn. Mee et ass net, fir iwwert de Fong vun der Debatt ze schwätzen, wou ech elo d'Wuert froen - a merci, dass Der mer et ginn hutt, Här President -, mee iwwer eng prozedural Saach.

Mir haben elo dës Debatt, an ech fannen et och gutt - fir dass mer eis gutt verstinn -, dass d'Regierung op all Froen äntwert, déi hir gestallt ginn. Ech fannen dat richtig. Ech begrëissen dat. Ech stellen awer och gläichzäitig fest, dass d'Regierung méi wéi dräimol sou laang geschwat huet wéi virgesinn. Och dogéint hunn ech näischt. Mee de Problem, deen ech dobäi hunn, dat ass, dass d'Deputéiert vun der Opposition praktesch op d'Minutt gesot kréien, wéi laang se solle schwätzen. An da gëtt geschellt an dann heescht et: „Elo geet et duer.“ An d'Regierung schwätzt dräimol méi laang, wéi se soll! Do ass en Ongläichgewicht. An dat wëlle mer net!

Ech mengen, mir als ADR - an ech mengen, wéi all Partei heibannen - froen dann och an deem Kontext, dass eis Bemierkunge kënn voll ausgefouert ginn an dass mer net ënnerbrach ginn, wéi d'Regierung net ënnerbrach gëtt, fir dass mer eng Debatt hunn, wou all d'Standpunkte kënn voll zur Geltung kommen. Ech mengen, da komme mer och virun.

Ech soen lech Merci.

■ **M. Fernand Etgen, Président.**- Merci, Här Kartheiser. Ech wëll awer direkt soen: Dat ass relativ schwéier ze handlen. Et gëtt ëmmer erëm gesot vun de Froesteller, dass et begréisst gëtt, dass déi dräi Ministeren oder véier Ministeren hei sinn. An da ginn d'Froen och gestallt. An da mussen awer d'Regierungsmitglieder och d'Geleeënheet kréien, fir dorobber ze äntwerten. Ech mengen, dass ass awer e Spill, dat gehéiert awer derzou, dass mer e flotten Austausch kréien tëschent deene Leit, déi Froe stellen, déi d'Regierung wëlle kontrolléieren, an deenen, déi dann awer och Zäit fir eng Äntwert verdéngt hunn.

■ **Une voix.**- Très bien!

■ **M. Fernand Etgen, Président.**- Wëllt d'Regierung nach dorobber äntwerten?

(Brouhaha)

Dat schéngt net de Fall ze sinn. Da kënn mer elo zur Ofstëmmung iwwert de Projet de loi 7768 kommen. Den Text ...

(Brouhaha)

■ **M. Marc Baum (déi Lénk).**- Här President, den Här Bausch wollt virdrun äntwerten, wann ech mech net ieren.

■ **M. François Bausch, Ministre de la Mobilité et des Travaux publics.**- Ech bleiwen derbäi ...

Här President, ee Saz, well soss ...

■ **M. Fernand Etgen, Président.**- Jo, hei den ...

■ **M. François Bausch, Ministre de la Mobilité et des Travaux publics.**- Mir spille jo kee Pingpong hei. Ech bleiwen derbäi, ...

■ **M. Fernand Etgen, Président.**- Den Här Bausch kritt nach eng Kéier d'Wuert zrëck.

■ **M. François Bausch, Ministre de la Mobilité et des Travaux publics.**- Ech bleiwen derbäi: Ech hunn de Gemengen näischt virzeschreiwen. D'Gemenge wëssen et, et sätze jo genuch Gemengevertrieeder heibannen! Wann déi et schonn all géife maachen, wär scho vill geschitt. Also, ech brauch hinnen net ze soen, wat se ze maachen hunn.

Dat Zweet ass: Déi 20.000 Dosen, déi verdeelt gi sinn an den Zich, dat ass, well et technesch gesinn - dat hunn ech gesot - schwierig ass, dat iwwerall esou ze installéieren. Et gëtt alles gekuckt. Och an de Busse gëtt gekuckt, an den Trammen. An och, wann d'Chamber eng Motioun mécht - well d'Chamber ka jo hei einfach eng Motioun maachen -, da muss d'Regierung nach kucken, ob dat, wat alles dann am Detail verlaangt gëtt, wann et ëm technesch Froe geet, och ëmsetzbar ass, sou wéi et verlaangt gëtt. Mir kucken dat alles. An dat, wat technesch machbar ass, maache mer. En Deel ass scho gemaach, hunn ech gesot. An da wëll ech awer och nach eng Kéier drun erënneren, dass d'Zich an d'Busse an all d'Trammen all Dag x-mol desinfizéiert ginn, esou wéi och nach, wa se an hiren Depot eropfuere, dat wëll ech awer och nach derbäisoen.

■ **M. Fernand Etgen, Président.**- Merci nach eng Kéier dem Här Mobilitéitsminister.



Vote sur l'ensemble du projet de loi 7768 et dispense du second vote constitutionnel

De Vote électronique fir déi perséinlech Stëmmen ass amgaang.

Duerno maachen ech den Appel nominal fir déi, déi wëllen e Vote par procuration ofginn.

(Appel nominal pour votes par procuration)

Domadder ass dëse Projet de loi mat 31 Jo-Stëmme géint 29 Nee-Stëmmen ugeholl.

Ont voté oui : MM. Guy Arendt, André Bauler, Gilles Baum, Mme Simone Beissel, MM. Frank Colabianchi, Fernand Etgen, Gusty Graas, Max Hahn, Mme Carole Hartmann, MM. Pim Knaff, Claude Lamberty et Mme Lydie Polfer ;

Mme Simone Asselborn-Bintz, M. Dan Biancalana, Mmes Tess Burton, Francine Closener, MM. Yves Cruchten, Mars Di Bartolomeo, Georges Engel, Claude Haagen, Mmes Cécile Hemmen et Lydia Mutsch ;

Mme Semiray Ahmedova, MM. Carlo Back, François Benoy, Mmes Djuna Bernard, Stéphanie Empain, Chantal Gary, M. Marc Hansen, Mme Josée Lorsché et M. Charles Margue.

Ont voté non : Mmes Diane Adehm, Nancy Arendt épouse Kemp, MM. Emile Eicher, Félix Eischen, Paul Galles, Léon Gloden, Jean-Marie Halsdorf, Mmes Martine Hansen, Françoise Hetto-Gaasch (par M. Aly Kaes), MM. Aly Kaes, Marc Lies, Georges Mischo, Mme Octavie Modert, M. Laurent Mosar, Mme Viviane Reding, MM. Gilles Roth, Jean-Paul Schaaf, Marc Spautz, Serge Wilmes, Claude Wiseler et Michel Wolter (par Mme Martine Hansen) ;

MM. Jeff Engelen, Fernand Kartheiser, Fred Keup et Roy Reding (par M. Jeff Engelen) ;

MM. Sven Clement et Marc Goergen ;

MM. Marc Baum et David Wagner.

Freet d'Chamber d'Dispens vum zweete Vote constitutionnel?

(Assentiment)

Et ass also esou decidéiert.

Résolution et motions

Da komme mer zu der Resolutioun an den zwou Motiounen, déi zu dësem Projet de loi ofgi gi sinn.

Résolution 1

Fir d'éischt d'Resolutioun, déi vun der ADR deposéiert ginn ass, ...

(Brouhaha)

... wou gefrot gëtt, datt d'Cour des comptes soll e Spezialrapport iwwert de Large-Scale-Testing maachen. Wëllt nach een d'Wuert zu dëser Motioun ergräifen? De Georges Engel. Här Engel, Dir hutt d'Wuert.

■ **M. Georges Engel (LSAP)**.- Jo, merci, Här President. Ënnert de Consideranten, muss ech soen, dass ech dee leschte Considerant awer héchst bedenklech fannen. Dir frot hei, dass mer zu Lëtzebuerg manner sollen testen, fir dass mer méi an d'Vakanz kënne goen, mam Risiko, dass mer eng ganz Rei vu Leit, déi da positiv sinn, weider ënner eiser Bevëlkerung lafe loosson an domadder nei Ustiechunge maachen. Ech mengen, dass dat absolut net dat ass, wat mer hei solle propagéieren, an dass dat och net dat ass, wat ee soll vertrieden.

Zum „Fuerdert“-Paragraf: Dir frot, dass d'Cour des comptes eng Käschten-Notzen-Evaluatioun soll maachen. Ech mengen net, dass d'Cour des Comptes fir d'Käschten-Notzen-Analys do ass. Déi musse kucken, ob dat alles finanziell an der richteger Reiefolleg gelaf ass, mee si sinn awer net dofir do, fir d'Opportunitéit ze kommentéieren an ze kucken, ob dann d'Resultat vun deem Prozess, deem hei ugefaunt ginn ass, och richtig war. Duerfir géif ech proposéieren, dass mer déi Resolutioun hei sollen ofleenen.

■ **Une voix**.- Très bien!

■ **M. Fernand Etgen, Président**.- Merci villmools, Här Engel. Dann huet den Här Claude Wiseler d'Wuert gefrot.

■ **M. Claude Wiseler (CSV)**.- Merci, Här President. Mir sinn der Meenung, datt d'Cour des comptes effektiv eng Kéier sollt iwwert déi ganz Prozedur vum Large-Scale-Testing kucken. Dir wësst, datt mer an der Ufanksphas eng ganz Rei Diskussiounen iwwert déi Prozeduren haten.

Dat gesot, muss ech zu där heiter Resolutioun zwou Saache soen. Dat Éischt ass, datt ech mat all deene Consideranten, sou wéi se hei stinn, net kann averstane sinn, well all déi Consideranten, sou wéi se hei stinn, sinn am Fong suggestiv, datt dee Large-Scale-Testing näischt bréngt, datt en net sënnvoll ass, datt alles muss a Fro gestallt ginn. An dat ass nu wierklech net dat, wat mir als CSV wëllen zum Ausdrock bréngen. Mir wëlle kucken, ob alles richtig gelaf ass, a mam Rescht an de Consideranten, do kënne mer net domat d'accord sinn. Éischstens.

An zweetens ass et och eng normal Prozedur, datt sou wéi op jidde Fall d'Gepflogentheete vun der Chamber hei sinn, normalerweis an der Commission de l'exécution budgétaire iwwert d'Noutwendegkeet an de Sënn vun enger Saisine vun der Cour des comptes geschwat gëtt. Ech géif also och proposéieren, datt mer an iergendenger Reunioon vun der Comexbu, déi an Zukunft wäert stattfannen, déi do Diskussioun uginn an da gemeinsam decidéieren, ob mer e Rapport froen oder net. Mir sinn am Prinzip derfir, mee ech fannen, mir sollen déi Gepflogentheete vun der Chamber respektéieren. Mir wäerten eis also bei dëser Motioun enthalten.

■ **M. Fernand Etgen, Président**.- Merci villmools, Här Wiseler. Et ass keng weider Wuertmeldung ... Nee, den Här Marc Baum freet nach d'Wuert.

■ **M. Marc Baum (déi Lénk)**.- Merci, Här President. Also an där heiter Form kënne mir op jidde Fall déi Resolution och net matstëmmen. Notamment, well an de Consideranten eng ganz Rëtsch suggestiv Aussoe gemaach ginn, déi awer zumindest och zweifelhaft sinn. Ech mengen, wat mer souwisou brächten - an do war eng Motioun oder eng Resolutionioun an der Vergaangenheet weesentlech méi sënnvoll -, dat ass, eng Kéier d'Evaluatioun ze maache vun alle Coronapoliticken, a wou sécherlech eng dovunner de Large-Scale-Testing ass, une fois, wa mer dës Pandemie iwwerstanen hunn. Elo just ee singuläert Element wéi de Large-Scale-Testing erauszehuelen, an dat en plus mat awer douteux Consideranten, gesi mir net an a mir wäerten duerfir och, also ënnert där heiter Form, d'Resolutioun net matstëmmen.

■ **M. Fernand Etgen, Président**.- Merci villmools, Här Baum.

Da kënne mer elo zum Vott vun dëser Resolutioun kommen.

Vote sur la résolution 1

Fir d'éischt de Vote électronique fir déi perséinlech Stëmmen.

Duerno maachen ech den Appel nominal fir déi, déi wëllen e Vote par procuration ofginn.

(Appel nominal pour votes par procuration)

Domadder ass dës Resolutioun mat 4 Jo-Stëmmen, 35 Nee-Stëmmen an 21 Enthalungen ofgeleent.

Ont voté oui : MM. Jeff Engelen, Fernand Kartheiser, Fred Keup et Roy Reding (par M. Jeff Engelen).

Ont voté non : MM. Guy Arendt, André Bauler, Gilles Baum, Mme Simone Beissel, MM. Frank Colabianchi, Fernand Etgen, Gusty Graas, Max Hahn, Mme Carole Hartmann, MM. Pim Knaff, Claude Lamberty et Mme Lydie Polfer ;

Mme Simone Asselborn-Bintz, M. Dan Biancalana, Mmes Tess Burton, Francine Closener, MM. Yves Cruchten, Mars Di Bartolomeo, Georges Engel, Claude Haagen, Mmes Cécile Hemmen et Lydia Mutsch ;

Mme Semiray Ahmedova, MM. Carlo Back, François Benoy, Mmes Djuna Bernard, Stéphanie Empain, Chantal Gary, M. Marc Hansen, Mme Josée Lorsché et M. Charles Margue ;

MM. Sven Clement et Marc Goergen ;

MM. Marc Baum et David Wagner.

Se sont abstenus : Mmes Diane Adehm, Nancy Arendt épouse Kemp, MM. Emile Eicher, Félix Eischen, Paul Galles, Léon Gloden, Jean-Marie Halsdorf, Mmes Martine Hansen, Françoise Hetto-Gaasch (par M. Aly Kaes), MM. Aly Kaes, Marc Lies, Georges Mischo, Mme Octavie Modert, M. Laurent Mosar, Mme Viviane Reding, MM. Gilles Roth, Jean-Paul Schaaf, Marc Spautz, Serge Wilmes, Claude Wiseler et Michel Wolter (par Mme Martine Hansen).

Motion 1

Da kéime mer zur Motioun Nummer 1, déi vun de Piraten deposéiert ginn ass an déi am Fong geholl freet, datt d'Gemengeresponsabel all Woch sollen e Rapport kréie mat Informatiounen zum Infektiouns-geschéien an hirer respektiver Gemeng.

Den Här Georges Engel freet d'Wuert.

■ **M. Georges Engel (LSAP)**.- Merci, Här President. Et muss ee soen, dass verschidden Donnéeën, déi hei gefrot ginn - menges Wëssens emol ass dat a verschiddene Gemengen op alle Fall esou -, souwisou scho kommunizéiert ginn. Wann eppes an enger Maison relais oder an enger Crèche vun enger Gemeng ass, vun der Schoul, da kréien d'Gemengen déi Informatiounen scho matgedeelt. Op alle Fall ass dat an deene Gemengen, deenen ech emol méi no war, ëmmer esou gelaf.

Neanmoins si mer awer der Meenung, dass dat heiten eng gutt Saach ass. An d'Gemenge sinn da selwer verantwortlech derfir, wat se mat hirer Kommunikatioun maachen, wéi se dat uginn. Ech mengen, déi Zuelen, déi gëtt et, an duerfir mengen ech schonn, dass een déi Motioun hei kéint unhuelen.

■ **M. Fernand Etgen, Président**.- Merci villmools, Här Engel. Da kritt den Här Claude Wiseler d'Wuert.

■ **M. Claude Wiseler (CSV)**.- Ganz einfach: Mir stëmmen déi Motioun, well mer dat normal fannen, wat drasteet.

■ **M. Fernand Etgen, Président**.- Ech mengen, da kéinte mer zum Vott vun dëser Motioun kommen. Kënne mer per Handophiewen ofstëmmen?

(Assentiment)

Vote sur la motion 1

Wien ass d'accord mat dëser Motioun?

Wien ass dergéint?

Wien enthält sech?

Domadder ass dës Motioun eestëmmeg ugeholl.

Motion 2

Da kéime mer zur Motioun Nummer 2 vun de Piraten, wou et ëm d'Pressekonferenze vun de Regierungsmembere geet. Wëllt nach een d'Wuert zu dëser Motioun ergräifen?

Den Här Gilles Baum, wannechgelift.

■ **M. Gilles Baum (DP)**.- Merci, Här President, dass Der mer d'Wuert gitt, fir Positioun ze huelen zu der zweeter Motioun vun de Piraten. Ech mengen, Dir hutt dat alleguerte verfollegt: Déi Pressekonferenzen, déi vun de Regierungsmembere gehale ginn, déi ginn alleguerten integral a live iwwerdroen am Livestream op gouv.lu. Et kann ee sech se och op Facebook ukucken, wou se gläichzäiteg lafen. Dat huet awer dann de Virdeel - oder den Nodeel -, dass een dann d'Commentaire vun de Leit och direkt ka matliesen. Dat kann da jiddwereen aschätzen, wéi en et fir richtig hält.

Et gëtt och keng Restriktiounen op dëse Pressekonferenzen. Et gëtt keng Restriktiounen fir opzehuelen an et gëtt och keng Restriktiounen, fir dat Material herno ze diffuséieren. All Medium, deem dohinner kënnt, ass fräi, fir alles opzehuelen an och alles ze publizéieren. An all Journalist huet och integralen Zougang zum Video, dee bis elo ëmmer op der Mediathéik vum SIP accessibel war. Dat heescht, souwäit de Journalist e Login huet fir op de Service information et presse, kënnt en och do drun.

(Interruption)

Elo gëtt hei awer e bësse suggeréiert, wéi wann eppes ze verstoppe wär. Ech mengen, wann eng Pressekonferenz live iwwerdroe gëtt, ech weess net, ob et do wierklech vill ze verstoppe gëtt! Ech fannen dat elo an der Formulatioun hei e bësse komesch. Well et ass net obligatoresch, déi Pressekonferenz live ze iwwerdroen, mee et ass e Service un der Press - also esou gesi mir et op alle Fall -, an et ass eng Approche, déi a mengen Aen transparent ass.

Dat, wat elo hei gefrot gëtt, domat, mengen ech, hu mer kee Problem, well et decidéiert ass, fir effektiv dat doten och nach no der Pressekonferenz zougänglech ze maachen. Dat Eenzezt, wat problemaresch ass, ech mengen, dat wësse mer, dat ass d'Tounqualitéit vun de Froen. Déi ass net ëmmer ganz gutt, dat heescht, do ass vläicht nach eppes drun ze schaffen.

Also wéi gesot, dat wat elo hei gefrot ass, ass decidéiert, dofir ass déi Motioun hei superfetatoire.

Et gëtt awer ee Grond, et gëtt souguer zwee Grënn, firwat ech de Kollegen aus der Majoritéit géif proposéieren, fir se ofzeleenen. An dat sinn d'Consideranten: deen éischte Considerant, deen eis drun erënnert, dass mer sollen héich Standarden, déi héchste Standarden anhalen, wat d'Informatioun ugeet; an dann natierlech och de Flux vun Informatiounen, wat den zweete Considerant ass: Wa mir als Majoritéitsparteien déi Motioun hei géife matdroen, da géife mer jo quasi der Regierung soen, dass mer net dat Vertrauen hätten, wat mer a se hunn, fir de Koalitiounsprogramm esou ëmzesetzen, wéi mer e festgehalen hunn. An dofir proposéieren ech, dës Motioun hei net matzestëmmen.

■ **M. Fernand Etgen, Président**.- Merci, Här Gilles Baum. An da freet den Här Claude Wiseler d'Wuert.

■ **M. Claude Wiseler (CSV)**.- Merci, Här President. Also mir stëmme selbstverständlech déi Motioun hei mat, well ech et normal fannen, datt déi Informatiounen och duerno um Site sinn.

Ech fanne just dem Här Baum seng Explikatiounen e wéineg besonnesch, well en erstaunt ass oder net d'accord ass mat deene Consideranten, an déi Considerante sinn haaptsächlech awer Citatiounen aus dem Koalitiounsprogramm. Wann d'Oppositioun géif soen, si géif de Koalitiounsprogramm komesch fannen, da géif ech dat verstoen. Mee datt Dir et sot, verstinn ech weesentlech manner. Dat wat hei steet, ass einfach logesch sënnvoll, an da stëmme mer et evidenterweis mat.

■ **Mme Martine Hansen (CSV)**.- Très bien!

■ **M. Fernand Etgen, Président**.- Merci, Här Wiseler. Dann den Här Marc Baum, wannechgelift.

■ **M. Marc Baum (déi Lénk)**.- Jo, merci, Här President. Natierlech wäerte mir déi heite Motioun och matstëmmen. Ech si jo och ganz kuerz a menger Interventioun drop agaangen. Ech fanne just d'Argumentatioun, fir se ofzeleenen, elo awer e

bësse bosseg. Wann ee seet: „Mir maachen zum Considerant de Koalitiounsprogramm vun den dräi Regierungsparteien“, datt dat - e Verweis op de Koalitiounsprogramm - e Grond ass, fir eng Motioun net méi unzehuelen, mee da fäerten ech, datt elo d'Majoritéitsparteien awer Schwieregkeete kréien, hir eege Motiounen an Zukunft selwer nach duerchzekréien.

■ **Une voix**.- Très bien!

■ **M. Marc Baum (déi Lénk)**.- Well do gëtt sech ganz vill a ganz dacks op de Koalitiounsprogramm referéiert, fir eeben eng Motioun ze begrënnen. Bon, dat sief dohigesot! Mir fannen, datt se net superfetatoire ass an datt d'Chamber hei am Géigendeel ganz gutt géif drun doen, déi doten Initiativ ze ënnerstëtzen.

Merci.

■ **M. Fernand Etgen, Président**.- Merci villmools, Här Marc Baum. An da kritt d'Wuert den Auteur vun der Motioun, den Här Sven Clement.

■ **M. Sven Clement (Piraten)**.- Merci, Här President. Merci och de Virriedner, déi sech d'Méi gemaach hunn, d'Motioun ze liesen, an erausfonnt hunn, datt dat heiten zu engem groussen Deel tatsächlech aus dem Koalitiounsaccord staamt.

Ech hu se awer net geschriwwen, well ech der Meenung sinn, datt de Koalitiounsaccord esou gutt ass, oder well ech d'Regierung wëilt desavouéieren. Ganz am Contraire, ech hu se geschriwwen, well d'Journaliste sech doriwwer opreegen, datt dat net gemaach gëtt! Elo hei ze maachen, wéi wann et superfetatoire wär, fannen ech e bësse speziell. Well ech war nach gëschter Owend fir d'lescht op deen offizielle YouTube-Kanal vun der Regierung kucken, wou déi Pressekonferenzen nëmmen a geschnidder Fassung disponibel sinn. D'Journaliste kréien, certes, e Link geschéckt, ...

■ **Une voix**.- A!

■ **M. Sven Clement (Piraten)**.- ... wou se se kënne kucke goen, ...

■ **La même voix**.- Maja!

■ **M. Sven Clement (Piraten)**.- ... mee dat heescht net, datt d'Regierung se verëffentlecht!

Wann ech den Här Baum elo grad richtig verstanen hunn, huet den Här Baum hei d'Journalisten invitéiert - an ech wëll dat just nach eng Kéier, for the record, ganz kloer soen -, deen net gelistete Link - wou d'Regierung oder de SIP sech explizitt entschheet huet, dee Link just engem beschränkte Personekrees zougänglech ze maachen - ze huelen, de Video erofzelueden - potenzielle „copyright infringement“! -, an en dann erëm eropzeluede fir ze publizéieren.

Wann hei de Verrieder vun der Majoritéit Journalisten dozou opfuert, „copyright infringement“ ze begoen, da weist dat, wéi sënnfräi verschidde Copyrightgesetzter sinn! Mee virun allem weist et, wéi wéineg verschidde Leit verstinn, wéi Copyright fonctionéiert. De Problem ass: Dee Video gëtt vun der Regierung produzéiert. Dee Video huet also en Droit d'auteur vun der Regierung, gëtt vun der Regierung op hire YouTube-Kanal eropgelueden. Dat heescht: Et dierf net egal wien dee Video einfach eroflueden. Wat den Här Baum richtig gesot huet, ass: Et ka jiddwereen en ophuelen. Dat stëmmt! Mee diffuséieren ass eppes aneres.

(Interruption)

Dofir géif ech d'Regierung invitéieren, dës Videoen einfach tel quel anstatt als „unlisted“ op YouTube ze setzen, se als „listed“ dropzesetzen. Et géif iwwregens d'Aarbecht erspueren, fir se mussen ze schneiden. An et sinn zwee Klicke pro Video - ech mengen, datt dat maachbar ass. Et ass sécherlech méi einfach, wéi Spenderen am Bus oder am Tram opzerichten.

(Brouhaha)

■ **M. Fernand Etgen, Président**.- Merci villmools, Här Clement.

Et ass keng weider Wuertmeldung méi do, soudatt mer da kënnen zum Vott vun der Motioun Nummer 2 kommen.

Vote sur la motion 2

Fir d'éischt de Vote électronique fir déi perséinlech Stëmmen.

Duerno maachen ech den Appel nominal fir déi, déi wëllen e Vote par procuration ofginn.

(Appel nominal pour votes par procuration)

Domadder ass dës Motioun bei 29 Jo-Stëmme géint 31 Nee-Stëmmen ofgeleent.

Ont voté oui : Mmes Diane Adehm, Nancy Arendt épouse Kemp, MM. Emile Eicher, Félix Eischen, Paul Galles, Léon Gloden, Jean-Marie Halsdorf, Mmes Martine Hansen, Françoise Hetto-Gaasch (par M. Aly Kaes), MM. Aly Kaes, Marc Lies, Georges Mischo, Mme Octavie Modert, M. Laurent Mosar, Mme Viviane Reding, MM. Gilles Roth, Jean-Paul Schaaf, Marc Spautz, Serge Wilmes, Claude Wiseler et Michel Wolter (par Mme Martine Hansen) ;



MM. Jeff Engelen, Fernand Kartheiser, Fred Keup et Roy Reding (par M. Jeff Engelen) ;

MM. Sven Clement et Marc Goergen ;

MM. Marc Baum et David Wagner.

Ont voté non : MM. Guy Arendt, André Bauler, Gilles Baum, Mme Simone Beissel, MM. Frank Colabianchi, Fernand Etgen, Gusty Graas, Max Hahn, Mme Carole Hartmann, MM. Pim Knaff, Claude Lamberty et Mme Lydie Polfer ;

Mme Simone Asselborn-Bintz, M. Dan Biancalana, Mmes Tess Burton, Francine Closener, MM. Yves Cruchten, Mars Di Bartolomeo, Georges Engel, Claude Haagen, Mmes Cécile Hemmen et Lydia Mutsch ;

Mme Semiray Ahmedova, MM. Carlo Back, François Benoy, Mmes Djuna Bernard, Stéphanie Empain, Chantal Gary, M. Marc Hansen, Mme Josée Lorsché et M. Charles Margue.

6. Dépôt d'une proposition de loi par M. Fernand Kartheiser

Den Här Fernand Kartheiser kritt d'Wuert fir den Depot vun enger Resolution a vun enger Proposition de loi. Här Fernand Kartheiser, Dir hutt d'Wuert.

■ **M. Fernand Kartheiser (ADR).**- Villmools merci, Här President. Dir Dammen an Dir Hären, ech wëllt dann ufänke mat enger Proposition de loi. Déi referéiert sech op dat Gesetz, wat mer hunn iwwert de Referendum um Niveau national. Dat ass vum 4. Februar 2005. An Dir wësst, wann ee sech wëllt aschreiwen, fir esou eng Iddi fir e Referendum ze ënnerstëtzen, da muss een op d'Gemeng goen. Do sinn da Lëschten ausgeluecht.

A mir hu geduecht, datt dat eigentlech net méi ganz zäitgeméiss ass. Net, datt mer eppes dogéint hätten, mee mir hunn an der Tëschenzäit eng Rei vun elektronesch Prozeduren, zum Beispill och an e sem Petitiounswiesen hei an der Chamber. An dës Proposition de loi soll eigentlech dann dat Gesetz vun 2005 an deem Sënn amendéieren, datt ee sech och kann elektronesch aschreiwen am Kader vun der Referendumsprozedur, fir dann déi Iddi ze ënnerstëtzen. An deem Sënn wëllt ech lech déi Proposition de loi iwwerreechen.

7771 - Proposition de loi relative à la procédure de collecte des signatures en vue d'un référendum prévu à l'article 114 de la Constitution et portant modification de la loi modifiée du 4 février 2005 relative au référendum au niveau national

■ **M. Fernand Etgen, Président.**- Merci, Här Kartheiser.

7. Dépôt d'une résolution par M. Fernand Kartheiser

Exposé

■ **M. Fernand Kartheiser (ADR), auteur.**- Dat Zweet betrëfft eng Resolution. An dat huet och mat engem Referendum ze dinn. An zwar wëllt ech hei driwwer schwätzen, ganz kuerz, datt mer an der Institutiounekommissioun jo iwwer Verfassungsännerungen diskutéieren an datt mer eng Situatioun hunn, wou 2018, virun de Walen also, virun den nationale Walen, eng ganz Rei vu Parteien e Versprieche gemaach hunn.

An dat Versprieche war, datt éischstens emol e breen effentlechen Debat soll organiséiert ginn, fir déi proposéiert Verfassungsännerungen an der Effentleckeet ze diskutéieren. An da sollt deem zweete Vote constitutionnel ersat ginn duerch e Referendum. Ech hunn hei d'CSV: „Vor dem ersten verfassungsrechtlichen Votum wird der Verfassungstext in regionalen Diskussionsrunden mit den Bürgern erörtert und durchdiskutiert.“ An da kënnt de Referendum. Fir d'LSAP soll „der neue Verfassungstext allen stimmberechtigten Bürgern“ fir e Referendum virgeluecht ginn. D'Demokratesch Partei idem.

Elo ass et awer esou, datt an där Institutiounekommissioun vun engem Referendum keng Ried méi geet. An dat mécht eis Suergen! Dofir wollte mir hei eng Resolution proposéiere fir ze soen: „Majo, déi Aarbechten, déi mussen enger breeder effentlecher Diskussioun virgeluecht ginn, esou wéi d'Parteien dat de Wieler och versprach hunn!“ An da muss och den Engagement agehale ginn, dee virun de Wale geholl gouf, nämlech datt den zweete Vote constitutionnel net hei an der Chamber ass, mee duerch e Referendum ersat gëtt. Dat ass e Walverspriechen, wat eng Rei Parteie gemaach hunn. A vu datt dovunner am Abléck keng Ried méi geet, fanne mir et ganz wichteg, datt dat elo hei nach eng Kéier kloer gesot gëtt, datt net hannert dem Réck vum Wieler - well esou gesäit et aus -, datt net hannert dem Réck vun de Leit eng Verfassungsännerung gemaach gëtt, mee a voller Transparenz an a Consultatioun mat de Leit an iwwert de Wee vun engem Referendum.

Ech soen lech Merci.

■ **Une voix.**- Très bien!

■ **M. Fernand Etgen, Président.**- Merci villmools, Här Kartheiser.

Résolution

D'Chamber vun den Deputéierten

- *stellt fest, datt d'Aarbechten an der Institutionen- a Verfassungsrevisiounskommissioun vun der Chamber un neie Verfassungstexter séier virukommen;*

- *erënnert un d'Verspriechen, dat vill Parteie virun den nationale Legislativwalen 2018 ginn haten, fir déi nei Verfassungstexter enger breeder effentlecher Debatt virzeleeën, dono nach Ännerunge virzehuelen an dono, nom éischte konstitutionelle Vott an der Chamber, den zweete Vott iwwert déi nei Verfassung duerch e Referendum ze ersetzen;*

decidéiert,

- *esou séier wéi méiglech eng breet effentlech Debatt iwwer all Propositionen zur Ofännerung vun der Verfassung, am Kader vun deenen Aarbechte fir eng global Verfassungsrevisioun, ze organiséieren;*

- *d'Resultater vun deene breede Consultatiounen an d'Aarbechten afléissen ze loossen;*

- *den zweete konstitutionelle Vott iwwer all Revisiounspropositione fir d'Verfassung, déi sech an eng méi global Verfassungsrevisioun aschreiwen, duerch e Referendum ze ersetzen.*

(s.) *Fernand Kartheiser.*

8. 7664 - Projet de loi portant modification de la loi modifiée du 23 juillet 1952 concernant l'organisation militaire

Elo komme mer zum Projet de loi 7664, enger Ofännerung vum Gesetz iwwert d'Militärorganisatioun. D'Riedezäit ass nom Basismodell festgeluecht. An d'Wuert huet elo d'Rapportrice vun dësem Projet de loi, déi honorabel Madamm Stéphanie Empain. Madamm Empain, et ass un lech.

Rapport de la Commission de la Sécurité intérieure et de la Défense

■ **Mme Stéphanie Empain (déi gréng), rapportrice.**- Villmools merci, Här President. Dir Dammen an Dir Hären, Lëtzebuerg huet sech engagéiert, säin Effort de défense ze erhéijen, fir op 0,6 % vum PIB ze kommen. An dës Regierung verfollegt och méi allgemeng d'Zil, fir d'Kredibilitéit an d'Zouverlässegkeet vu Lëtzebuerg als faire Partner an der NATO a fir d'EU ze festegen.

Als solidaresche Partner an engem Sécherheetsbündnis mussen mer natierlech och an Zukunft derfir suergen, dass mir eisen Effort esou héich halen, dass mer eisen Engagementer am Allgemenge kënnen nokommen. Dobäi ass et de Prinzip vum Effort raisonnable, deen eis leet.

Den Effort de défense besteet awer natierlech net just doranner, sech u gréissere Projeten ze bedeelegen, mee d'Arméi selwer muss jo och deementspriedend opgestallt sinn, fir de jeeweilege Missiounen kënnen gerecht ze ginn a fir hiren Deel zum Effort de défense bäizedroen.

An och den NATO Defence Planning Process verlaangt eis esou munches um Niveau vum Personal an der Formatioun vun deem Personal of, soudass och den NDPP eis forcéiert, Adaptatiounen virzehuelen.

Dat bedeit deementspriedend, dass och verstärkt muss an d'Ressources humaines innerhalb vun der Arméi investéiert ginn, an zwar besonnesch um Niveau vun den Offiziéier an den Ënneroffiziéier, dëst fir sécherzustellen, dass mir en héijen operationellen Niveau kënnen oprechterhalen. Dozou kënnt awer och, dass den Accord vun 2019 iwwert d'Aarbechtszäiten an de Repos an der Arméi de Mangel u Personal nach eemol staark verstärkt huet.

Aktuell ass d'Unzuel vun de Posten an de jeeweilege Karriären am Gesetz plafonéiert. Dëse Plaffong ass zënter 2008 net méi aktualiséiert ginn a muss deemno no uewen ugepasst ginn. An dat ass dat, wat mir elo mat dësem Gesetz maachen, fir eise Rekrutementsziler bis 2023/2024 kënnen gerecht ze ginn.

Am Abrëll dëst Joer wäert allerdéngs och dat neit Militärgesetz deposéiert ginn. An dëst gesäit dann eigentlech och keng Plaffonge méi vir. Änlech wéi dat zum Beispill och bei der Police de Fall ass, soll dann an den zukünftege Budgeten eng bestëmmt Unzuel un zousätzleche Poste virgesi ginn.

Wat mer also elo haut hei maachen, ass an deem Sënn eng Tëscheléisung. Mir wëllen der Arméi et erlaben, weider ze rekrutéieren, och ier dat neit Militärgesetz a Kraaft trëtt. A vu dass dat neit Gesetz awer e relativ komplex Dokument ass, wäert dat nach eng Zäitche daueren, bis et duerch d'Prozedur ass, soudatt et fir d'Arméi wichteg ass, elo schonn op de Wee vun dëser klenger Gesetzesadaptatioun ze goen. An dofir wollt ech och Merci soen, dass mer dëse Projet haut konnten op den Ordre du jour huelen an dëser exzeptioneller Plenièr, fir eeben der Arméi ze erlaben, mam Rekrutement virunzekommen.

Wat gesäit d'Gesetz also elo konkret vir? Et geet ëm de Rekrutementsplang vun der Arméi fir den Zäiraum 2021 bis 2024, deen eebe virgesäit, den Effectif vun der Arméi ëm zousätzlech 164 Leit ze erhéijen. Hei handelt et sech souwuel ëm militärescht wéi och ëm zivillt Personal. An obwuel, wéi scho gesot, den Taux d'encadrement, also vun de Militaires de carrière, muss no uewe geschrauft ginn, gëtt och zivillt Personal rekrutéiert. Allerdéngs, wa mer dovunner schwätzen, 45 Leit pro Joer ze rekrutéieren, da sinn dat 15 Leit zivillt Personal an 30 Militaires de carrière.

Dëse Projet de loi ass den 10. September 2020 deposéiert ginn. Den 12. Oktober huet d'Chambre des Fonctionnaires et Employés publics hiren Avis dozou ofginn a si huet sech virun allem preoccupéiert gewisen iwwert de Fait, dass uviséiert gëtt, méi um Niveau vun de Carrières supérieures wéi bei de Carrières inférieures ze rekrutéieren. An hei krute mer awer och an der Kommissioun erkläert, dass et eeben esou ass, dass déi geplangt Adaptatiounen, déi elo virgeholl ginn, eeben den zukünftege Besoinen um Terrain, souwuel um Niveau vun der Planifikatioun wéi och vun der Exekutioun, Rechnung droen. An ausserdeem ass et och esou, dass dee Ratio sech och nach wäert relativéieren, well aktuell d'Carrières inférieures hire legale Plaffong nach net erreecht hunn an deemno do souwisou nach Sputt no uewen ass.

De Staatsrot huet säin Avis den 11. Dezember ofginn an en huet hei keng Opposition ausgeschwat. De 4. Februar hu mir de Projet an der Verdeedungskommissioun analyséiert an de Rapport dunn och den 9. Februar ugeholl.

Domadder ass mäi mëndleche Rapport fir haut ofgeschloss. Da bleift mer am Fong geholl just nach, der Arméi ze wënschen, dass se hir Rekrutementsziler erreecht an hir Campagne erfollegräich wäert verlafen.

Ech soen lech alleguerte Merci fir déi gutt Zesummenaarbecht an der Kommissioun an dass mer dat esou séier konnten op de Wee bréngen. Ech soen lech Merci fir d'Nolauschteren a ginn natierlech och den Accord vun eiser Fraktioun.

■ **Une voix.**- Très bien!

■ **M. Fernand Etgen, Président.**- An ech soen der Madamm Rapportrice Stéphanie Empain Merci.

Ech ginn d'Wuert direkt weider un den éischten ageschriwwene Riedner, den honorabelen Här Jean-Marie Halsdorf. Här Halsdorf, Dir hutt d'Wuert.

Discussion générale

■ **M. Jean-Marie Halsdorf (CSV).**- Merci, Här President. Ech wollt der Rapportrice Merci soe fir hiren effektiv gudden schréftlechen a mëndleche Rapport. An et ass kloer, dass dëse Projet de loi iwwert d'Organisation militaire vun eiser Arméi de militäreschen an ziville Kader op den Horizont 2024 festleet. Et ass schonn eng Demarche, déi novollzéibar ass. 2014 hu mer decidéiert, datt mer wëllen eisen Effort de défense héijen, um Sommet zu Wales vun der NATO. An dat geschitt dann haut och hei.

An ech gesinn, mengen ech, heiran och e Moyaen, fir d'Arméi méi attraktiv ze maachen, nämlech duerch eng Reorganisatioun vum personelle Kader.

Gutt, et gëtt invoquéiert, mir hätten nëmme 25 % Encadrement vun de Leit. Ech weess net, wat dat heescht. Mir sinn eng kleng Arméi. Mir maache praktesch all eis Missiounen mat Noperen, mat de Belsch meeschstens, a mir kënnen mol kee Bataillon opstellen. Dofir mengen ech, dass déi 25 % vun Encadrement, dass dat net onbedéngt en Argument ass, obschonn et mech awer géif interesséieren, wéi dat soll an Zukunft elo geschéien.

Dat heescht, Här Minister, wa mer elo méi encadréieren, kënnt Dir eis da vläicht an deenen nächste Méint eng Kéier an der Chamber déi Projektionen, déi et do gëtt, iergendwa matdeelen? Dat wär net schlecht. Da gesäit d'Kommissioun och, wéi d'Arméi sech dann do wëllt opstellen.

Ech wëll kloer soen: D'CSV ënnerstëtzt prinzipiell dësen numeereschen Ausbau. Mee wat heescht dat qualitativ, dësen Ausbau? Dat heescht, d'Arméi soll jo méi attraktiv ginn - ech hunn et gesot -, an do stelle sech awer da Froen beim Rekrutement. An déi ginn d'ailleurs och a verschiddenen Avisen opgeworf. D'Fro ass: Kréie mer genuch Leit als Offiziéier, genuch Leit als Ënneroffiziéier, genuch Leit als Kapereel? A wéi schreift d'Chambre des Fonctionnaires et Employés publics: an der Carrière inférieure géife mer keng Leit fannen! Ech mengen, do ass et derwäert, dass Der vläicht eng Analys maacht, ...

■ **Une voix.**- O.

■ **M. Jean-Marie Halsdorf (CSV).**- ... dass Der eng Analys maacht a kuckt, wouduerch dat ass, dass mer déi Leit net fannen.

Tatsaach ass och, wann ech richtig informéiert sinn, dass zum Beispill, wat d'Offiziéier ugeet, mer e Kader vun 80 Leit hunn de Moment. Déi sollte mer hunn. Et sinn der awer nëmme 66 do! Dat heescht:

Hu mer elo e Plang fir ze rekrutéieren, fir am Fong geholl méi Leit an d'Arméi ze kréien?

An iwwerhaupt, d'Iddi vun deem „Waasserkapp“, dee kéint entstoen, déi dann och opgeworf gëtt vun der Chambre des fonctionnaires: Wat ass dee wäert? Ech weess et net. Vlächicht kënnt Der eis do och e puer Detailer derzou ginn.

Wéi deem och ass, de Rekrutement muss moderniséiert ginn. D'Arméi muss méi Flexibilitéit kréien. An et muss och gekuckt ginn, wie wat decidéiert. Dat heescht, decidéiert elo hei d'Arméi, wien agestallt gëtt, oder mécht d'Defense (veuillez lire: mécht d'Direction de la défense) dat selwer? Dat ass fir mech och wichteg, dat ze wëssen.

Wat wichteg ass fir eis alleguerten, dat ass, dass mer e globalen Image fir eis Arméi opbauen, wou Transparenz a Kommunikatioun am Mëttelpunkt stinn. Mir brauchen am Fong geholl effektiv eng zukunftsfit Struktur, an dëst Gesetz, mengen ech, ass de richtige Wee dohinner. Duerfir ënnerstëtze mir et och.

An ofschléissend vlächicht nach eng Suerg, oder e Gedanken: Wa mer jo eng nei Attraktivitéit an eis Arméi misste kréien, op déi mer sollten houfreg sinn, da muss d'Politik och d'Arméi méi an d'Mëtt vun der Gesellschaft féieren an net ënner „ferner liefern“ behandeln. Ech wëll net soen, dass dat elo geschitt ass. Mee et ass wichteg, dass mer an déi Richtung ginn, dass mer am Fong geholl aus eiser Arméi eng wierklech Biergerarméi maachen, mat där sech d'Leit e bëssen identifizéieren; en neien Image, e positiivt Arméibild. Ech mengen, esou gëtt d'Arméi méi attraktiv a si fënnt d'Ënnerstëtzung vun eiser Gesellschaft.

Merci.

■ **Une voix.**- Très bien!

■ **M. Fernand Etgen, Président.**- Merci villmools, Här Halsdorf. An d'Wuert geet direkt weider un den honorabelen Här Gusty Graas. Här Graas, Dir hutt d'Wuert.

■ **M. Gusty Graas (DP).**- Merci, Här President. Dir Dammen an Dir Hären, d'Lëtzebuurger Arméi gouf den 30. November 1944 duerch en Arrêté grand-ducal gegrént a si hat ee Joer méi spët, am November 1945, u sech hiren éischte gréisseren Asaz. An zwar war dat d'Besetzung vu friemem Territoire. Mir hunn deemools zwee Bataillounen op Bitburg geschéckt, fir u sech eng Sträif zwëschent der Our, d'Sauer erof bis op d'Musel ze besetzen.

Firwat soen ech dat elo hei? Dat kléngt vlächicht e bëssen anachronistescht, et ass et op eng Manéier och, mee ech soen dat aus deem ganz einfache Grond: well een dorunner awer gutt gesäit, wéi sech d'Arméi entre-temps entwéckelt huet. Et ass déizäit natierlech nach keng UNO ginn, et ass nach keng NATO ginn, et ass nach keng Europäesch Unioun ginn. An haut si mer an engem ganz aneren Szenario. Haut sti mer natierlech viru ganz aneren Erausforderungen. Mir brauchen haut eng modern Arméi. Mir brauchen eng Arméi, déi dem Zäitgeescht ugepasst ass. An, wat virun och hei richtig vu mengem Virgänger gesot ginn ass, mir mussen versichen, eeben och d'Image de marque vun der Lëtzebuurger Arméi no baussen nach besser duerzestellen.

D'Arméi huet u sech do e gewëssene Problem, dat ass richtig. Ech wëll elo kengem ze no trieden, mee deenen Hyperpazifiste soll awer trotzdem mol erkläert sinn, datt haut e moderne Rechtsstaat och net méi ouni eng Arméi auskënnt. Firwat? Majo, eng Arméi ass net an éischter Linn do, fir Krich ze féieren, mee eng Arméi ass an éischter Linn do, fir e Krich ze verhënneren.

An da kommen eng ganz Rei aner Entwécklungen derbäi. Ech hu virdu gesot, datt et nach keng UNO, keng NATO an och keng Europäesch Unioun Enn oder Mëtt de 40er-Jore ginn ass. A grad do si mir als Lëtzebuurger Land gefuerdert. Grad do kënnen mir u sech e wichtige Bäitrag leeschten. A mir mussen deen och leeschten, besonnesch um Niveau vun der NATO - mee herno kann ee bei deem anere Projet de loi nach eng Kéier kuerz drop zrëckkommen. Mee et ass awer wichteg, datt Lëtzebuerg säi Bäitrag leescht. A mir sinn do net onbedéngt am viischte Peloton. Ech mengen, dat wësse mer alleguer, datt mer nach ganz grouss Efforte mussen maachen.

Deen heite Projet de loi dréit vlächicht an engem ganz bescheidene Mooss dozou bäi. Dat ass och richtig. Ech fannen et och gutt, datt mer zu dësem Zäitpunkt, wéi gesot, déi Plaffongen elo no uewen adaptéieren, well mer eeben en attente vun deem neie Gesetz awer schonn d'Méiglecheet mussen kréien an eis och ginn, fir zousätzlech Leit ze rekrutéieren.

Wa mer natierlech iwwert de Rekrutement schwätzen, da mussen mer eis och Gedanke maachen: Wou fanne mer déi Leit? Wéi fanne mer déi Leit? Et ass virun der méi gesot ginn, datt mer virun allem an der Carrière inférieure e bësse méi Problemer hunn. Wann ech de Minister gutt verstanen hu bei deene leschten Aussoen, déi e gemaach huet, schéngt dat